


O LE EKALESIA A IESU KERISO O LE AU PAIA O ASO E GATA AI • AOKUSO 2017

# O Le Liahona

A close-up photograph of a young boy with dark, curly hair, wearing a blue t-shirt. He is looking intently at a tablet device held in his hands. The background is a softly lit indoor setting with warm tones.

Faalolotoina Lou  
Aoaoina—Ausia Lou  
Gafatia Paia, i. 32

O le Valaaulaina o Isi e Toe Foi  
Mai i le Talalelei, i. 13, 14, 80

Auala e 8 e Faamalosia ai Lou  
Aiga e Tetee Atu i Ponokalafi,  
i. 18

O Le Auala o Fuafuaina ai e le  
Faamaoni lo Tatou Taunuuga e  
Faavavaau, i. 26



O le Malumalu o Katediani, o loo i le pito i tua i le 1907, o le uluai malumalu lea na fausia i lenet tisipenisione. Na vaaiā e le Perofeta o Josefa Samita le malumalu i se faaliga Vaaiā, lea na tuuina mai ai lona manamu (tagai i le MF&F 95). Na faapaiaina le malumalu i le aso 27 o Mati, 1836 (tagai i le MF&F 109). O lena aafaga faaleagaga maoae, na tusia ai e Eliza R. Snow, "Na faaali mai agelu i nisi, a o le lagona o le faatasī mai o au o le lagi na lagonaina e tagata uma na auai" (i le Aoaoga a Peresitene o le Ekalesia: Josefa Samita [2007], 328).

Ata pue na saunia e George Edward Anderson, faaaloaloga a le Falematāga o Talafasolopito o le Ekalesia

# Liahona, Aokuso 2017



7

## O SAVALI

- 4 Savali a le Au Peresitene Sili: Olaga o se Soo**  
Saunia e Peresitene Dieter F. Uchtdorf
- 7 Savali a Faiaoga Asiasi: Ola i se Olaga Faapaaina**



I LE FAAVAA  
Ata na pueina e Cody Bell.

## TALA FAAALIA

- 14 O Le Faamanuiaina o i Latou o e ua le Toaaga Mai**  
Saunia e Elder Terence M. Vinson  
*A o tatou ola ai i le mafutaga ma le Agaga, ma saili le fesoasoani a le Alii, o le a Ia faamanuiaina a tatou taumafaiga e toe aumai Ana mamoe na leiloloa i le lafu.*

- 18 Auala e Valu e Fesoasoani i Tamaiti e Teena ai Ponokalafi**  
Saunia e Lisa Ann Thomson  
*E ui lava i le foliga mai ua taatele le ponokalafi, o matua ua i ai le mana e puipuia a latou fanau ma saunia i latou e feagai ma teteetatu i ponokalafi.*

- 26 O Le Tulaga Faatonuina Paia o le Faamaoni**  
Saunia e Elder Neil L. Andersen  
*Mo se soo o Keriso, o le faamaoni o se tasi o mataupu faavae autu o le faaleagaga.*

- 32 O le aoaoina mo le Agaga Atoa**  
Saunia e Elder Kim B. Clark  
*Ia aotauina ma lou agaga atoa—e le na o lou mafaufau.*

## MATAGALUEGA

- 8 Tusigāmanatu o le Konafesi o Aperila 2017**  
Saunia e Christy Rusch Banz
- 10 Tala Fou o le Ekalesia: Au Peresitene o Eria**
- 12 Ataata: O Uati**  
Saunia e Paige Anderson
- 13 Auaunaga i le Ekalesia: O le Popole o le Alii mo i Tatou**  
Saunia e Paige Anderson
- 38 O Ata o le Faatuatua: Niki Covington**
- 40 O Leo o Le Au Paia o Aso e Gata Ai**
- 80 Seia Tatou Toe Feiloai: Faamolemole Toe Foi Mai!**  
Saunia e Peresitene James E. Faust



46

**44 O le a le Inisitituti?**

Saunia e Wayne L. Davis

*E mafai faapefea ona fesoasoani le inisitituti ia te oe ia maua ni uo, puipuiga faaleagaga, ma le malamalama o le talalelei?*

**46 O le Inisitituti e mo i Tatou**

Saunia e Leah Welker

*Ua tele naua mea e tatau ona tatou faia—e mafai ona fesoasoani le inisitituti.*



*Vaai pe mafai ona e mauaina le Liahona o loo natia i le lomiga lenei. Faaiteite: Po o le fea tagata mai tusitusiga paia e te manao ia avea ai oe?*

**50 Seminare: Lea Tatou Te Faia ai ni Fesootaiga**

Saunia e David A. Edwards

*Pe e te lagonaina i nisi taimi le tuuatoatasi a o e taumafai e malamalama i lou olaga, ou tofotofoga, ma tusitusiga paia?*

**54 O Le Ala e Mafai ai Ona e Fesoasoani i le Galuega o le Malumalu**

Saunia e Megan Armknecht

*E mafai faapefea ona e aafia i lenei galuega matagofie?*

**56 Siamupini mo le Tatalo Faaleaiga**

Saunia e Charlotte Larcabal

*O motugaafa e sefulu mai le autalavou ina ia fesoasoani i lou aiga e maua le faaleagaga sili atu i o outou tulivae.*

**58 O Le Filifiliga Ina ia Faatuatua**

Saunia e Elder Enrique R. Falabella

*Filifiliga e fa e mafai ona suia lou olaga.*

**62 Pepa Lautele o loo I Ai se Savali: Taua o le Tagata Lava la****63 O Tali mai Taitai o le Ekalesia: Pe Faapefea Ona Tali Atu ma le Lototoa Faakerisiano**

Saunia e Elder Robert D. Hales

**64 Fesili ma Tali**

*E mafai faapefea ona ou fesoasoani i au uo ia foia faafitauli e pei o le palauvale ma le soona taaaalo i taaloga vitio?*



69

**66 O Le Ata Leaga**

Saunia e Lori Fuller

*Sa faaali atu e uo a Taran ia te ia se ata leaga. O le a se mea e mafai ona ia faia?*

**68 O le Vavega a Sister Sheldon**

Saunia e Elyse D.

*Sa mai tigaina Sister Sheldon. E mafai faapefea ona fesoasoani le Peraimeri ia te ia?*

**69 Avea e Faapei o Nifae**

Saunia e Mason J.

*Ina ua ou aoao e uiga ia Nifae, sa ou filifili ou te manao ia avea faapei o ia.*

**70 O tali mai se Apostolo:**

**E Faapefea ona ou Fesoasoani Atu i Tagata Uma e lagona le Talileleia o ia i le Peraimeri?**

Saunia e Elder Neil L. Andersen

**72 O Tamaiti Agaalofa: Fiafia e Fesoasoani!**

Saunia e Jordan Wright

**72 Suafa o Iesu**

*Faataitai lenei manatu i le afiafaaleaiga ina ia iloa atili ai le Faaola.*

**76 Tala ia Iesu: Na Faamagalo Atu Iesu**

Saunia e Kim Webb Reid

**79 Itulau e Valivali: E Mafai Ona Ou Migao**

O Le Lomiga Faamaonia Faa-Samoa a le Ekalesia  
a Iesu Keriso o le Au Paia o Aso e Gata Ai

**Susuga a le Au Peresitene Sili:** Thomas S. Monson,  
Henry B. Eyring, Dieter F. Uchtdorf

**O Le Korama a Apostolo e Toasefululu:**

Russell M. Nelson, Dallin H. Oaks, M. Russell Ballard,  
Robert D. Hales, Jeffrey R. Holland, David A. Bednar,  
Quentin L. Cook, D. Todd Christofferson, Neil L. Andersen,  
Ronald A. Rasband, Gary E. Stevenson, Dale G. Renlund

**Faatonu:** Joseph W. Sitati

**Assistant Editors:** Randall K. Bennett, Carol F. McConkie

**Fautua:** Brian K. Ashton, Bonnie H. Cordon, LeGrand R.  
Curtis Jr., Sharon Eubank, Christoffel Golden, Douglas D.  
Holmes, Erich W. Kopischke, Larry R. Lawrence

**Pule Faatonu:** Richard I. Heaton

**Faatonuili o Mekasini a le Ekalesia:** Allan R. Loyborg

**Pule o Mea Tau Pisini:** Garff Cannon

**Pule Faatonutonu:** Adam C. Olson

**Pule Faatonutonu Lagolago:** Ryan Carr

**Lagolago o Lomiga:** Cremilda Amaral

**Au Tuisitu ma Faatonutonu:** Maryssa Dennis, David  
Dickson, David A. Edwards, Matthew D. Flitton, Lori Fuller,  
Garrett H. Garff, LaRene Porter Gaunt, Jon Ryan Jensen,  
Charlotte Larcabal, Michael R. Morris, Eric B. Murdoch,  
Sally Johnson Odekirik, Joshua J. Perkey, Jan Pinborough,  
Richard M. Romney, Mindy Anne Selu, Marissa Widdison

**Pule Faatonuili Tusiata:** J. Scott Knudsen

**Faatonuili Tusiata:** Todd R. Peterson

**Au Mamanu:** Jeanette Andrews, Fay P. Andrus, C. Kimball  
Bott, Thomas Child, David Green, Colleen Hinckley, Eric P.  
Johnsen, Susan Lofgren, Scott M. Mooy, Mark W. Robison,  
Rachel Smith, Brad Teare, K. Nicole Walkenhorst

**Faatonu o le Puletaofia ma Fatufatuga:**

Collette Nebeker Aune

**Pule i le Gaosiga:** Jane Ann Peters

**Au Gaosi:** Glen Adair, Connie Bowthorpe Bridge,  
Julie Burdett, Thomas G. Cronin, Bryan W. Gygi,  
Ginny J. Nilson, Derek Richardson

**Tailolomi:** Joshua Dennis, Ammon Harris

**Faatonuili Lolomiga:** Steven T. Lewis

**Faatonuili o le Tufufatuga:** Troy K. Vellinga

Mo le okaina o mekasini, alu i le store.lds.org po o le  
Faletusi Tutotonu i Pesega. Telefoni 64127. Totogi o le  
Mekasini: \$0.55 (Samoa) i i le kopi. Totogi mo le Tausaga  
Atoa \$6.60 (Samoa).

**Auina atu tusitisiga ma faafesi i luga o le  
initonetu** i le liahona.lds.org: pe meli mai i le *Liahona*,  
Rm. 2420, 50 E. North Temple, Salt Lake City, UT 84150-  
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa"  
po o se "faatonu") e lomia i le faa-Alepania, Aminia  
(Sasae), Pisilama, Palekeria, Kemupotia, Sepuanu, Saina,  
Kalaotia, Siekisolovakia, Tenimaka, Take, Igilisi, Esitonua,  
Fiti, Finelani, Farani, Sihamani, Eleni, Hanikeri, Initu, Iselani,  
Initonua, Italia, Japani, Kiripati, Korea, Latvia, Litunia,  
Malakasa, Masela, Monokolia, Nouei, Polani, Potukale,  
Romania, Rusia, Samoa, Saina (ua faafaigoifieina), Silovenia,  
Sipaniola, Suetena, Swahili, Tagaloaka, Tahiti, Tai, Toga,  
Iukureini, Urutu, ma Viatename. (E eseese lava gagana.)


© 2017 Puletaofia e le Intellectual Reserve, Inc. Ua taofia  
aia tatau uma. Lomia i le lunaite Setete o Amerika.

**Faamatatalaga o le Puletaofia:** Vagana ua faaioa atu, e  
mafai e tagata taitoatasina ona kopina anomea mai le *Liahona*  
mo lo latou faaaogaina patino, ma le saili tupe (e aofia ai  
mo valaauga o le Ekalesia). O lenei aia tatau e mafai ona  
faaleaoagaina i suo se tamai. O anomea o mea fatino e le  
mafai ona kopina pe afai o o loo faaioa mai se faasa i le  
laina o loo i ai ma le faatufugaga. O fesili mo le Puletaofia  
e tatau ona faatusati mai i le Intellectual Property Office,  
50 E., North Temple St., Fl 13, Salt Lake City, UT 84150,  
USA; email: cor-intellectualproperty@ldschurch.org.

**For Readers in the United States and Canada:**

August 2017 Vol. 41 No. 8. O LE LIAHONA (USPS 311)  
Samoan (ISSN 1045-0947) is published monthly by The  
Church of Jesus Christ of Latter-day Saints, 50 East North  
Temple, Salt Lake City, UT 84150. USA subscription price  
is \$10.00 per year; Canada, \$12.00 plus applicable taxes.  
Periodicals Postage Paid at Salt Lake City, Utah. Sixty days'  
notice required for change of address. Include address label  
from a recent issue; old and new address *must* be included.  
Send USA and Canadian subscriptions to Salt Lake  
Distribution Center at address below. Subscription help  
line: 1-800-537-5971. Credit card orders (Visa, MasterCard,  
American Express) may be taken by phone. (Canada Poste  
Information Publication Agreement #40017431)

POSTMASTER: Send all UAA to CFS (see DMM 507.1.5.2).  
NONPOSTAL AND MILITARY FACILITIES: Send address  
changes to Distribution Services, Church Magazines,  
P.O. Box 26368, Salt Lake City, UT 84126-0368, USA.



## AUTU I LE LOMIGA LENEI

*E ta'u mai e numera le itulau muamua o le tusiga.*

**Agaga Paia,** 12, 32

**Agalelei,** 13, 69

**Aiga,** 38, 43, 56, 72

**Ala o faasalalauga,** 18,  
64, 66

**Alofa,** 13, 63, 68, 70, 72

**Aoga,** 32, 44, 46, 50

**Auauna atu,** 13, 68

**Avea ma Soo,** 4

**Faamagaloga,** 76

**Faamanatuga,** 41

**Faamaoni,** 26

**Faapaiaina,** 7

**Papatisoga,** 4, 58

**Perisitua,** 14

**Perofeta,** 58

**Ponokalafi,** 18, 66

**Salamo,** 14, 32

**Seminare,** 50

**Taleni,** 38

**Tama Faalelagi,** 50, 70

**Tatalo,** 32, 56, 76

**Taua o le tagata lava ia,** 62

**Tulaga faamatua,** 18

**Usiusitai,** 58



**Saunia e  
Peresitene  
Dieter F. Uchtdorf**  
Fesoasoani Lua i le Au  
Peresitene Sili

# OLAGA O SE SOO

le tolusefulu tausaga talu ai i Ghana, sa laa atu ai se tamaitai talavou o le kolisi e igoa ia Doe i totonusi o se falelotu a le AAG mo le uluai taimi. Sa valaaulia e se uo Doe e sau faatasi ma ia, ma sa fia iloa e Doe pe faapei le Ekalesia.

Sa matuai agalelei tagata ma faauo o lea na le mafai ai ona ia tatalia lona mafaufau, "O le a lenei ituaiga lotu?"

Sa matuai lagonaina e Doe le faagaeetia o lea na ia filifili ai e aoao atili e uiga i le Ekalesia ma ona tagata, o e na faatumulia i le tele naua o le olioli. Ae o le taimi lava na ia amata ai ona faia o lea mea, na amata ai e aiga ma uo o e na manatu mo lona lelei ona tetee ia te ia i soo se itu. Sa latou tau atu ni mea leaga e uiga i le Ekalesia ma faia mea uma latou te mafaia e taofi ai o ia.

Ae na mauaina e Doe se molimau.

Sa i ai lona faatuatua, ma sa ia fiafia i le talalelei, lea sa faatumulia lona olaga i le olioli. Ma o lea, na ia ulu atu ai i le vai o le papatisoga.

Mulimuli ane, sa ia faaaafia o ia lava i le suesue ma le tatalo. Sa ia anapogi ma saili le uunaiga a le Agaga Paia i lona olaga. O se taunuuga, na faateleina le malosi ma sili atu le loloto o le tuputupu ae o le molimau ma le faatuatua

## AOAO ATU MAI LENEI SAVALI

**U**a aoao mai e Peresitene Uchtdorf ia i tatou o le ala o le avea ai ma soo e faigata ae o i latou o e ola ai i le "olaga filemu o se soo o Iesu Keriso o i latou na o le a iu lava ina maua le olioli." E pei lava ona faamatalaina e Peresitene Uchtdorf le tala a Doe e faaalia ai pe faapefea ona mafai ona maua e se soo moni o Keriso le filemu ma le olioli e ui lava i tofotofoga o le olaga, e mafai ona e mafaufau e faasoa atu se tala mai i lou lava olaga pe aisea e te filifili ai e mulimuli ia Keriso ma ua faapefea ona la faamalosia oe. Pe a taitaiina oe e le Agaga, o le faasoaina atu o tala patino e mafai ona faamalosia i latou e te aoaoina.

o Doe. Na iu lava ina filifili o ia e auauna atu i se misiona talai mo le Alii.

Ina ua foi mai lana misiona, sa tafafao faamasani ma faaipoipo i se faifeautalai ua maea lana misiona—le toatasina lava lea na papatisoina o ia i ni tausaga na muamua atu—ma sa mulimuli ane faamauina i laua i le malumalu o Johannesburg i Aferika i Saute.

Ua mavae le tele o tausaga talu ona maua e Doe Kaku se aafiaga muamua o le olioli o le talalelei a Iesu Keriso. I lena taimi, e lei matagofie i taimi uma lava le olaga mo ia. Sa ia onosaia lana vaega o le lototiga ma le faanoanoa, e aofia ai le maliliu o se fanau e toalua—o le loloto o le faanoanoa o na aafiaga o loo mamafatu pea i lona loto.

Ae o ia ma lona toalua, o Anthony, na taumafai lava ia faalatalata atu i le tasi ma le isi ma lo la Tama Faalelagi pele, lea la te alolofa i ai ma o la loto atoa.

I le taimi nei, ina ua mavae le 30 tausaga talu ona ia ulu atu i le vai o le papatisoga, faatoa faamaeaina e Sister Kaku se isi misiona faifeautalai—o le taimi lenei faatasi ai ma lona toalua, o le sa auauna atu o se peresitene o le misiona i Nigeria.



*Doe Kaku i le tami o lona liliu mai i le Ekalesia.*

Fai mai i latou e masani ia Sister Kaku fai o loo i ai se mea faapitoa e uiga ia te ia. E susulu mai lona fafia. E faigata ona faaalu se taimi faatasi ma ia e aunoa ma le lagonaina o le fafia sili atu o oe lava ia.

E mautinoa lana molimau: “Ou te iloa e silasila mai le Faaola ia te au o Sona afafine ma se uo (tagai i le Mosaea 5:7; Eteru 3:14),” o lana tala lea. “Ma o loo ou aoao ma tau-mafai malosi e avea foi ma Ana uo—e le gata i mea ou te fai atu ai ae faapea foi i mea ou te faia.”

### O i Tatou o Ni Soo

O le tala a Sister Kaku e tai tutusa lava ma tala a le toatele o isi. Sa i ai ia te ia se manao e iloa le mea moni, sa ia totogia le tau e maua ai le malamalama faaleagaga, sa ia faaalia lona alofa mo le Atua ma ona uso a tagata, ma i luga o le ala na feagai ai o ia ma faigata ma le faanoanoa.

Ae e tusa lava po o a faigata, e tusa lava po o le a le faanoanoa, sa ia faaauau pea ona agai i luma i le faatuata. E tutusa lava lona taua, sa ia faatumauina lona olioli. Sa ia maua se auala e le gata e onosaia ai faigata o le olaga ae faapea foi ona tuputupu ae faaleagaga e ui lava i na faigata!

E tai tutusa lava lana tala ma lau tala ma lau foi tala.

E seasea lava ona saogalemu la tatou malaga pe aunoa ma se tofotofoga.



*Tuafafine Kaku i le aso ma lona toalua o Anthony.*

Ua tofu i tatou taitoatasi ma o tatou lototiga, o tatou le fafia, ma o tatou faanoanoa.

E mafai ona oo ina tatou lagonaina le lotovaivai ma le lofituina i nisi taimi.

Ae o i latou o e ola i se olaga o se soo—o e tumau i le faamaoni ma tumau pea i le agai atu i luma i le faatuata; o e faatuata i le Atua ma tausi i Ana poloaiga;<sup>1</sup> o e ola i le talalelei mai lea aso i lea aso ma lea itula i lea itula; e tuuina atu auaunaga faaKeriso ia i latou o siomia ai i latou, e tasi se galuega lelei i le taimi—o i latou na e ana nai galuega faatauvaa na e masani ona faia se eseesega tele.

O i latou e fai si agalelei teisi, si loto faamagaloo atu teisi, ma se pai atu e sili atu le alofa mutimutivale o i latou na e alolofa mutimutivale o le a maua le alofa mutimutivale.<sup>2</sup> O i latou o e faia lenei lalolagi o se nofoaga e sili atu ona lelei, o se galuega agalelei ma le alofa i lea taimi ma lea taimi, o e taumafai e ola ai i se olaga faamanuiaina, faamalieina, ma le filemu o se soo o Iesu Keriso o i latou na o le a iu lava ina maua le olioli.

O le a latou iloa o “le alofa lea o le Atua, ua faamaligiina ifo lautele o ia lava i loto o le fanauga a tagata . . . o le mea lea ua silisili atu ona manaomia i mea uma . . . ma le silisili ona olioli i le Agaga.”<sup>3</sup> ■

### FAAMATALAGA

1. Tagai i le Mosaea 4:6.

2. Tagai i le Mataio 5:7.

3. 1 Nifae 11:22–23.



## O Le Olioli o se So'o o lesu Keriso.

**P**e na e mauaina ea se aso leaga? O le pa se mea na e faia e faafafia ai? Ua silafia e Peresitene Uchtdorf e faapea "e tofu uma i tatou taitoatasi ma o tatou lototiga, o tatou le fiafia, o tatou faanoanoaga. E mafai ona tatou oo ina lagonaina le lotovaivai ma le lofituina i nisi taimi."

O lana tali o le ola ai i le mea ua ia taua "o le olaga o se soo": "tumau i

le faamaoni ma agai pea i luma i le faatuatua." Pe a tatou agai i luma i le faatuatua, e mafai ona tatou faalagolago i le Atua, tausi i Ana poloaiga, ma auauna atu i isi—ma lagonaina le olioli i le taimi atoa lava! E pei ona saunoa mai Peresitene Uchtdorf, "O i latou o e ola i le olaga o se soo . . . o i latou ia e ana galuega faatauvaa na e faia se eseesege tele."

Mafaufau e fai se lisi o auala e mafai ona e ola ai i se olaga o se soo. Mo se faataitaiga, e mafai ona e tusia i lalo se manatu o le auaunaga e pei o le "Fesoasoani i se matua e saunia le meaai o le afiafi" po o se manatu mo le tausia o poloaiga e pei o le "Tatalo mo le onosai atili i nai ou tei." O le isi taimi e te faanoanoa ai pe lofituina, toso mai i fafo lau lisi, piki se manatu, ma faataitai i ai!

## TAMAITI

### Fiafia e Fesoasoani

**P**e a tatou mulimuli ia lesu ma taumafai e agalelei, tatou te fesoasoani ia fiafia isi tagata. Ma o le agalelei e faafafiaina ai foi tatou! Lio ni mea se lua pe tolu e te ono mafai ona faia i lenei vaiaso ia agalelei ai i isi.



# Ola i se Olaga Faapaiaina

*Ia suesue ma le agaga tatalo lenei savali ma saili mo uunaiga ia iloa ai mea e faasoatatu. Efaapefea e le malamalama i le faamoemoega o le Aualofa ona saunia asafine o le Atua mo faamanuiaga o le ola e faavavau?*

“Ina ia faapaiaina o le vaetofia lea po o le tuuto atu o se mea e paia, ma tuu atoa atu i faamoe-moega paia,” o le saunoaga lea a Elder D. Todd Christofferson o le Korama a Apostolo e Toasefulu. “O le manuia moni i lenei olaga e maua mai i le faapaiaina o o tatou olaga—o lona uiga, o o tatou taimi ma filifiliga—i faamoemoega o le Atua.”<sup>1</sup>

Na saunoa mai Elder Neal A. Maxwell (1926–2004) o le Korama a Apostolo e Toasefulu, “E matele lava ina tatou mafaufau o le faapaiaina o le faamatuuiua atu lea o a tatou meatotino, pe a faatonuina ai mai le lagi. Ae o le faapaiaina moni lava ia, o le faamatuuiua atu lea o oe lava i le Atua.”<sup>2</sup>

A o tatou faapaiaina i tatou lava i faamoemoega o le Atua, o le a faateleina lo tatou faatuatua ia Iesu Keriso ma Lana Togiola. A o tatou ola i se olaga faapaiaina,



e mafai ona avea i tatou ma tagata paia e ala i na galuega.

Na saunoa mai Carole M. Stephens, le Fesoasoani Muamua sa i ai muamua a le Au Peresitene o le Aualofa: “Na aoao mai Elder Robert D. Hales, ‘Pe a tatou osia ma tausi feagaiga, tatou te o mai i fafo o le lalolagi ma i totonu o le malo o le Atua.’

“Ua suia i tatou. Ua ese o tatou foliga ma a tatou taga. Ua ese mea tatou te faalogologo i ai ma faitau i ai ma tautala i ai, ua ese foi mea tatou te ofuina aua ua avea i tatou ma asafine o le Atua, ua noatia ia te Ia e ala i se feagaiga.”<sup>3</sup>

O le faapaiaga o le feagaiga lea na osia e le Atua “ma le aiga

o Israuel; Pe a mavae ia aso, o loo fetalai mai ai Ieova, ou te tuuina lau tulafono i totonu ia te i latou, ma ou tusi ai i o latou loto; e fai foi au mo latou Atua, o i latou foi e fai mo’u nuu” (Ieremia 31:33). O le ola i se olaga faapaiaina e ogatusa lea ma le fuafuaga a le Atua mo i tatou.

## Mau Faaopoopo

1 Tesalonica 1:3; Mataupu Faavae ma Feagaiga 105:5 [reliefsociety.lds.org](http://reliefsociety.lds.org)

## FAAMATALAGA

1. D. Todd Christofferson, “Toe Manatunatuga i se Olaga Faapaiaina,” *Liahona*, Nov. 2010, 16.
2. Neal A. Maxwell, “Ta Faapaiaina La Outou Galuega,” *Liahona*, Iulai 2002, 39.
3. Carole M. Stephens, “Ala Mai ia i o Tatou Tiute,” *Liahona*, Nov. 2012, 115–16.

Faatuatua  
Aiga  
Toomaga



Mafaufau i le Mea Lenei

E faape-faea ona fesoasoani ia i tatou le faapaiaina o o tatou olaga i le Alii e avea atili ai e faapei o la?

# TUSIGĀMANATU O LE KONAFESI O APERILA 2017

*“O le mea ua fai atu ai A’u o le Alii ua Ou fai atu ai; . . . pe i lo’u lava leo po o i le leo o au auauna, ua tutusa lava” (MF&F 1:38)*

A o e iloiloina le konafesi aoao ia Aperila 2017, e mafai ona e faaaogaina itulau nei (ma Tusigāmanatu o le Konafesi i lomiga i le lumana) e fesoasoani ia te oe e suesue ma faaaoga aoaoga talu ai nei a perofeta ma aposestolo soifua ma isi taitai o le Ekalesia.



**MATAUPU FAAVAE UA FAAMAMAFAINA**

## Aua le Tausalaina i le Sauaina

“**I**le tele o atunu eseese o le lalolagi, sa tele ni tamai vaiga i le leaga tele o le faailogalanu ma le faaitu’au na mafatia ai i latou na osofaia ona o o latou ituaiga po o tagatanuu.

“E oo mai sauaga i le tele o ituaiga: faitioga, faasaunoa, faatauem, tuliese ma le faiseea, po o le inosaina o le isi tagata. E tatau ona tatou tetee atu i le faailogalanu lea e siisii ona uiga leaga e faasaga ia i latou e i ai ni manatu eseese. E faailoa mai lava e le faailogalanu ia lava, i fasivaega, i le le manao e faamatuu atu le saolotoga tutusa o le faaaliga o manatu ma lagona. O tagata uma, e aofia ai tagata o tapuaiga, ua i ai le aia tatau e faaali

ai ona lava manatu i tulaga lautele. Ae e leai ma se tasi e i ai se laisene e itagia ai fua isi a o faaalia na lagona.

“. . . Sa aoao mai le Faaola, “O mea uma foi tou te loto i ai ia faia e tagata ia te outou, ia faapea lava ona outou faia ia te i latou” [Mataio 7:12]. Mo i tatou e talosagaina le faaaloalogiaina, e tatau ona tatou faaaloalo atu. Ma le isi, o lo tatou liuaina moni lava e aumaia ai le “agamalu ma le maualalo o le loto,” lea e valaaulia ai “le Agaga Paia” e faatumuina i tatou i le “alofa atoatoa” [Moronae 8:26], se “alofa faamaoni’ 1 Peteru 1:22 mo isi.”

Elder Dale G. Renlund o le Korama a Apostolo e Toasefululu, “O Lo Tatou Leoleo Mamoe Lelei,” *Liahona*, Me 2017, 31–32.

## FOLAFOLAGA FAAPEROFETA



### **UA FAATUATUAINA I TATOU E LE ATUA E AUAUNA ATU I O TATOU TUAA**

“Sa silafia e le Atua o le a e lagonaina le tosina atu i ou tuua i le alofa ma o le a e mauaina le tekinolosi e talafeagai e faailoa ai i latou. . . . Ma sa la silafia e mafai ona la faatuatuaina oe ia faataunu lenei galuega e fai ma sui o ou tuua. . . .

“O le galuega lenei o la tatou augatupulaga. . . . Ua outou lagonaina lenei mea, e pei ona ou lagonaina, ina ua e lagonaina se faateleina o le alofa a o e tagai atu i le ata o se tuua. Na e lagonaina i totolu o le malumalu, ina ua foliga mai le igoa i luga o se kata e sili atu i lo na o se igoa, ma lē mataofia le lagona e faapea o lenei tagata sa iloaina lava oe ma lagonaina lou alofa.

“Ou te molimau atu o loo finalo le Atua le Tama i Lana fanau ia toefoi atu i le aiga, i auauga ma i le mamalu. . . . Ou te folafola atu ia te oe le fesoasoaniga musuia o loo e sailia ma manaomia.”

Peresitene Henry B. Eyring, Fesoasoani Muamua i le Au Peresitene Sili, “Faapopotoina o le Aiga o le Atua,” *Liahona*, Me 2017, 21, 22.



## O Le Tetee Atu i le Agasala o Iona Uiga o le Salamo

**O**le tetee atu i le agasala e le faapea ua leai se agasala, ae o loo faatatau ina ia salamo, mataala, agavaa faifaipea. Masalo o le mafai ona tetee i le agasala e sau o se faamanuiaga mai le tetee faifaipea i le agasala. . . .

“Na ‘matua totoa i le lototele [fitafita talavou]. . . . Ioe, . . . sa aoaoina i latou e tausi i poloaiga a le Atua ma savavali ma le tonu i ona luma’ [Alema 53:20–21]. Na o atu nei alii talavou i le taua ma tauaveina uiga faaKeriso o ni auupega e tau ai ma o latou fili. . . .

“E oofu e a tatou fanau ni ofutau faaleagaga pe a latou faavaeina mamanu o le avea ma soo patino i aso taitasi.”

Joy D. Jones, Peresitene Aoao o le Peraimeri, “O Se Tupulaga e mafai ona Tetee Atu i le Agasala,” *Liahona*, Me 2017, 88.

### O TALI MO OOE



## E Mafai Faapefea ona Ou Iloa Pe o La’u Tali e sau mai le Agaga pe o Au Lava?

“Manatua ia upu a Nifae. ‘Ma sa taitai a’u e le Agaga, ona sa ou lē mua’i iloa muamua le mea e tatau ona ou faia. E ui i lea,’ sa ia fai mai ai, ‘sa ou alu atu’ [1 Nifae 4:6–7].

“Ma e tatau foi ia i tatou. E tatau ona tatou talitonu i a tatou uunaiga muamua. O nisi taimi tatou te fetuutuunai ai, tatou te mafaufau pe o tatou lagonaina se musumusuga faaleagaga pe na o o tatou lava mafaufauga. A amata loa ona tatou taumateina faalua o tatou lagona, e oo lava i le faatolu—ma ua tatou faia uma lava—ua tatou tulieseina le Agaga; ua tatou fesiliglia fautuaga faalelagi. Na aoao mai le Perofeta o Iosefa Samita, afai o le a e faalogo i uunaiga muamua, o le a faaiva ona e mauaina le sa’o mai le sefulu.”

Elder Ronald A. Rasband o le Korama a Apostolo e Toasefululu, “Tuu Atu i le Agaga Paia e Taitai,” *Liahona*, Me 2017, 95–96.

Ina ia faitau, matamata, pe faalogologo i lauga o le konafesi aoao asiasi i le conference.lds.org

### FAATUMU LE AVANOA

Faaaoga le lomiga o Me 2017 pe asiasi i le conference.lds.org e faitau atili i mea na tautalagia e nei failauga.

1. “O le manumalo i le lalolagi e le na o se taimi patino se tasi i le olaga atoa e tupu ai, ae e tupu i le olaga atoa lea e iloa ai \_\_\_\_\_. —Neil L. Andersen, “Valaauina i le Galuega.”
2. “O se tofiga e galue i se nofoaga \_\_\_\_\_ e tatau ma taua ae e iona lua i se valaauga i le galuega.” —David A. Bednar, “Called to the Work.”
3. “I le silafaga a le Atua, e leai se \_\_\_\_\_ i le malo o loo sili atu ona taua nai lo le isi.” —Dieter F. Uchtdorf, “O Le Sili ia te Outou.”
4. “Sailia o le \_\_\_\_\_ o loo i totonus o lo tatou DNA faaleagaga.” —Mark A. Bragg, “Tupu Susulu Pea Lava Pea seia oo i le Aso e Atoatoa Ai.”

3) Valaauga, 4) malamalamā  
Tali: 1) faavau, 2) tuu,

# TALA FOU O LE EKALESIA

Asiasi ane i le news.lds.org mo se faaopoopoga o tala fou ma mea e tutupu i le Eklesia.

## Ua Tofia Taitai Fou o Eria

**U**a faasilasila mai e le Au Peresitene Sili ia suiga nei i tofiga faaleautaitai i eria e amata atu i le aso 1 o Aokuso 2017.

Ua tofiaina Fitugafulu e ala i faaaliga, i lalo o le taitaiga a le Au Peresitene Sili, e fesoasoani i le Korama a Aposetolo e Toasefululua i la latou auaunaga i le

lalolagi atoa. E pulefaamalumalu le au Peresitene o Fitugafulu ma au Peresitene o Eria i eria faafaafanua, ma e faimalaga taitai o eria i totonusi o latou eria ua tofia i ai e aoao atu ma faamlosiau atu i taitai i le lotoifale faapea ma tagata o le Eklesia.

I le taimi o le misiona faaletino a

Keriso sa Ia valaaulia ia Fitugafulu, faatonu i latou i se auala e tutusa lava ma le au Aposetolo e Toasefululua ma auina atu ia te i latou “ai ona luma,” faamatala atu o le a faalogo foi i latou o e faalogo i o latou leo i Lona siufogaga (tagai i le Mataio 10:1, 16–17; Luka 10). ■

### Iunaite Setete ma Kanata



L. Whitney  
Clayton

E lagolago i  
eria uma



Craig C.  
Christensen

Iuta i Matu  
Iuta Aai o Sate  
Leki  
Iuta i Saute



Ulisses  
Soares

Idaho  
Amerika i  
Matu  
Tutotonu



Lynn G.  
Robbins

Amerika i  
Matu  
Sautesesae



Gerrit W.  
Gong

Amerika i  
Matu  
Matusasae



Juan A.  
Uceda

Amerika i  
Matu  
Sautesisifo



Patrick  
Kearon

Amerika i  
Matu  
Matusisifo  
Amerika i  
Matu Sisifo

### Aferika i Sautesesae



S. Mark  
Palmer



Kevin S.  
Hamilton



Joni L.  
Koch

Fesoasoani  
Muamua

### Aferika i Sisifo



Marcus B.  
Nash

Fesoasoani  
Muamua



Terence M.  
Vinson

Peresitene



Larry S.  
Kacher

Fesoasoani  
Lua

### Asia



David F.  
Evans

Fesoasoani  
Muamua



Randy D.  
Funk

Peresitene



Peter F.  
Meurs

Fesoasoani  
Lua

<p><b>Asia i Matu</b></p>    <p>Kazuhiko Yamashita Fesoasoani Muamua</p> <p>Robert C. Gay Peresitene</p> <p>Yoon Hwan Choi Fesoasoani Lua</p>	<p><b>Pasila</b></p>    <p>W. Mark Bassett Fesoasoani Muamua</p> <p>Marcos A. Aidukaitis Peresitene</p> <p>Joaquin E. Costa Fesoasoani Lua</p>	<p><b>Keripiane</b></p>    <p>Claudio D. Zivic Fesoasoani Muamua</p> <p>Walter F. González Peresitene</p> <p>Jose L. Alonso Fesoasoani Lua</p>
<p><b>Amerika Tutotonu</b></p>    <p>Jorge F. Zeballos Fesoasoani Muamua</p> <p>Adrián Ochoa Peresitene</p> <p>Valeri V. Cordón Fesoasoani Lua</p>	<p><b>Europa</b></p>    <p>Gary B. Sabin Fesoasoani Muamua</p> <p>Paul V. Johnson Peresitene</p> <p>Massimo De Feo Fesoasoani Lua</p>	<p><b>Europa i Sasae</b></p>    <p>Christoffel Golden Fesoasoani Muamua</p> <p>James B. Martino Peresitene</p> <p>Alexey V. Samaykin* Fesoasoani Lua</p>
<p><b>Mekisiko</b></p>    <p>Arnulfo Valenzuela Fesoasoani Muamua</p> <p>Paul B. Pieper Peresitene</p> <p>Rafael E. Pino Fesoasoani Lua</p>	<p><b>Sasae Tutotonu/ Aferika i Matu</b></p>   <p>Wilford W. Andersen Faatautaia mai le laumua o le Eklesia</p> <p>Anthony D. Perkins</p>	<p><b>Pasefika</b></p>    <p>Craig A. Cardon Fesoasoani Muamua</p> <p>O. Vincent Haleck Peresitene</p> <p>Ian S. Ardern Fesoasoani Lua</p>
<p><b>Filipaina</b></p>    <p>Allen D. Haynie Fesoasoani Muamua</p> <p>Shayne M. Bowen Peresitene</p> <p>Evan A. Schmutz Fesoasoani Lua</p>	<p><b>Amerika i Saute Matusisifo</b></p>    <p>Enrique R. Falabella Fesoasoani Muamua</p> <p>Carlos A. Godoy Peresitene</p> <p>Hugo Montoya Fesoasoani Lua</p>	<p><b>Amerika i Saute Saute</b></p>    <p>Allan F. Packer Fesoasoani Muamua</p> <p>José A. Teixeira Peresitene</p> <p>Mark A. Bragg Fesoasoani Lua</p>

\*Fitugafulu Eria

# O UATI

Saunia e Christy Rusch Banz

*O le Agaga Paia e tai pei lava o uati ia sa matua faagaeetia ai lava lau tama tama.*

Ina ua pe a ma le lua tausaga le matua o la'u tama, o Iosua, sa ia atiaeina se fiafia tele i uati. A matou ui ane i se uati i le fale, sa ia manao e taofi ma vaai i ai. E faapitoa lava lona fiafia e tuu lona taliga latalata atu i le uati ma faalogologo i le tata mai o lona leo. Sa ia oo i se tulaga lea ua le mafai ai ona matou ui ane i se uati e aunoa ma le tu atu e faalogologo i lona tata mai.

Sa ou iloaina nisi o mea mataina mai lena gaoioiga faigofie. Muamua, e tata lava le uati i taimi uma, e le seiloga o taimi matou te gauai atu i ai. Lona lua, e ui lava ina sa matou iloaina o le uati na faia se leo, sa tatau ona matou faalatalata atu i ai ma ia matua filemu lava ma aua le minoi ina ia mafai ona faalo-goina le tata filemu.

O le Agaga Paia e tai pei lava o uati ia sa matua faagaeetia ai la'u tama tama. O nisi o i tatou ua papatisoina ma mauaina le meaalofa o le Agaga Paia e mafai ona mauaina Lana mafutaga faifaipea pe afai tatou te ola agavaa mo ia. E i ai pea le Agaga Paia faatasi ma i tatou,

ae o nisi taimi tatou te faatagaina ai le pisapisao o le lalolagi e taomia ai ia musumusuga filemu Na te tuuina mai ia i tatou. E pei lava ona tatau ai ona ma saō ma filemu ma la'u tama ina ia faalogologo i le tata lemu o le uati, e tatau ia i tatou taitoatasai ona fifilemu ia mafai ai ona faalogo, pe lagona, le uunaiga filemu e tuuina mai e le Agaga.

Na saunoa mai Peresitene Boyd K. Packer (1924–2015), Peresitene o le Korama a Apostolo e Toasefululua, faapea: “O le leo o le Agaga o loo faa-matalaina i le mau, e le o se ‘leo sau’ pe ‘leotele.’ E ‘le o se leo o le faititili,

po o . . . [se] leo o le pisapisao tele.’ Ae, ‘o se siufogaga filemu o le toafimarie atoatoa, sa peiseai o se musumusu,’ ma na ia mafai ona ‘ma sa ati e oo atu i totonu lava o le agaga’ ma ‘sa mu ai [le lotol]’ (3 Nifae 11:3; Helamana 5:30; MF&F 85:6–7). . . .

“E le mafai ona maua e le Agaga,” Na aoao mai ai Peresitene Packer, “Io tatou gauai atu i le feei po o le luluina o i tatou i se lima mamafa. Ae e musumusu mai. E pa’i mai ma le malū, ioe, afai o pisi i tatou, o le a lē mafai lava ona tatou lagonaina. . . .

“E masani lava o le a ia faamamafa mai tau lava ina ia mafai ai ona tatou faalogo atu. Ae o le tele lava o taimi, afai tatou te le faalogo i le lagona malu, o le a aluese le Agaga ma faa-tali sei tatou o mai e saili ma faalogo”

(“O Le Lamepa a le Alii,” *Liahona*, Tes. 1988, 33).

O lenei, soo se taimi lava ou te faalogo ai i le tata malu mai o se uati, e le mafai ona ou tatalia ae manatua le lesona faigofie sa aoao-inia ai a'u e la'u tama tama e uiga i le fifilemu e faalogo ai i uunaiga filemu a le Agaga. ■

*E alaala le tusitala i Iuta, ISA.*



# O LE POPOLE O LE ALII MO I TATOU

Saunia e Paige Anderson

*I le mafaufau i tua i le taimi na avea ai lo'u aiga ma taulaiga a aufono a le uarota, sa ou iloa ai sa le avea i matou na o se popolega a le uarota—sa popole le Alii mo i matou.*

Ina ua fesili mai lau epikopo pe ou te taliaina se valaauga e avea ma peresitene o Tamaitai Talavou, sa ou manao e fai atu leai. Sa ou lagonaina lou le agavaa e pulefaamalumalu i tamaitai talavou. Ae ina ua mavae le tolu masina ina ua uma ona ou taliaina, sa nutimomoia lou fatu i le iloaina o le a suia tuaoi o le matou uarota ma o le a faamaloloina au.

Sa ou tatalo ia iloa pe aisea na faatagaina ai e le Alii au e oo i le alofa i

faaleoina atu lou popolega, peitai, na tau mai e le Agaga ia te au e faapea e popole le Tama Faalelagi e uiga i Ana fanau uma lava.

I ni nai tausaga ua mavae atu sa avea ai i maua ma lou toalua ma taulaiga o le aufono a le uarota, ma sa ma iloaina. Sa ou toe foi mai ma toaga mai ina ua fanau le ma tama muamua, ae e lei sau lou toalua. Mo ni tausaga, na taumafai au peresitene o siteki, au epikopo, ma



"O auaunaga alofa ma le gauai atu i manaoga o isi atonu o le uiga aupito sili lea o le soifuaga faaletino o le Faaola. O le a avea pea ma faailoga o soo o le Matai."

Elder Jeffrey R. Holland, "O Mea Ou Te Manao ia Ilo Uma e Tagata Fou o le Ekalesia—ma ia Manatua e Tagata ua Leva I le Ekalesia," *Liahona*, Oke. 2006, 10.

matagofie na faamauina ai lo matou aiga i le malumalu.

Faatoa ou maua se malamalama faaleagaga ina ua valaauna au o se peresitene o Tamaitai Talavou ma maua ai le avanoa e auuauna atu i se aufono a le uarota, i le uiga o le avea ma taulaiga o se aufono a le uarota. Sa ou aoaoina o aufono a uarota e taulai atu i ni tagata patino e le faapea ona sa latou popole e faatatau i ni fuainumera, ae ona o i latou, ma le Alii, e popole e uiga i tagata taitoatas. Pe a tatou auauna atu i o tatou valaauga, e faatumuina e le Alii i tatou i Lona alofa mo i latou tatou te auauna atu i ai.

I le mafaufau atu i tua i le taimi ao avea lou aiga ma taulaiga a aufono a le uarota, sa ou iloaina ai sa le gata sa popole le *uarota* mo i matou—ae sa popole *le Alii* mo i matou. Sa latou popole mo i matou ona sa popole o Ia mo i tatou.

O le mea moni, e popole le Alii mo i tatou uma lava. Ona o le alofa, ua Ia mamanuina ai se fuafuaga e faamalolosia ai i tatou ma, pe a tatau ai, uunaia ai i tatou—o se fuafuaga e masani ona faataunuina e ni tagata e pei o le epikopo ma le faiaoga o aiga ia na fesoasoani i lou toalua. ■

*E alaala le tusitala i Iuta, ISA.*



tamaitai talavou ae na ona toe faatofa vave atu lava. Na oo mai lau tali e lei mafaufauina i le taimi o se fonotaga a le aufono a le uarota.

Na fesiligia sui o le aufono e faasoa atu ni tala i le konafesi a le siteki e uiga i le fesoasoani atu i tagata o le matou uarota, ae sa ou popole nei manatu ai nisi tagata ua pei i latou o ni galuega faatino a le uarota. Ina ua uma ona ou


faiaoga o aiga e fesoasoani ia i matou.

Ona matou siitia atu lea i se uarota fou. Sa avea se epikopo onosai ma agaalofa faapea ma se faiaoga o aiga ma ni uo a lau tane. O le taimi lena na talia ai e lou toalua le Agaga. Sa uunaia o ia e faitau i le Tusi a Mamona, ma sa amata ona ia alu i le lotu. Sa faifalemu lava ona ia mauaina se molimau. O le a ou le faagaloina lava le aso



Saunia e Elder  
Terence M.  
Vinson  
O Le Fitugafulu

# O Le Faamanuiaina o I LATOU O E Ua le Toaaga Mai



**T**atou te iloa ai le tele o upumoni matagofie o le olaga e ala i o tatou mafaufauga faaleagaga ae le o tatou mafaufauga faaletino. O le mea moni, e tele mea taua—e aofia ai mea e faavavau—e mafai ona lagonaina ae le vaaia.

Na aoao atu e le Apostolo o Paulo lenei matapu faavae i le Au Paia i Korinito: “O loo matou le manatunatu i mea ua vaaia, a o mea e le vaaia: aua o mea e vaaia e gata mai ia; a o mea e le vaaia e faavavau ia” (2 Korinito 4:18).

O le alofa e aoaoina ma lagonaina muamua lava e ala i sane faaleagaga. E faapena foi, o le agaalofa, faauoga, onosai, ma le faatuatua o fua ia o le Agaga (tagai i le Kalatia 5:22). E faa-aoga e le Tama Faalelagi nei lagona o le Agaga e faamanuia ai Ana fanau, e aofia ai i latou o e ua se ese.

Sa ou ola i le tele o lou olaga i le

*A o tatou ola ai i le  
mafutaga ma le Agaga  
ma saili le fesoasoani  
a le Alii, o le a Ia  
faamanuiaina a  
tatou taumafaiga e toe  
aumai Ana mamoe na  
leiloloa i le lafu.*

Eria o le Pasefika. E toatele tagata o le Pasefika e i ai se malamalama loloto i le taua o mea e le vaaia na faamatalaina e Paulo, ma o le toatele e manino lava le faamuamuaina o mea faale-agaga i manaoga faaletino.

O lenei eria o le Eklesia e eseese lava, i atunuutatiina ae ma le atamai, e pei o Ausetalia ma Niu Sila, faapea foi ma atunuut e faifaatoaga ma fagogota, e pei o Toga ma Samoa, lea

e maualuga ai le faitau aofai o tagata e suitulaga i le Eklesia. Ona i ai lea o atunuutauatiina ae, e pei o Papua Niu Kini ma le Atu Solomona, lea e fetaiai ai tagata ma luitau iloga.

O lenei eseesege ua maua ai ni avanoa e aoao ai.

## Le Faanatinati e Asiasi atu i Tagata le Toaaga

E tulaga ese se tasi o ia aafiaga e aoao ai. I le avea ai o se Fitugafulu Eria, na tofia au e pulefaamalumalu i se konafesi faalesiteki i Niu Sila. Na o ni nai masina i luma atu, na tuuina mai ai e Peresitene Thomas S. Monson se lauga mamana lava i Fitugafulu uma o le lalolagi. O lana lauga na taulai atu i le laveaiina o i latou o e ua see ese atu mai sauniga o le talalelei.

O se taunuuga o le saunoaga a Peresitene Monson ma le luitau talafeagai na ia tuuina mai ia i matou,



ATA NA TUSIA E BRIAN CALL

sa ou lagonaina ai se faanatinati e asiasi atu ma valaaulia i latou e le o auai atoatoa i le talalelei ina ia toe foi mai i feagaiga ma sauniga o le faaolataga. Sa ou valaaulia peresitene o siteki ia aveina atu au faatasi ma i latou i le taimi o konafesi a siteki i faaiuga o vaiaso e asiasi atu i tagata ua le toaaga mai. O na asiasiga sa ofoofovogia i taimi uma lava.

I se tasi Aso Toonai i le taimi o le konafesi i le faaiuga o le vaiaso, na matou asia ai ma le peresitene o le siteki ni nai aiga. O le tane ma le ava o se tasi o nei aiga sa faaipoipo pe tusa ma le 10 tausaga ma na faamauina i le malumalu ae o lenei ua le toe toaaga mai. Sa latou faafeiloaia i matou ma le alofa, ma sa matou maua se mafutaga faaleagaga. A o faaiuina le asiasiga, sa ou lagonaina le musuia e fai atu i le tane pe fia manao i se faamanuiaga ona fesili atu ai lea ia te ia e tuuina atu i lona toalua se faamanuiaga.

O se uunaiga e le masani ai lenei. Sa aoaoina au faapea i le avea ai o se malo faaaloalogia i le fale o se tasi, e tatau ona ou aveina se matafaioi e maualalo ifo ma o le ulu o le aiga o le tagata lea e faia le faaiuga i le mea e fai. O lenei uso, e ui i lea, sa loto faafetai mo le ofoina atu o se faamanuiaga, ma sa manino lava lona faagaeetia ina ua mavae lo ma faamanuiaina o ia ma le peresitene o le siteki.

A o tulai ae o ia, e ui i lea, sa ia fesili mai pe mafai e se tasi o i matou ona faamanuiaina lona faletua. Sa ia tau mai ia i matou e faapea, e ui lava na faaipoipo mo le 10 tausaga, na te lei tuuina atu lava ia te ia se faamanuiaga ma sa leai se lagona lelei i le faia o lena mea.

“O le a matou fesoasoani ia te oe,” sa ou fai atu ai, e faamalosiau ia te ia.

Ina ua uma ona matou faamalamalama ia te ia pe faapea ona tuuina atu se faamanuiaga ma fesoasoani ia te ia e toe tau upu e fai atu i le amataga ma le faaiuga, sa ia tuuina atu i lona toalua se faamanuiaga matagofie. Ina ua ia faamaeaina, sa maligi uma o matou loimata ma sa ia taliaina ma lona toalua la matou valaaulia e toe foi mai i le talalelei.

O se taunuuga o lenei aafiaga mafanafana, sa musuia le peresitene o le siteki i le taimi o lana saunoaga i tagata o le siteki i le aso na sosoo ai e luitauina le au perisitua e toe foi atu i le fale pe a mavae le konafesi a le siteki, ma tuuina atu ni faamanuiaga i tagata o le aiga.

### **Na Uunaia e Faamanua**

A o faaiuina lena sauniga o le Aso Sa o le konafesi a le siteki, sa ou lagonaina se isi uunaiga—o le taimi lea ia agai atu i se tuafafine talavou o le sa saofai i le pe a ma le laina lona 10 mai le pito i luma o le falesa ma fai i ai pe na te manaomia se faamanuiaga. Ou te le masani ia te ia, ae sa malosi lava le uunaiga.

I le faateia tele, sa fai mai le tuafafine ma le faalotolotolu, “Leai, faafetai.”

Sa fai si ou lotofaaftai teisi mo lana tali, ae sa ou lagonaina faapea sa ou faia e pei ona sa faatonuina ai e le Agaga. Sa ou toe foi atu i le pito i luma o le falesa e faafeiloai tagata o le Ekalesia ae faafuasei lava ona sau i luma lenei tamaitai talavou lava lea e tasi ma fesili mai pe sa ou naunau pea e tuu atu ia te ia se faamanuiaga. Sa ou fai atu ia te ia “Ioe” ma fautuina o ia e susu atu i le ofisa o le peresitene o le siteki, lea o le a vave lava ona matou faatasi ai ma ia.

A o ma agai atu ma le peresitene o le siteki i lona ofisa, sa ou fesili atu e uiga ia te ia. Sa ia faamatala mai faapea o le faatoa toe foi mai o ia i le lotu ina ua mavae le 10 tausaga e lei toe auai mai. O loo nofo na o ia, ae i le taimi o lona 10 tausaga sa ia ola ai i se olaga e feteenai ma tulaga faatonuina o le talalelei.

Ae lei faia le faamanuiaga, na faamatala mai e lenei tuaafine talavou ia i matou ona lagona o le le agavaa. I lona taimi na aluese ai mai le Ekalesia, sa ia fai mai, sa ia na ona faia lava o mea sa ia manao i ai e aunoa ma se mafaufau i mea faaleagaga. Na ia maua talu mai lena taimi le toe fiafia i le talalelei, ae na ia lagonaina ua ia see mamao atu lava i tua i lona atinaega faaleagaga o lea na leai ai sona



*O le aufaigaluega sa tuai ona ulu atu i le tovine o le a maua le taui lava e tasi e pei o i latou o e ua leva ona galulue ai.*

faamoemoe mo le toe mauaina o lona malosi faaleagaga.

Na matou aoaoina o ia faapea o le au faigaluega na tuai ona ulu atu i le tovine—ma i latou e toe foi atu i le tovine ina ua mavae ona tuua mo se taimi—o le a mauaina le tau lava e tasi e pei o i latou o e ua leva ona galulue iina (tagai i le Mataio 20:1-16). Ona matou tuuina atu lea ia te ia se faamanuiaga faaleperisitu.

I le avea ai ma le na tuuina atu lena faamanuiaga, sa lofituina au i le sasaa mai o le alofa sa ou lagonaina na i ai i le Alii mo ia. O se lagona sa sili atu ona mamana ou te lei lagonaina i se isi lava taimi muamua—lea na ou iloa ai sa ou i ai faatasi ma se agaga e faapitoa lava le tamalii. Ina ua uma le faamanuiaga, na tulai le tuafafine mai le nofoa. Sa tafe mai ni laina se lua lanu uliuli o le vali mai lalo o ona mata. Na maligi foi ou loimata.

Sa faatagaina au e le Alii e vaai atu i lenei tamaitai talavou tulaga ese sa i ai i tulaga amata o se faagasologa lea e tatau ona oo ia i tatou uma ina ia ausia ai lo tatou gafatia atoatoa iinei i le lalolagi. Pe a tatou se ese faaleagaga mai lo tatou ala ma pe a tatou faia le agasala, e tatau ona tatou faamaualalo uma i tatou lava ma salamo.

E pei ona aoao atu e le Aposetolo o Paulo i Kalatia, o le olaga lenei o le taimi mo le agaga e faatoilalo ai le tino. “Aua o le tino ua tuinananau lea e tetee atu i le Agaga, ua tuinananau foi le Agaga e tetee atu i le tino: ua feteenai foi ia mea: o le mea lea tou te le fai ai mea tou te loto i ai” (Kalatia 5:17).

Pe tatou te mauaina lo tatou malosiaga e faalagolago lea pe a pulea e o tatou agaga o tatou tino, pe a tatou manumalo i le “tagata natura” (Mosaea 3:19). I le lalolagi o aso nei, e toatele e foliga mai e le fia tauina lenei taua. Ua pulea o latou olaga e tuinananau o le tino, ma ua faatoilalo e le tino o latou agaga.

O lenei tamaitai talavou sa i luga o se ala lea e mafai ai ona faatoilalo e lona agaga le tino. Na ia amataina se tauvaga sa ia naunau e manumalo ai.

### “Savavali i la le Agaga”

Ina ua ou tuua le siteki i lena aso, sa ou fesili atu i le peresitene o le siteki e tuuina mai ia te au faamatalaga e faafesootai ai i latou sa ou feiloai i ai i lena faaiuga o le vaiaso ina ia mafai ona ou fautuaina i latou e faaau- au pea i le ala o le talalelei ma ia manatua tautinoga sa latou faia.



O le tamaitai talavou na faaauau pea ona alualu i luma ma na televave lona faia o lena mea. E ala i lona faatuatua, sa ia amata ona “savavali i la le Agaga” ma “ola i le Agaga” (Kalatia 5:16, 25). Sa ia fesootai mai pea ma tauina mai ia te au e uiga i luitau taua sa ia manumalo ai ma na oo i ai talu mai lena taimi. Ua avea o ia ma se uo mamae i lo matou aiga, ma ua matou vaaia le malosi o lona agaga a o ia faalatalata atu i le Faaola.

O lenei ua olioli o ia i faamanuiaga o le malumalu, ua auauna atu o se tagata faigaluega o le malumalu, ma e susulu mai ai meaalofa faaleagaga o le alofa mama ma le agalelei. Ua ia faaipoipo atu i se alii talavou agavaa i le malumalu talu mai lena taimi.

Ua manino lava le faatoilaloina e le faaleagaga o le faaletino i lenei tamaitai talavou. Ua matou vaaia lona loto ua mama, ma ua ia “le toe iai se manao e fai mea leaga, ae ia faia mea lelei e le aunoa” (Mosaea 5:2).

Atonu o le silafia e le Alii o le tamaitai i lona agaga le mafuaaga o le uunaiga sa ou mauaina i lena aso. O lena uunaiga ua faamanuiaina au e vaai ai i le mana ma le alofa tunoa o le Tama Faalelagi ua faaalia mai i lona olaga.

Ua ia i tatou uma se tiutetauave ina ia fesoasoani i o tatou uso ma tuafafine ua le toaaga mai, ma e mafai ona uunaiga i tatou uma lava i auala e faamanuiaina ai i latou. A o tatou ola ai i le mafutaga ma le Agaga ma saili le fesoasoani a le Alii, o le a Ia faamanuiaina a tatou tau-mafaiga i le “e toe aumai i latou” (“Pele i le leoleo mamoe,” viiga, no. 135; tagai foi i le Alema 26:4). ■



**30%**

FAAMAUMAUGA  
I LE INITONETI o  
**PONOKALAFI.**

O ponokalafi o se pisinisi e

**\$97 PILIONA.**

A faatususa, o le  
**TUUFAATASIGA** o tupo  
maua i taaloga liki e  
10-pito i luga i Amerika i  
Matu, Europa, ma Asia e

**\$45.8 PILIONA.**

**136 PILIONA 0** viti faaponokalafi na maimoaina i luga o telefoni poto i le 2015.



# Fesoasoani i Tamaiti e Teena ai Ponokalafi

Saunia e Lisa Ann Thomson

**E**mafai ona lofituina matua i faitauga faafuainumera. Ua fuafuaina e le Extremetech.com e faapea pe tusa ma le 30 pasene o faamatalaga uma e sii atu i luga o le Initoneti o ponokalafi.<sup>1</sup> O loo maua moni lava i le faitau selau miliona o itulau o le uepi, e aofia ai ala o faasalalauga faaleagafesootai maoae o le Facebook, Twitter, ma le YouTube. E faigofie ona maua e ala mai i le televise, komepiuta, tapeleti, ma telefoni poto.

“O mea e vaai i ai se tamaitiiti e matuai faaleagaina ai lava le faiai mu’amu’a ma le augapēpē o se tamaitiiti,” ua faailoa mai e le fomai faapitoa o Dr. Jill C. Manning, o se faiaoga masani i le aafiaga o ponokalafi i le faaipoipoga ma le aiga.

Ae o loo i ai le faamoemoe.

E ui lava e foliga mai ua i ai le ponokalafi i soo se nofoaga, ua i ai i matua le malosi e puipuia ai a latou fanau ma saunia i latou e fetaiai ma tetee atu i ponokalafi.

O ni auala nei e valu mai taitai o le Ekalesia ma ni tagata tomai faapitoa e fesoasoani i matua e puipuia ai o latou aiga.

## 1. Taulima ia Auala o Maua Mai ai ma Tulafono Faaleaiga

Amata i puipuiga i fafo atu. “Tatou te puipuia a tatou fanau seia oo i le taimi e mafai ai ona latou puipuia i latou lava,” o le tala lea a Jason S. Carroll, o le



polofesa o le olaga faaleaiga i le Iunivesite o Polika Iaga. O le pogati o le faiai, lea o loo i ai fiafiaga autu o le faiai, e muamua lava ona tupu, ua ia faamatalaina

mai. E faatoa mulimuli ane ona atoatoa le tupu o le vaega i luma e faia faaiuga ma malosiaga e faia ai faaiuga. “O lea la, ua i ai i tamaiti le vae penisini e aunoa ma le vae taofi atoa,” o lana tala lea. O le mea lea, ua matua taua ai le faamamaina i fafo ma le mataituna mo tagata talavou.

O laasaga ma tulafono faigofie e mafai ona pui-puiua tamaiti (ma tagata matutua) mai le vaaia ae lei mafaufauna [o ponokalafi] ma fesoasoani ia i latou e mafaufa ma le faaeteete e uiga i le mea ua latou filifili e matamata ai:

- Faaaoga faamama i le komepiuta, i le initoneti, ma polokalama e maua mai le auaunaga a le Initoneti.
- Ia fai ni tapulaa faamatua ma le anotusi e ala i le satellite ma tautua o ala faasalalau i le Initoneti.
- Faatulaga le tulaga faatapulaa o anotusi i luga o masini feaveai.
- Tuu komepiuta ma tapeleti i eria faitele.
- Fai atu i tamaiti ma le tupulaga talavou e aumai ia te oe a latou telefoni ma masini feaveai i le po.
- Ia faatulaga se aiaiga faavae o le tusi tatala; e mafai e matua ona maimoa i tusiga ma faitotoa o ala faasalalau faaagafesootai i soo se taimi.

## AOAO ATU LE FANAU i mea e fai pe a latou feagai ma **PONOKALAFI:**

- Moeiini o latou mata.
- Tape le masini.
- Ta'u i se tagata matua.
- Toe faasao o latou mafaufau.

### O ALA O FAASA- LALAUGA FAALEAGA- FESOOTAI

o tagata e  
faaaogaina  
le initonet  
i le salafa o  
atunuu e 40  
e faaaoga-  
ina ala o  
faasalalauga  
faaleaga-  
fesootai.

• ◆ ◆ ◆



**76%**

ua avea  
ma saite e  
matuai tele  
ai lava le  
faafesuaiga  
o ponokalafi.  
◆ ◆ ◆

Aoao atu i fanau po o le a le mea e fai pe afai latou te fetaiai ma ponokalafi: (1) moeiini o latou mata ma tape le masini, (2) tau atu i se tagata matua, ma le (3) toe faatonutonu o latou mafaufau. Faamautinoa atu i latou faapea latou te lei faia se mea sese ma e le o se faafitauli.

### 2. Talai Atu Keriso

“O faamama o ni meafaigaluega aoga, ae o le faamama silisili i le lalolagi, ma e na o le pau lea o le mea o le a iu ina aoga, o le faamama lea e i totonusi o le tagata lava ia lea e oo mai i se molimau loloto ma tumau i le alofa o lo tatou Tama Faalelagi ma le taulaga togiola a lo tatou Faaola mo i tatou taitoatasii,” na saunoa ai Linda S. Reeves, o le Fesoasoani Lua i le Au Peresitene Sili Aoao o le Aualofa.<sup>2</sup>

Ina ia fesoasoani i fanau e atiina ae lena faamama i totonusi, ua faasino mai e Sister Reeves le fautuaga a Nifae, “Ua matou tautalatala e uiga ia Keriso, ua matou olioli ia Keriso, ua matou talai atu Keriso, ua matou vavalou atu ia Keriso . . . ina ia mafai ona iloa e a matou fanau po o le a le puna e mafai ona latou tepa taulai i ai mo se faamalogia o a latou agasala.” (2 Nifae 25:26).

E ioe i ai tagata popoto. Ua faamonia mai e suesuega o talitonuga ma amioga faalelotu i le fale, faatasi ai ma se “amioga faamatua alofa,” e i ai se aafiaiga mo le puipuiga e faasaga i ponokalafi.<sup>3</sup>

“O le ala sili o le puipuiga ma le ala sili mo le toe faaleleia mo ponokalafi o le aoaoina moni o le talalelei i le aiga,” o le tala lea a Timothy Rarick, o

le polofesa mo le tulaga faamatua i le Iunivesite o Polika Iaga-Idaho ma o le sui o le fono faufautua o le United Families International. “O le mea e sili e mafai ona tatou faia o le fesoasoani lea i a tatou fanau e faatulaga la latou lava fesootaiga ma le lagii.”

### 3. Aoao Atu Fanau I Auala e Faamama ai Totonu

E mafai ona aoao e matua auala faapitoa mo le faamamaina o ala o faasalalauga e ala i tulaga faatonuina o le talalelei. Mo Dr. Manning, o le mataupu faavae o le faatuatua lona sefulutolu o le faamama sili lea mo filifiliga uma o ala o faasalalauga.

“Matou te talitonu i le faamaoni, amiotonu, nofomama, agalelei, amiomama, ma le faia o mea lelei i tagata uma; . . . Afai o i ai nisi mea e mama, matagofie, pe logoleleia pe tauleleia, matou te saili atu i nei mea’ [Mataupu Faavae o le Faatuatua 1:13]. O loo i ai le tele o anomea i aso e gata ai e le ogatusa ma lena faatulagaga. Ma afai o le a tatou maua se mea e le ogatusa ma na mataupu faavae, e tatau ona faaauau pea ona tatou vaavaai solo,” o le tala lea a Dr. Manning.

Ae o le taumafaiga lena e tulaga ese ai le Au Paia o Aso e Gata Ai, na saunoa ai Peresitene Thomas S. Monson: “A o agai mamao ese pea lava pea le lalolagi mai mataupu faavae ma taiala na tuuina mai ia i tatou e se Tama Faalelagi alofa, o le a tatou tumatilatila ese mai le motu o tagata. . . . O le a ese i tatou pe a tatou filifili e lē faatumuina o tatou mafaufau i filifiliga o aga fesootai na e faataumaoi ma lē faaalaloalo ma o le a tuliese le Agaga mai o tatou aiga ma o tatou olaga.”<sup>4</sup>



#### 4. Aoao Atu Feusuiga Mama i Fanau

O le matapu faavae o le "faafeagai o mea uma" (2 Nifae 2:11) e faatatau i ponokalafi. E le lava le faailogaina o ponokalafi faapea e leaga; e manaomia foi e matua ona aoao a latou fanau po o a mea e lelei.

"O se tasi o talita ma puipuiga e aupito sili ona mamana mo o tatou tagata talavou o le amata aoaoina vave, lea o i latou i tulaga feusuai i le aiga," o le saunoaga lea a Dr. Manning. "O loo mafatia a tatou talavou ona o loo latou tutupu ae i se siosiomaga ua faatumulia i savali palapala ae itiiti lava ni savali lelei mai i totonus o le talalelei."

Ua fautuina mai e le polofesa o le olaga faaleaiga o le Iunivesite o Polika Iaga o Mark H. Butler se faamalamalamaga tuusao faapea: "O le taamilosaga o le tali-atu-i-feusuiga o loo i ai lava i totonus o i tatou o ni tagata soifua. O le naunau ma le manao o ia i tatou o se mealofa na tuuina mai e le Atua lea e faamanuiaina ai i tatou, e tosina atu ai lava i tatou ma le alofa i le isi itupa, agai i le faaipoipoga, ma agai atu i le olaga faaleaiga."

E mafai ona vave amata talanoaga e uiga i feusuiga mama i le vaitausaga talafeagai. Ua faailoa mai e Polofesa Carroll faapea o talanoaga e uiga i le fepaiai talafeagai ma

le fepaiai e le talafeagai  
ma le tulaga patino  
faaletagata lava ia,

faatasi ai ma le faaupuga sao mo vaega o le tino, e mafai ona aoaoina e amata i se taimi ao laitiiti lava. E oo atu i le valu tausaga, ua mafai e se tamaitiiti ona maua se malamalamaga autu i feusuiga i ona tulaga faaletino, faaleagaga, faalelagona, ma faalefesootaiga, o lana tala lea.

E talisapaia foi e le autalavou le gagana sa'o ma tuusao. Sa fai mai se tasi alii talavou, "Afai e faataamilomilo au faamatalaga, e mafai ona faaseseina ai le malamalamaga o tagata. Pe faasefulu lua ni taimi na aoaoina ai a'u e uiga i le tulafono ae faatoa ou iloaina sa latou talanoa e uiga i feusuiga."

Ua faapea mai polofesa Carroll e tatau foi i matua ona gauai atu i le anotusi o nei talanoaga. "Fai mea uma e mafai ina ia le avea ai nei talanoaga o ni talanoaga aloaia," o lana tala lea. "Ma te ave le ma tamaitiiti mo se taumafataga o le afiafi, fai a matou ofu lotu, pe fai le matou talanoaga i le pakaga taavale o le malumalu," o lana tala lea. Ae afai e faapea fanau o le savali e uiga i feusuiga faatoa mafai ona faia i lalo o na tulaga, atonu o le a le mafai ona latou iloa le auala e toe fatuina ai ia tulaga pe a i ai ni a latou fesili.

Nai lo lena, e tatau i matua ona fatuina se talanoaga fai-fai pea ma avanoa mo tamaiti e fai ai ni fesili i soo se taimi lava e i ai ni a latou fesili. "Afai e tupu se talanoaga i luga o le fola o lou potumoe po o totonus o lau loli pikiapu po o fafo ao tauina fua o vine, latou te iloa pe



*Matamata i se vitio o tamaiti ua faamatala atu ai pe faapefea ona tumau i le saogalemu mai ponokalafi i le*

**lds.org/go/81722.**



Pe a talanoaina ia faafitauli, faia se **ILOILOGA TALAFEAGAI:**



**O le a le umi talu ona tupu?**

faapefea ona toe foi atu i ai,” o le tala lea a Carroll.

“O lou aafiaga ua aoaoina ai au faapea o tupulaga talavou o e ua sili ona aafia i feusuaiga e masani lava o i latou na e aupito itiiti le aoaoina,” o le faailoa mai lea a le polofesa o le BYU o Bradley R. Wilcox. “O tagata talavou o e e maua tali mai matua ao laiti o latou olaga e masani lava o i latou ia e aloese mai le faataitaia o gaoioiga faafeusuaga.”

## 5. Aveese Malamalamaaga Sese o Ponokalafi

Sa taua manino e Peresitene Gordon B. Hinckley (1910–2008) le upumoni e uiga i ponokalafi.

“E matautia,” na ia saunoa mai ai. “E inosia ma eleelea. E faatosina ma e avea ma mausa. O le a tosoina [oe] i lalo i le faatafunaga e mautinoa lava e pei lava o soo se mea i lenei lalolagi. O ni mea mataga e mafai ai ona milionea i latou e faia, ae matitiva ai i latou e matamata i ai.”<sup>5</sup>

“O le faaaogaina o ponokalafi e tamaiti talavou ma talavou matutua e tele lava ina taitai atu ai i se vaaina mataga i tulaga tau feusuaiga ma lana matafaioi i le uunaia o ni sootaga mama faaletagata lava ia,” ua faailoa mai e le American College of Pediatricians. “O nei manatu mataga e aofia ai le malamalama sese i le tulaga faifaipea o feusuaiga i le lotoifale, o le talitonuga o feusuaiga i le tele o paaga o se mea masani, ma le talitonuga faapea o le aloese mai feusuaiga o se mea leaga.”<sup>6</sup>

I talanoaga e uiga i ponokalafi, e tatau i matua ona faailoa atu o ponokalafi o ni ata fatu i tulaga uma. O amioga e faaalia i ponokalafi e masani lava e le o se tulaga masani po o se ataata o mea e tatau ona faatinoina pe faamoemoeina i se sootaga mama. “O ponokalafi e faatoa matagofie lava pe a tatou taliaina ponokalafi o ni ata fatu,” o le tala lea a Polofesa Carroll.





## 6. Sui le Talanoaga e Uiga i le Faafitauli

Ua lapatai mai tagata tomai faapitoa ma taitai o le Ekalesia e faatatau i le vave ona faia o se faaiuga e faapea o soo se aafiaga lava i ponokalafi o se faailoga mautinoa lea o se vaisu.

“E le o tagata uma o faaaogaina ma le loto i ai ia ponokalafi o loo aveaina ma se vaisu,” o le faailoa mai lea a Elder Dallin H. Oaks o le Korama a Apostolo e Toasefululua. “O le mea moni, o le tele o alii ma tamaitai talavou o loo tauivi ma ponokalafi e le o aveaina ma se vaisu. O se eseesege taua tele lena ia faia—e le mo na o matua, taitoalua, ma taitai o e ua mananao e fesoasoani, ae faapea foi mo i latou o e tauivi ma lenei faafitauli.”<sup>7</sup>

“E aafia alii talavou ma tamaitai talavou i ponokalafi ona o le fialoa, o le faigofie ona maua, ma o le mea moni lava o le lava o le matua o le mafaufau,” o le tala lea a Polofesa Carroll. “E tofu uma lava i tatou ma ni aafiaga o le mana o le taamilosaga o le tali-atu-i-feusuaiga ia ua faaosofia i tau-saga talavou, a o lei taitai lava ona tatou lagonaina ni tulaga faatagata matua faalelagona po o le faale-agaga e malamalama atoatoa i ai.”

Ua iloaina e Richard Neitzel Holzapfel, o le polo-fesa o le BYU o talafaasolopito o le Ekalesia ma le faufautua i le kalapu a tamaiti aoga a le Unraveling Pornography, e faapea, “o le faafitauli e moni ma e i ai taunuuga matautia, ae o le soona faia o faamatalaga e uiga i le faafitauli e matele lava ina uunaia atili ai i totonus o agaga o i latou o loo tauivi.”

Ua taua e Elder Oaks faapea o faafitauli o ponokalafi e mafai ona faatulaga mai i le “seasea ona faaaogaina po o le faaaogaina soo ma le le manatu i ai, i le faateleina o le faaaogaina, i le soona faaaogaina (faavaisu). . . . Afai o loo sese le faatulagaina o le amioaga o se vaisu, atonu ua manatu le tagata o loo faaaogaina ua leai sona faitalia ma le gafatia e faatoilalo ai le faafitauli. . . . I se isi itu, o le mauaina o se malamalama e sili atu le manino i le loloto o se faafitauli—e faapea atonu e le o loloto tele e pei ona manatu i ai pe ua ogaoga e pei ona fefe i ai—e mafai ona tuuina atu le faamoemoe ma se malosi faateleina e faaaoga ai le faitalia e . . . salamo.”<sup>8</sup>

Pe a talanoaina faafitauli, ua fautuaina e Polofesa Butler matua ina ia faia se iloiologa sao: Po o le a le umi talu ona tupu? Pe faafia ona latou matamata i ai? O faapefea ona latou mauaina? Ona mafai lea e matua

Fatu se  
TALANOAGA  
FAIFAI PEA  
mo le fanau e  
fai ai ni fesili.

O LE  
TAUSALAINA  
o se tali masani i ni mea  
sese e mafai ona  
faaosofia ai suiga.



O LE  
MAASIASI  
o se lagona faataumaoi  
e mafai ona taitaiina  
atu ai i se lagona o le  
leai o se faamoemoe.

ona galulue faatasi ma le autalavou e iloilo ai se tulaga talafeagai o le faatinoga.

“Malamalama i le tagata ma po o ai i latou,” o le tala lea a Polofesa Holzapfel. “O le a le loloto o lo latou faafitauli? O le a le mea moni lava o loo tupu? O le a la latou mafuaaga mo le matamataina o ponokalafi, ma e mafai faapefea ona tatou faatautaia faafitauli e loloto atu?”

### 7. Aoao Atu le Puleaina o Lagona

O le taulimaina o faafitauli e loloto atu atonu foi e i ai le ki e taofia ai faafitauli o ponokalafi, o le tala lea a Nathan Acree, o se fomai faapitoa i Iuta. I tua atu o le fia iloa masani, e matele lava ina faaaogaina ponokalafi e avea ma auala e taulima ai lagona, aemaise lava lagona o le lofituina.”

Na faaopoopo mai Polofesa Butler, “I nisi taimi, e oo ai i se alii po o se tamaitai talavou se aafiaga e faigata po o se faanoanoaga faalemafaufau, faalefesootaiga, po o le faaleagaga.” Sa ia fai mai o aafiaga le lelei e mafai ona taitai atu ai le faiai o tamaiti talavou e toe foi atu i “aafiaga e maua ai lagona-lelei” e pei o le matamata i ponokalafi ma faatinoina amioga faapena e pei o le taaaalo i o latou itutino sa. O lagona e faaosofia mai i na amioga e suia ai loa pe pupuni ai lagona faanoanoa. Ma o iina ua taoto ai le tulaga lamatia: “O le a agai ese atu le tagata mai le aafiaga e maua ai-lagona-lelei i le amataina o se faalagolago faalemafaufau i na amioga. O lenei la ua ia faaaogaina lena amioga o se auala e faatautaia ai le olaga.”

Ua saunoa mai Brother Acree e tatau i matua ona aoao fanau e faapea o lagona lelei ma le le lelei o ni lagona masani uma lava, ma e le afaina le oo i ni lagona le lelei e pei o le faanoanoa, ita, le fafia, po o le tiga. E masani ona lagona e matua le manaomia ona pulea lagona o a latou fanau, ae o le faata-gaina o i latou e oo i ai ma taulimaina lagona le lelei e fausia ai se vaega o ni tomai taua.

Afai o loo i ai se faafitauli i ponokalafi, e tatau i matua ona faaete-ete ia aua nei faaopoopo atu i avega faalelagona o le tamaitiiti e ala i le faalumaina. Na mataituna e le polo-fesa o le olaga faaleaiga a le BYU o James M. Harper e faapea e ui o le *tausalaina* o se tali masani i mea sese lea e mafai ona faaosofia ai le suia, o le *maasiasi* o se lagona matautia, lea e mafai ona taitai atu ai i se lagona o le leai o se faamoemoe.

I se isi faaupuga, o le fatuina po o le faateteleina o se lagona o le maasiasi i se tamaitiiti e faaleagaina ai le gafatia o le tamaitiiti ina ia atiina ae ni tali lelei faalelagona ma ia iloa le uunaiga a le Agaga, lea e mautinoa lava o le fesoasoani e aupito sili ona mamana i le puipuiga ma le toe manuia mai i le faaaogaina o ponokalafi.

E manatua lava ma le manino e se tasi o alii talavou na tauivi ma ponokalafi le auala na tali atu ai ona matua ina ua aliae lona luitau: “Na tali mai lou tina ma le malosi, i le faataio ma ee, ma sa ou maua ai se lagona e sili atu le leaga nai lo le faamoemoe i le manumalo mai ai,” o lana tala lea. “O le vaega na sili ona aoga o le tau soo mai e lo’u tama e alofa ia te au.”



“Faamolemole aua le tausalaina i latou,” o le aioi mai lea a Elder Oaks. “E le leaga i latou pe ua aunoa ma le faamoemoe. O i latou o atalii ma afafine o lo tatou Tama Faalelagi.”<sup>9</sup>

## 8. Aoao Atu Faapea e Aoga le Togiola a le Faaola

I lauga, lesona, ma tusi e faiatui, ua maua ai e le autalavou le savali manino faapea o ponokalafi o se mala matautia, ae e tatau ona tatou tuu atu se faamamafa faaopoopo i le aoaoga faavae o le Togiola a Iesu Keriso.

Mo le autalavou, e talitonu Polofesa Butler o le faialavou atonu o se tasi lea o mafuaaga autu ia aoaoina ai i latou e uiga i le Togiola. “E le i atoatoa le foafoaina o le faiai o tamaiti talavou, ma e taitai atu ai i ni mataupu faapitoa e pei o le puleaina o le tali faafuasei mai ma le le lava o le mafaufau agai i luma atu,” na ia faamalamalamaina mai. “E mafai ona taofiofia se talavou faamaoni ma ola taumafai e tumu i le faaleagaga i se lagona lofituina o le nofosala pe a ia fetaiia ma vaivaiga lea e faapitoa lava lona lamatia ai i le i ai o lena faiai o loo talavou-pea. E taua tele, faatasi ai ma le aoaoina atu o poloaiga, lou aoao atu i talavou o le Togiola—faapea o loo i ai iina mo le faamoemoega o le atiina ae o le onosai ma le tumau ai i le olaga.”

“Tatou te manaomia uma lava le Togiola a Iesu Keriso. . . . E ala i le salamo talafeagai ma le atoatoa, e mafai ai [e tagata uma] ona mama, mama aiai, ma agavaa mo feagaiga ma faamanuiaga uma o le malumalu ua folafola mai e le Atua,” na saunoa mai ai Elder Oaks.<sup>10</sup> E aofia ai i latou na faaaogaina ponokalafi.

Ma o se savali o le faamoemoe lena: o loo tele mea e mafai ona faia e matua ia saunia ai a latou fanau e tetee atu i ponokalafi, ma afai ua

latou sese, o le Togiola le iu a le Faaola ua mafai ai ona faia se suiga ma ia salamo ai.

“O lona uiga, po o le a lava le mea e tupu, o le a le muta lava le alofa o le Tama Faalelagi ia te outou, ma o i matou, o o outou matua, o le a le muta foi lo matou alolofa ia te outou,” o le tala lea a Polofesa Rarick. Mo se tamaitiiti, e mafai ona le toe i ai se faamoemoe nai lo o lena. ■

Sii mai le “Faaauupegaina Lau Fanau mo le Taua,” Mekasini a le BYU, Tautotoga o le 2015.

E alaala le tusitala i Iuta, ISA.

### FAAMATALAGA

1. Sebastian Anthony, “Just How Big Are Porn Sites?” *ExtremeTech*, 4 Ape., 2012, extremetech.com.
2. Linda S. Reeves, “Puipuiga mai Ponokalafi—o se Aiga e Taulai Atu ia Keriso,” *Liahona*, Me 2014, 16.
3. Tagai i le Sam A. Hardy ma isi, “Adolescent Religiousness as a Protective Factor against Pornography Use,” *Journal of Applied Developmental Psychology*, vol. 34 (Me-Iuni 2013), 131–39, sciencedirect.com. Na faatalanoaina foi e le tusitala le taitai o le au suesue.
4. Peresitene Thomas S. Monson, “Avea ma se Faataitaiga ma se Malamalamama,” *Liahona*, Nov. 2015, 88.
5. Gordon B. Hinckley, “Great Shall Be the Peace of Thy Children,” *Liahona*, Jan. 2001, 62.
6. “The Impact of Pornography on Children,” *American College of Pediatrics*, Iuni 2016, acpeds.org.
7. Dallin H. Oaks, “Faamaloloina Mai le Mailei o Ponokarafi,” *Liahona*, 2015 Oke., 52.
8. Dallin H. Oaks, “Faamaloloina,” 52–53.
9. Dallin H. Oaks, “Faamaloloina,” 55.
10. Dallin H. Oaks, “Faamaloloina,” 55.





ATA NA TUSIA E SIMONE EHINI

*O taimi taua o faiga faaiuga o le a tofotofoina ai lou amiosao. A o e filifilia le faamaoni ma le mea sao, o le a e iloa ai o nei taimi taua o faiga faaiuga e avea ma ni elemene autu o le malosiaga i lou tuputupu ae faaleagaga.*



Saunia e Elder  
**Neil L. Andersen**

O Le Korama  
a Apostolo e  
Toasefululua

# OLE TULAGA FAATONUINA PAIA O LE Faamaoni

*Mo se soo o Keriso, o le faamaoni o se tasi o  
mataupu faavae autu o le faaleagaga.*

**O**le Atua lo tatou Tama ma Lona Alo, o Iesu Keriso, o ni tagata e sao, atoatoa, ma faamaoni a'ia'i ma le moni. O i tatou o atalii ma afafine o le Atua. O lo tatou taunuuga o le avea faapei o Ia. Tatou te saili ia faamaoni ma sao atoatoa e pei o lo tatou Tama ma Lona Alo. O le faamaoni ua faamatalaina ai le uiga o le Atua (tagai i le Isaia 65:16), ma o le mea lea, o le faamaoni o loo i le totonugalemu o lo tatou tuputupu ae faaleagaga ma meaalofo faaleagaga.

Na folafola mai e Iesu, "O a'u nei le ala, ma le upu moni, ma le ola" (Ioane 14:6; tagai foi i le Ioane 18:37; MF&F 84:45; 93:36).

Sa fesili atu le Alii i le uso o Iareto, "E te talitonu ea i upu o le a ou tautala atu ai?"

Sa tali atu le uso o Iareto, "Ioe, le Alii e, ua ou iloa e te fetalai i le upumoni, ona o oe o se Atua o le upumoni, ma e le mafai ona pepelo" (Eteru 3:11, 12).

Ma o fetaliga lava nei a le Faaola: "O A'u o le Agaga o le upumoni" (MF&F 93:26; tagai foi i le fuaiupu 24). "O le upu moni lava ou te fai atu ai ia te outou" (Ioane 16:7; tagai foi i le fuaiupu e 13).

I se isi itu, ua faamatalaina Satani o le tama o pepelo: "Ma sa avea o ia ma Satani, ioe, o le tiapolo lava lea, o le tamā o pepelo uma, e faasese ma fatauso tagata, ma taitai faatagataotaua i latou i lona loto, le toatele lava lea o i latou o e e lē faalogo mai i lo'u leo" (Mose 4:4).



*O le a tau mai e le lalolagi ia i tatou, o le sao ma le faamaoni e faigata ona faamatalaina. E mafai foi ona tatou i ai i le lalolagi ae le o ni o le lalolagi pe a tatou teenaina manatu faavae sese ma aaooga sese.*

Na fetalai Iesu, “O le tiapolo . . . e le’i tumau lava ia i le upu moni, aua e le o i totonu lava ia te ia le upu moni. A tautala o ia i le tala pepelo, o lana lava lea e tautala ai: aua o le pepelo ia” (Ioane 8:44; tagai foi i le MF&F 93:39).

Sa aoaiina soo e le Faaola i latou o e folafola atu faalauaitele se tasi mea, ae ese le mea e ola ai i o latou loto (tagai i le Mataio 23:27). Sa la viia i latou o e ola e aunoa ma le taufaasese (tagai i le MF&F 124:15). Pe o mafai ona outou iloa le tele o le eseesega? I le isi itu o loo i ai le pepelo, taufaasese, faaoleole, ma le pogisa. I le isi itu, o loo i ai le mea moni, malamalama, faamaoni, ma le amio sao. Ua faamanino lelei mai e le Alii le eseesega.

Na saunoa mai Peresitene Thomas S. Monson:

“I se tasi taimi na tele lava ona tutusa tulaga faatonuina o le Ekalesia ma tulaga faatonuina o malo, o lea ua i ai se vā tēle i lo tatou va, ma o loo faatupulaia pea lena va. . . .

“Na faamatala e le Faaola o tagata o Ia lava sa i ai i le lalolagi ae lē o se tasi o le lalolagi [tagai i le Ioane 17:14; MF&F 49:5]. E mafai foi ona tatou i ai i le lalolagi ae le o ni o le

lalolagi pe a tatou teenaina manatu faavae sese ma aaooga sese ma tumau ma le faamaoni i mea ua poloaiina ai i tatou e le Atua.”<sup>1</sup>

O le a tau mai e le lalolagi ia i tatou o le sao ma le faamaoni e faigata ona faamatalaina. E malie i le lalolagi le pepelo faaataata ma vave ona alofaga i mea ua tauri o taufaasese “mama”. O le eseesega i le va o le sao ma le sese ua faanenefuina, ma o taunuuga o le faamaoni ua faaitiitia.

Ina ia maua e le aunoa le Agaga o le Upumoni—le Agaga Paia—e tatau ona faatumilia o tatou olaga i le upumoni ma le faamaoni. A o tatou faamaoni atoatoa, e matala o tatou mata faaleagaga i le malamalama faateleina.

E mafai ona faigofie ona e malamalama i le auala e siitia ai e lenei malosiaga faaleagaga lou aoaoina i le potuaoga. Ae mata e mafai foi ona e vaaia le auala e faatatau ai lenei mataupu faavae i filifiliga tauri i le ala e faaalu ai lou taimi, po o ai o loo faaalu ai lou taimi, ma le auala e te mamanuina ai lou olaga?

### Tuuto Atu I le Faamaoni Patino

E le mafai ona e tuuesesese le faaeega paia faaleagaga o le upumoni e te manaomia ma moomia mai lou avea ai ma se tagata o le faamaoni ma le sao. E fesootai le upumoni e te sailia ma le ituaiga tagata ua e i ai. O le malamalama, tali faaleagaga, ma le taitaiga faalelagi e le masuia le fesootai atu i lou lava faamaoni ma le sa’o. O le tele o lou lotomalie tumau i le olaga o le a oo mai pe a faaauau pea ona e siitia lau tautinoga i le faamaoni patino.

Na faasoa mai e Roy D. Atkin le tala lenei:

“Ina ua faamaamu se vaega o tamaiti aoga ina ua uma [lou] tausaga muamua, sa faapea ona atili tele ai le tauvaga i au vasega i le aoga fomai nifo. Sa galulue malosi tagata uma ina ia i ai i le pito i luga o le vasega. A o faateleina le tauvaga, sa tonu i nisi o tamaiti aoga, o le auala e faamanuiaina ai, o le kopi lea. O lenei mea sa ou popole tele ai. . . .

“ . . . Sa ou iloaina e le mafai ona ou kopi. Sa sili atu ona ou manao ia sao ma le Atua nai lo lou manao e avea ma se fomai nifo.

“[I] lou tausaga tolu, sa ofoina mai ai ia te au se kopi o se suega na loma i se vasega taua tele. E mautinoa lava, o le uiga o lena mea, o le a maua muamua e nisi o tagata o lau vasega ia fesili o le suega. Sa ou teenaina le ofo. Ina ua toe faafoi mai pepa suega ua uma ona makaina, sa matuai mauluga lava le averesi o togi a le vasega, na faapea ona maulalo ai ou togi pe a faatusatusa i ai. Na talosaga mai le polofesa e fia talanoa ia te a'u.

“Roy,’ na ia fai mai ai, ‘e masani lava ona lelei au suega. O le a le mea na tupu?’


“Lau Susuga,’ sa ou fai atu ai i lau polofesa, ‘i le isi suega e sosoo ai, afai e te tuuina mai se suega e te lei aumaia muamua, ou te talitonu o le a e iloa ai e lelei tele lau tau-mafaiga.’ Sa leai se tali mai.

“Sa toe fai se isi a matou suega i lena lava vasega e tasi. A o tufa mai le suega, sa faapea ona faalo-goina le oi. O se suega sa lei faia muamua lava e le faiaoga. Ina ua toe faafoi mai a matou suega na makaina, sa faapea ona ou maua-inia se tasi o togi aupito mauluga i le vasega. Mai i lena lava taimi, o suega uma lava sa fou.”<sup>2</sup>

Ona o i tatou o soo o Keriso, o lea e tuputupu ae ai le tulaga faatonuina paia o le faamaoni i totonu o i tatou. I le Tusi a Mamona, o le apoapoaiga a le Tupu o Peniamina ia “[tuu] ese le tagata natura” (Mosaea 3:19) o se vaega, o se valaau mo se faateleina o le mauluga o le lagona o le faamaoni ma le sao.

I tagata o Efeso, na fautua atu ai le Apostolo o Paulo, “To ese . . . le tagata tuai, o loo ua leaga . . . a ia toe fua-taiina manao o outou loto.” Ona tuuina atu lea e Paulo se fautuaga faapitoa i le avea ma se “alii fou” po o se “tamaitai fou”: o le mea muamua lava sa ia tau atu ia te i latou e fai o le, “[tuu] ese le pepelo, ia tautalatala faamaoni taitasi” (tagai i le Efeso 4:22–25; tagai foi i le Kolose 3:9; 3 Nifae 30:2).

Ou te fiafia lava i le uiga lenei o le faamaoni: “O le faamaoni o le, ia moni, sa’o ma tonu atoatoa.” Ma le isi foi, o le amio sao o le “[i ai] o le lototele i mea lelei e fai ai [au] amioga ia ogatasi ma [lou] malamalama i le sao ma le sese.”<sup>3</sup>



Sa faamatala i se tasi taimi e Peresitene James E. Faust (1920–2007), le Fesoasoani Lua i le Au Peresitene Sili, e uiga i le talosaga mo le Officer's Candidate School i le Fitafita a le Iunaite Setete. Sa ia saunoa mai:

“Sa feau mai au i luma o le pulega e iloiloina talosaga. Sa itiiti ou tusi faamaonia, ae sa lua ou tausaga i le kolisi ma faamaeaina se misiona mo le Ekalesia i Amerika i Saute.

“O fesili na fesiligia ai au e le puleaga e iloiloina talosaga sa ese lava se mea na faasaga i ai. Na toetoe lava o i latou uma sa taulai mai i ou talitonuga. ‘E te ulaula?’ ‘E te inu ava malosi?’ ‘O a ni ou manatu e uiga i isi o e ulaula ma inu ava malosi?’ Sa leai se faigata o lou taliina o nei fesili.

“‘E te tatalo?’ ‘E te talitonu e tatau ona tatalo se fitafita?’

O le taitai na faia mai nei fesili sa o se fitafita agamalo i lana matata o le fitafita. Sa lei foliga mai na tatalo soo o ia. . . . Sa ou manao lava ia avea au ma se taitai. . . .

“Sa ou filifili e aua nei ou masalosalo [i au tali]. Sa ou tautino atu sa ou tatalo ma sa ou lagona e mafai e taitai ona saili le taitaiga faalelagi e pei ona sa faia e nisi o komesina maoae moni. . . .

“Na oo mai nisi fesili na ese lava. ‘I taimi o taua, pe le tatau ea ona faama mama teisi tulafono o amioga lelei? Pe le tauamionuina ia alii ona o le faigata o le taua, i le faia o mea latou te le faia pe a i ai i le aiga i lalo o tulaga e masani ai?’

“. . . Sa ou masalosalo o alii sa tuuina mai ia te au lenei fesili, sa lei ola i tulaga faatonuina ia na aoaoina ai au. Sa oso mai le manatu i lou mafaufau e faapea, atonu e mafai ona ou fai atu na i ai lava ou talitonuga, ae sa ou le manao e faamamafa atu ia mea i isi. Ae na foliga mai sa feemo mai i lou mafaufau foliga o le toatele o i latou o e na ou aoaoina i le tulafono o le legavia ao avea [au] o se faifeatalai. I le faaiuga sa na ona ou faapea atu, ‘Ou te le talitonu o loo i ai ni tulafono se lua o le tulaga faatonuina o le amio mama.’

“Sa ou tuua le faatalanoaga ma talaina le mea moni e faapea, e mautinoa lava o le a maulalo ou togi . . . e tuuina mai e nei taitai agamalo. I ni nai aso mulimuli ane ina ua faasalalauina ia togi, sa matuai ou tei lava ona na ou pasi. Sa ou i ai i le vaega muamua na talia mo le Officer's Candidate School!”

Ma i le silafia ai e Peresitene Faust, o le auala e mafai ai e faaiuga laiti ona i ai ni taunuuga tetele, sa ia saunoa ai, “O se tasi lenei o taimi aupito taua o faiga faaiuga o lou olaga.”<sup>4</sup>

O le faamaoni, amio sa’o, ma le sa’o, o mataupu faavae faavavau ia e mamanuina tele lo tatou aafiaga i le olaga nei ma fesoasoani e iloa ai lo tatou taunuuga e faavavau. Mo se soo o Keriso, o le faamaoni e i le totonugalemu o le faaleagaga.

### **Faamamalu i Au Upu**

O le faamaoni e afifi ai itu uma o lou olaga i aso taitasi, ae sei ou faatatau atu i ni nai faataitaiga patino. I aso o’u aoga, ou te manatua lava le peresitene sa i ai o le Iunivesite o Polika Iaga o Dallin H. Oaks, lea ua avea nei o se tasi o le Korama a Aposetolo e Toasefululua, na faasoaina mai le upusii lenei mai ia Karl G. Maeser: “Au uo talavou e, na fesiligia a’u po o le a lau faauigaga o le upu faamamaluina. O le a ou tau atu ia te outou. Tuu au i tua atu o papuipui o le falepuipui—o papuipui maa e sili ona maualuluga, e sili ona mafafia, e sili le loloto i lalo i le palapala—e i ai lava le avanoa i se auala po o le a lava, e mafai ai ona ou sola ese. Ae faatu au i luga o lena fola ma tusi se laina faataamilo i le mea ou te tu ai i se sioka, ma ia tuu mai ia te au e tuu atu lau upu faamamaluina e aua lava le sopoia lena laina. Pe mafai ona ou alu i fafo o lena lio? E leai lava! Seiilogou te otu muamua!”<sup>5</sup>

E i ai taimi tatou te faamamaluina ai tautinoga ona sa tatou ioe e faamamalu i ai. O le a i ai ni tulaga i lou olaga o le a faaoosoosoina ai oe e lafoai se maliega na e faia. O le a e faia muamua le maliega ona o se mea e te manao e toe maua mai ai. Mulimuli ane, ona o se suiga i tulaga, o le a e le toe manao ai e faamamalu i tuutuuga o le maliega. Ia aoao nei faapea e te tuuina atu loa lau upu, pe a e faia se folafolaga, pe a e sainia lou igoa, o lou faamaoni ma lau amio sao patino, ua noatia ai oe i lau upu, lau tautinoga, ma lau maliega.

Tatou te faafetai tele ona tou te “talitonu i le faamaoni”



(Mataupu Faavae o le Faatuatua 1:13), tou te tau atu le mea sao, o le a outou le kopi i se suega, o le a le kopiina se pepa a se isi tagata ma faapea o oe e ana le pepa, po o le taufaasese o le tasi ma le isi. Ua fetalai mai le Alii ia i tatou:

“Ma o le upumoni o le iloa lea o mea e pei ona i ai, ma e pei ona sa i ai, ma e pei ona o le a oo mai;

“Ma o soo se mea e tele atu pe itiiti mai i lo lea, o le agaga lea o lena amioleaga e toatasi, o lē o se pepelo mai le amataga” (MF&F 93:24–25).

O o tatou luitau e masani ona oo mai i le “tele atu pe itiiti”—i faaosoosoga laiti i le faatausiusiuga o le faamaoni atoatoa. I le avea ai ma se tagata aoga tausaga muamua i le kolisi, sa ou tuuina ai se faamatalaga i luga o la’u kesi, lea sa masani ona siiina mai e [a o Peresitene] Peresitene David O. McKay (1873–1970). E faitauina faapenei: “O le taua silisili o le olaga e tauina i totonusi o nofoaga filemu o le agaga.”<sup>6</sup>

O le a sou manatu, o a ni lagona o le Alii pe a tatou faia ni faaiuga faigata o le faamaoni? O loo i ai se mana faaleagaga maoae i le tumau moni ma faamaoni pe a foliga mai e faalemanua taunuuga o lou faamaoni. O le a feagai outou uma taitoatasi ma faaiuga faapena. O nei taimi taua o le a sueina ai lou amiosao. A o e filifilia le faamaoni ma le mea sao—e tusa lava pe faamalieina oe pe leai i le mea na e faamoemoe i ai—o le a e iloa ai o nei taimi taua o faiga faaiuga e avea ma ni elemene autu o le malosiaga i lou tuputupu ae faaleagaga.

### **“Ia Amiontonu i le Pogisa”**

Na saunoa Peresitene Polika Iaga (1801–77) i se tasi taimi e faapea, “E tatau ona tatou aoao ia amiontonu i le pogisa.”<sup>7</sup> O se tasi o faauigaga o lenei fuaitau o le, e tatau ona tatou aoao ia faamaoni pe afai o le a leai se tasi e iloa pe na tatou le faamaoni. Ou te luiina outou ia “amiontonu i le pogisa.” Filifili le ala o le a filifilia e le Faaola lava Ia.

Na tusia e le tuisolo o Edgar A. Guest:

*Ou te le manao e teu i luga o le fata o se kapoti  
Ni mealilo se tele e uiga ia te au,*

*Ma faavalea ai au lava, i au  
faatinoga uma,  
I le manatu faapea, o le a le iloa lava  
e se tasi.<sup>8</sup>*

Manatua upu matagofie a le Perofeta o Iosefa Samita: “Sa ou mautinoa lena mea, ma sa ou mautinoa sa silafia e le Atua lena mea, ma e lē mafai ona ou faafitia lena mea, pe ou te fiafia e fai; sa ou iloa lava o le faia o lea mea o le a ou faatausuai ai i le Atua, ma oo ai i lalo o le tausalaga” (Iosefa Samita—Talafaasolopito 1:25).

O loo i ai le uunaiga malosi ia ausia, uunaiga malosi ia tausisia ni togi maualuluga, uunaiga malosi e sue se galuega, uunaiga malosi ia sue ni uo, uunaiga malosi ia faafafia i latou o loo siomiaina oe, uunaiga malosi ia faauu. Aua nei faatagaina nei uunaiga malolosi e faaleagaina ai lou uiga tauleleia o le faamaoni. Ia faamaoni pe a foliga mai e faasagatau atu taunuuga ia te oe. Tatalomo le faamaoni faateleina, mafaufau i eria o le a finagalo le Alii e te atili faamaoni ai, ma ia i ai le lototele e faia laasaga manaomia e siitia ai lou agaga i se tulaga maualuga atu o le naunau ia faamaoni atoatoa.

Na apoapoi mai Peresitene Monson ia i tatou, “Ia avea i tatou ma faataitaiga o le faamaoni ma le amiosa’o i soo se mea lava tatou te o i ai, ma soo se mea tatou te faia.”<sup>9</sup> Atonu e te mafaufau e tuu le fautuaga lenei mai le perofeta a le Alii i se nofoaga e mafai ona e vaai soo i ai.

Na fautua mai Elder Oaks, “E le tatau ona tatou taliaina ni manatu e ese mai ia i tatou lava. E tatau ona pulea i tatou e manaoga o le upumoni.”<sup>10</sup> Ia tamau ia te oe lava. Na fetalai le Faaola, “Ai se tasi e fia mulimuli mai ia te au, aua nei usiusitai o ia ia te ia, a ia ave e ia lona satauro, i le mulimuli mai ai ia te au” (Mataio 16:24).

Ou te faaiu i le mea na ou amata ai. O lo tatou Tama Faalelagi ma Lona Alo o ni tagata o le faamaoni aiai, saolele ma atoatoa.



Ou te molimau atu o loo soifua lo tatou Tama oi le Lagi ma Lona Alo Pele. E silafia lelei e i Laua oe. E alolofa i Laua ia te oe. O lou taunuuga o se atalii po o se afafine o le Atua o le avea e faapei o i Laua. O i tatou o ni soo o le Alii o Iesu Keriso. Ia tatou maua le lototele e mulimuli ai ia te Ia. ■

*Mai se saunoaga i le faigalotu, “Honesty—The Heart of Spirituality,” na tuuina atu i le Brigham Young University ia Setema 13, 2011. Mo le saunoaga atoa i le gagana Peretania, alu i le speeches.byu.edu.*

#### FAAMATALAGA

1. Thomas S. Monson, “O Le Mana o le Perisitua,” *Liahona*, Me 2011, 66, 67.
2. Roy D. Atkin, “I Wouldn’t Cheat,” *New Era*, Oke. 2006, 22–23.
3. *Alualu i Luma o le Tagata Lava Ia a Tamaitai Talavou* (tamaitusi, 2009), 61.
4. James E. Faust, “Faamaoni—O Se Tapasa o Mea Mama,” *Liahona*, Ian. 1997, 48–51.
5. I le Alma P. Burton, *Karl G. Maeser: Mormon Educator* (1953), 71; tagai foi i le Dallin H. Oaks, “Be Honest in All Behavior” (Faigalotu a le Iunive site o Polika Iaga, Ian. 30, 1973), 4, speeches.byu.edu.
6. Tagai i le James L. Gordon, *The Young Man and His Problems* (1911), 130.
7. Brigham Young’s Office Journal, 28 Ian., 1857.
8. Edgar A. Guest, “Myself,” i le *The Best Loved Poems of the American People* (1936), 91.
9. Thomas S. Monson, “Pe a Tatou Taumavae,” *Liahona*, Me 2011, 114.
10. Dallin H. Oaks, Faapalenina o le Upumoni ma le Faapalepale,” *Liahona*, Fep. 2013, 32.

*Aua nei faatagaina uunaiga malolosi o le olaga e faaleagaina lou uiga o le faamaoni. Ia faamaoni e tusa lava pe foliga mai e faasagatau atu taunuuga ia te oe.*



# OLE AOAOINA MO LE AGAGA ATOA

**O**lenei savali e mo le autala-vou ma talavou matutua i le Ekalesia a le Alii. I le tele o tausaga ua mavae, sa ou maua ai se uunaiga malosi na oo mai ia te au e uiga ia te outou ma e uiga i lenei aso. Sa peiseai o ou vaai atu i tamaiti i le Peraimeri i le salafa atoa o le lalolagi. Sa ou iloaina o le a latou osia ma tau-sia feagaiga ma le Alii. Ma sa ou iloaina o le a faamanuiaina i latou e le Alii i avanoa mo aoaoga loloto, faaleagaga ma le faaletino, ma faatuina i latou e avea ma se autau malosi i le fausiaina o Lona malo ma saunia le lalolagi mo Lona toe foi mai.

O outou o na fanau, ma o lo outou taimi lenei.

O se aso sili i le malo o le Atua, o se aso ua tumu i avanoa mo outou e aoao ma tutupu ae ai ma maua le olioli ma le fiafia. E i ai luitau taua, e mautinoa lava. Ae e ala i le mana togiola ma le faamalolosia o le Togiola a Iesu Keriso, e ala i Lana talalelei mamalu ma Lana Ekalesia moni ma le ola, o loo faaauau pea e le Alii ona tatala faitotoa ma saunia le ala mo outou e salamo, aoao loloto, tutupu ae faaleagaga, ma ia sili atu ona liua ia te Ia. Ua saunia e le Alii Lona malo ma Lona nuu mo Lona toe foi mai, ma o outou o le tupulaga faiae o loo faia se matafaioi autu i lena galuega maoae.



O se aso lenei o vavega. O teknolosi fou ua faigofie ai ona faamanuiaina le aotauina ma le aoaoina. E moni lena mea mo le malamalamfaaletino faapea foi ma le faaleagaga. O loo galue le Alii ma le mana i Lana Ekalesia mo outou ina ia maua le

*O loo galue le Alii ma le malosi i Lana Ekalesia mo oe ia maua le a'otauina ua la finagalo ia e maua.*



**O le aoaoina e taua e fesoasoani ia i tatou e ausia ai lo tatou gafatia i le faaletino ma le faavavau.**

atoatoa atili outou i teori, i mataupu autu, i mataupu faavae, i le tulafono o le talalelei, i mea uma tau i le malo o le Atua, ua tatau mo outou ona malamalama i ai” (MFF 88:78).

### **O le Malamalama Faaleagaga ua i ai le Faamuamua**

O le loloto o le aoaoina, i soo se vaega o suesuega, e masani lava o se aafiaga faaleagaga, e taula i se faavae o le faatuatua ia Iesu Keriso, salamo, ma le usiusitai i Ana poloaiga, ina ia mafai ona aoaoina ai oe e le Agaga Paia. O le loloto o le aoaoina e le fagofie, ae e tauia ia taumafaiga! Afai e te manao moni lava e aoao i ai, afai o lou loto ma lou mafaufau ua matala i le aoaoina, ma afai e te galue ai i lena manao, o le a faamanuiaina oe e le Alii. Pe a e faia lau vaega—tatalo ma le faatuatua, saunia, suesue, auai ma le naunautai, ma faia le mea sili—o le Agaga Paia o le a aoaoina oe, faalauteleina lou malosi e faatino ai mea ua e aoaoina, ma fesoasoani ia te oe e avea ma tagata e finagalo le Alii ia avea ai oe. “O le faaolataga lava ia,” na aoao mai ai Peresitene Iosefa F. Samita (1838–1918), “i lalo o le Togiola a Keriso, o se faagasologa o aoaoa. . . .

aoaoga ua Ia finagalo ia outou maua.

O se vaega atoa lea o le poloaiga na tuuina mai e le Alii i le Perofeta o Joseph Smith (1805–44) i le amataga o le Toefuataiga: “O lou loto, ia faataalise ona outou faaliliu o au tusitusiga paia, ma maua se malamalama o tala-faasolopito, ma o atunu, ma o malo, o tulafono a le Atua ma tagata, ma nei mea uma mo le faaolataga o Siona. Amene.” (MF&F 93:53).

O lenei poloaiga ua i ai i se tulaga faanatinati i o tatou aso ao faanatinatinina e le Alii Lana galuega. O le taimi lenei mo outou e faaaogaina ai avanoa mo aoaoga o loo i o outou luma, ma le gafatia mo le aoaoina ma le tuputupu ae o loo ia te outou.

O nei upu a Peresitene Thomas S. Monson e tatau ona tatagi pea i o outou taliga i aso uma:

“Ou te uunaia outou ia outou aooga.”<sup>1</sup>

“O le a faalauteleina au taleni a o e suesue ma aoao.”<sup>2</sup>

“O outou taitoatasi . . . ua i ai le avanoa e aoao ai ma tuputupu ae. Ia faalautele lou malamalama, faaleata-mai ma faaleagaga, i le tulaga atoatoa o lou gafatia faalelagi.”<sup>3</sup>

### **Loloto o le Aoaoina**

O le aoaoina lea e mafai ai e outou taitoatasi ona tulai ae “i le tulaga

atoatoa o lou gafatia faalelagi” o se mea o le a ou taua o le loloto o le *aoaoina*: aoaoina o le agaga atoa—le mafaufau, o le loto, o le tino, ma le agaga e ola pea. O le loloto o le aoaoina e faatatau i ituaiga uma o le malamalama, pe faaleagaga pe faale-tino. O le aoaoina e loloto pe a faate-leina ai lou malosi e fai ni mea se tolu: (1) ia iloa ma malamalama; (2) ia faia se gaoioiga aoga, ma le amiontonu; ma le (3) ia avea atili e faapei o lo tatou Tama Faalelagi.<sup>4</sup>

E pei ona aoao mai e le Alii le Perofeta o Iosefa Samita, o le loloto o le aoaoina e tatau ona faia i le ala a le Alii, e ala i faaaliga ma musumusuga i le Malamalama o Keriso ma e ala i le mana o le Agaga Paia ma e ala i le suesue malosi, ma le maelega ma le aoao atu o le tasi ma le isi, i le faatasi ai o le alofa tunoa o Iesu Keriso. E moni lenei mea mo soo se ituaiga o malamalama. O poloaiga nei a le Alii e uiga i le loloto o le aoaoina:

“Ia outou saili ma le filiga ma aoao i le tasi upu o le poto; ioe, ia outou saili mai totonu o tusi sili ona lelei upu o le poto; saili i le aoaoina, e ala lava lea i le suesue ma le faatuatua foi” (MFF 88:118).

“Ia outou aoao atu ma le filifili-ga ma o le a i ai lo’u alofa tunoa ia te outou, ina ia mafai ona aoaoina



O le malamalama o le alualu i luma e faavavau."<sup>5</sup>

O lenei faagasologa e faatatau i soo se nofoaga e mafai ona e i ai ma i soo se ituaiga o malamalama. Ae ui i lea, o le poto silisili ona taua e tatau ona e mauaina o le malamalama i mea a le Atua. O le malamalama faaleagaga, o le mea lea, e tatau ona faamuamua i lou loto ma au mea e faamuamua. Na faamamafa mai e le Perofeta o Iosefa Samita le taua o le malamalama

faaleagaga i nei upu: "O le tagata e faasaoina e le sili atu lona saoasaoa i lo lona mauaina o le atamai, ua afai na te le mauaina le atamai, o le a aumaia o ia i le noanoataga e se isi malosi o le tiapolo i le isi lalolagi, ona o agaga leaga o le a tele atu le atamai, ma faapea foi ona tele le malosi i lo o le toatele o tagata o loo i ai i luga o le fogaeleele. O le mea lea e manaomia ai faaaliga e fesoasoani ia i tatou, ma aumai ia i tatou le atamai o mea a le Atua."<sup>6</sup>

E moni o le talalelei e aofia ai upumoni uma,<sup>7</sup> ae o le poto ma le malamalama o upumoni manino ma le faigofie o le talalelei a Iesu Keriso e tatau ona avea ma o outou faavae mo aoaoga loloto uma lava. O le tuuina faamuamua o le malamalama faaleagaga i lou mafaufau ma lou loto e faamautinoaina faapea o le a e faalagolago i le Alii ma le Agaga Paia i lau aoaoga, o le a e vaai i mea uma e te suesue i ai i le malamalama o Lana talalelei, ma o le a e faaauau pea ona aoao loloto i o outou olaga atoa.

### Loloto o le Aoaoina mo le Olaga Atoa

O le loloto o le aoaoina o le malamalama faaleagaga ma le faalelalolagi o se poloaiga a le Alii. Vaai faalemafaufau i le mea semanu e tupu pe ana e taofi le aoaoina. Ae faapefea pe ana faapea ou te taofia le aoaoina ina ua ou faauu mai le kolisi i le ogatotonu o le 1970? Semanu e leai ni ou manatu fou po o faaaliga mai perofeta soifua, o tusitusiga paia, po o le Agaga Paia; Semanu ou te le iloaina se mea i le faaauauina o atinae i tekinolesi, tausiga faalesoifua maloloina, mataupu faalelalolagi, tulafono faalemalo, po o le aoaoina. Semanu e leai se tuputupu ae faaletagata lava ia po o le tuputupu ae faaleagaga e ala i le



*E tatau ona faia le aoaoina i le ala a le Alii, e ala i faaaliga ma musumusuga.*

salamo ma le aoaoina mai aafiaga.

A o avea au o se peresitene o le Iunivesite o Brigham Young–Idaho, na tele lava ina fesiliglia Sister Clark, “na faapefea ona e feiloai ia Peresitene Clark?” O lana tali e masani lava ona amata i ai, “Sa lei Peresitene Clark ina ua ou feiloai ia te ia.” Ana faapea ou te lei faaaau ona aoao, semanu ou te faasolo ina matua atu, ae semanu o le a avea pea au ma le 25 tausaga le matua na masani ai Sister Clark ina ua ou faau mai le kolisi—o se vaaiga le lelei lea mo Sisiter Clark po o lo matou aiga!

Afai e taofi lou aoaoina, e le mafai ona avea oe ma se tagata e sili atu le malamalama, sili atu ona lelei, sili atu le aoga, sili atu ona faamaoni, po o le sili atu ona pei o lo outou Tama o i le lagi.

O lou aafiaga i le aoaoina i lou talavou ma tausaga o le talavou matua ua faataatiaina se faavae mo se olaga atoa o le aoaoina. Afai e te atina ae le tomai e aoao loloto i le ala a le Alii—e ala i le Agaga ma i le sue-sue ma le filiga, ma le mataalia—o le a avea o se faamanuiga sili ia te oe.

O se ki i le seleselaina o lena faamanuiga o le faatumauina o lou loto ma lou mafaufau ia matala i le aoaoina. O mea nei e tolu e mafai ona e faia ia saunia ai e aoao:

*1. Ole atu i le Alii e faamanuia oe i le naunau ia loloto le aoao.*

Afai ua i ai ia te oe le naunautaiga ina ia loloto le aoaoina, manaia tele. Afai e leai, ole atu i le Alii mo lena meaalofa. O le a aoaoina e le Alii ou manaoga ina ia e manao e aoao po o le a ma pe faapefea Lona finagalo

ia te outou ina ia aoao mea uma i o outou olaga. I le fuafuaga a le Alii, *pe faapefea* Lona finagalo ia te oe e aoao ai—e ala i le Agaga, i le suesue ma le filiga—e tutusa lava le taua e pei o le *po o le a* le mea e finagalo o Ia ia te oe e aoao.

*2. Ia avea le salamo o se vaega totonugalemu o lou olaga.*

O le salamo o se faagasologa paia. O le auala tatou te suia ai, tuputupu ae, ma ia sili atu ona lelei e ala i le mana togiola ma le faamalosiau o le Togiola a Iesu Keriso. Afai e avea le salamo ma totonugalemu i lou olaga, o le a e tootuli i ou tulivae i taimi uma lava, faamaualaloina oe lava i luma o le Alii, ma sailia Lana fesoasoani i le auala e faaaoga ai lou taimi ma le auala e auaua atu ai ia te Ia.

*3. Tapuai atu i le malumalu i le tele o taimi e mafai ona e faia.*

O le malumalu o le maota o le Alii o faaaliga ma le aoaoina. Afai e te alu soo i ai, pe a e aveina i ai au fesili ma ou manao e aoao ai, o le a aoaoina oe e le Alii lava Ia.

### Foiaina o Tulaga Faigata i le Loloto o le Aoaoina

O le loloto o le aoaoina nei o le a saunia oe mo se olaga atoa o le aoaoina. Ae ui i lea, ou te iloa e te feagai ma faalavefau ma e oo lava i mea faafeagai e tuusao lava i le aoaoina e finagalo le Alii ia te oe ina ia maua. O le fefe, lotovaivai, paie, faigata ona faitau, le lava le lagolagosua po o avanoa, aganuu po o tu ma aga faaleaiga, popolega e uiga i le tau, o faaososoga o le lalolagi, o manatu sese e uiga i le aotauina, ma le tele



**E ala i le mana o le Alii, e aofia ai le poto e mauluga atu i tekinolosi, o avanoa e aoao ai ua sili atu ona maua gofie nai lo se isi lava taimi.**

lava o isi mea e mafai ona faalavelave i lou ala.<sup>8</sup>

Ou te iloa o nisi o outou e feagai ma nisi o nei mea, ma latou te lagona e pei o ni papupuni e le mafai ona faatoilaloina i le aoaoina.

Ou te tuuina atu lau molimau faapea e tuna lava po o fea tou te nonofo ai, e tuna lava po o a o outou tulaga o i ai, e tulai lava le Alii o Iesu Keriso faatasi ma outou e tetee atu i lenei papupuni faatasi ai ma Lona alofa faaola ma Lona mana silisilise. E ala i Lona taulaga togiola, na oo lava o Ia ma manumalo i mea uma ia e mafai ona ono taofia ai lou alualu i luma agai i le ola e faavavau. I Lona malosi ma faatasi ai ma Lona mana, e mafai ona e faatoilaloina soo se mea lava o loo tu i le va o oe ma le aoaoina lena e finagalo le Alii ia te oe ina ia mauaina.

O Lona folafolaga lenei ia te oe, ma e moni Ana folafolaga: “Faatalata mai ia te Au ma o le a ou



faalatalata atu ai ia te outou; saili mai ia te au ma le filiga o le a outou maua ai a'u; ole mai, ma o le a outou maua ai; tu'itu'i mai, ma o le a tatala atu ai ia te outou" (MF&F 88:63; tagai foi i le Mataio 7:7).

## Faaiuga

O se aso sili moni lava lenei i le malo o le Atua. Ua faanatinatiina e le Alii Lana galuega, ma ua tatou vaaia vavega ina ua mavae ni vavega a o galue le Alii i le mana e tatala avanoa matagofie mo outou ia loloto ai le aoaoina.

O loo galue le Alii i o outou olaga e faamanuia ma saunia outou. Ou te tatalo ina ia outou galulue i le faatuatua ia Iesu Keriso ina ia faaaoga avanoa uma e loloto ai le aoaoina, tuputupu ae ai i le poto

ma le malamalama, ma faataunu ai Ona faamoemoega amiotonu, ma avea ma tagata na outou fananau mai ia avea ai. ■


*Mo nisi faamatalaga i avanoa o aoga o le Ekalesia, asiasi i le education.lds.org. Ina ia aoao atili e uiga i le seminare mo le autalavou, tagai i le itulau e 50 i le lomiga lenei. Ina ia aoao atili e uiga i le inisitituti mo le autalavou matutua, tagai i itulau 44 ma le 46 i le lomiga lenei.*

## FAAMATALAGA

1. Thomas S. Monson, "Afaf Ua Outou Saunia o le a Outou Le Matatau Lava," *Liahona*, Nov. 2004, 116.
2. Thomas S. Monson, "O Sini e Tolu e Taialaina ai Oe," *Liahona*, Nov. 2007, 118.
3. Thomas S. Monson, "O le Malosiaga Maoae o le Aualofa," *Liahona*, Jan 1998, 112.
4. O le manamu o le "iloa, faia, ma avea ma" na faaaogaina lautele e avea o se auivi mo le atiina ae o le a taitaiga ma talanoaga e uiga i le fuafuaga a le Alii mo le tuputupu ae faaleagaga o Lana fanau. Tagai

i le Thomas S. Monson, "Ia aoao, ia faia, ia avea," *Liahona*, Nov. 2008, 60–68; ma le Dallin H. Oaks, "O le Luitau ia Avea," *Liahona*, Nov. 2000, 32–34. Mo se togafiti a o le loloto o elemene taitasi o lenei manamu, tagai i le faasologa o tusi e tol a David A. Bednar, *Increase in Learning* (2011); *Act in Doctrine* (2012); ma le *Power to Become* (2014).

5. *Aoaoga a Peresitene o le Ekalesia: Iosefa F. Samita* (1998), 252.
6. *Aoaoga a Peresitene o le Ekalesia: Iosefa Samita* (2007), 480.
7. O lenei upusii mai ia Brigham Young e maua lelei ai le manatu: "E le gata ina faamasani foi e le ekalesia a Iesu Keriso tagata i mea a le Atua, ma atinaeina ia i latou ni uiga lelei ma le mama, ae saunia foi mo i latou soo se unaiga ma ni faatosinaga e talafeagai ai, mo i latou ina ia faateleina ai lo latou malamalama ma le atamai, i suo se vaega tau inisinia po o tomai eseese ma faasaienisi, mo le poto uma, ma o tomai eseese ma faasaienisi uma o i le lalolagi e mai le Atua, ma ua fuafuaina mo le lelei o ona tagata" (*Aoaoga a Peresitene o le Ekalesia: Polika Iaga* [1997], 193).
8. O se faataitaiga lenei o se manatu sese na mafua mai i tu ma aga faaleaganuu e mafai ona aafia ai le autalavou matutua: I se augatupulaga talu ai, e mafai ona e maua se tagata na soifua i se lalolagi ua atiina ae se galuega lelei, ma se totogi lelei lava ma se tupe maua e tausii ai se aiga i se aoaoaga mai le aoga maualuga po o le, sili atu ona lelei, na faauu mai i le aoga maualuga. O lena manatu o loo i ai pea lava e ui lava i le mea moni faapea mo le toatele o tagata, i atunu e aupito sili ona atiae, ma e oo lava i le lalolagi ua atiina ae, ua mavae atu na aso. O le aoaoaga ma le aoaoina i tua atu o le aoga maualuga i matata o loo manaomia tele, pe e ala i le mauaina o tusi faamaonia i tomai faatekinolosi po o le mauaina o se faailoga i le kolisi (ma i nisi matata o se tikeri e maualuga atu), ua manaomia mo le tausia o se aiga, saunia mo tausaga o le litaea ma le faavaeina o se faavae faaletino mo le auauanaga i le Ekalesia.



*Ua tatou vaaia vavega ina ua mavae ni vavega a o galue le Alii i le mana e tatala ai avanoa matagofie mo oe ina ia loloto ai le aoaoina.*

# BYU-Pathway i le Lalolagi Atoa

Saunia e Elder Kim B. Clark

Io tatou aso ua agai atu le Alii ma le malosi i le Ekalesia ina ia faaloloina ma faalautele atu lana aapa ia oo atu i le toatele o outou. Atonu o le faataitaiga sili o le faalauteleina e le Ekalesia o lana aapa o le aoaoina loloto o le faasilasilaga lea i le 2017 o se faalapotopotoga fou i totonus o le Ofisa o Aoga a le Ekalesia (OAE) ua ta'ua o le BYU-Pathway i le Lalolagi Atoa. O lenei faalapotopotoga fou na uunaia e le polokalama o le Pathway.

## Pathway

I le 2009 na faatagaina ai e le Fono Faatonu o Aoga le Iunivesite o Polika Iaga-Idaho e fatu se polokalama faaleaoaoga fou e ta'ua o le Pathway ma le faamoemoe mo le tatalaina o avanoa mo aoaoga maualuluga atu mo le toatele o tagata o le Ekalesia. O le Pathway o se polokalama e tolu-semesa lea e sauniaina tagata o le vasega mo aoaoga maualuluga atu e ala i le aveina o kosi i luga o le initoneti ma le faapotopoto faatasi i se inisitituti po o se falelotu i vайaso taitasi ina ia maua ni aoaoga faalelotu ma ia auai i talanoaga e taitaia e tagata o le vasega i anomea o kosi i luga o le initoneti. O loo taitaiina le polokalama o le Pathway e ni taitai perisitua i le lotoifale ma ua vaavaaia e ni faifeautalai o auaunaga a le Ekalesia o e o faiaoga ma lagolagoina ia tagata o le vasega. O le faamoemoega tafatolu a le Pathway o le (1) ia aveina atu le talalelei i totonus o loto o tagata o le vasega, (2) fesoasoani i tagata o le vasega ia

avea ma e e mafai ona aoaoina, ma le (3) saunia tagata o le vasega ia taitai ma tausia aiga.

Ua faagaoioia nei le Pathway i le pe tusa ma le 500 nofoaga i le Lalolagi ma ua auauna atu i le silia ma le 57,000 tagata aooga, ua tatalaina faitotoa mo avanoa, faateleina le faamoemoe ma le faatuatua i le Faaola, ma ua faaloloina le aoaoina mo le faitau afe o outou. O le faamaeaina o le polokalama o le Pathway ua mafai ai e le toatele o tagata aooga ona lesitala i avanoa mo aoga maualuluga atu, e aofia ai polokalama mo tusi faamaonia ma tikeri o ofoina atu i le Initoneti e ala i le BYU-Idaho po o faalapotopotoga faaleaoaoga i le lotoifale.

## BYU-Pathway i le Lalolagi Atoa

O le tuputupu ae ma le tulaga manuia o le polokalama o le Pathway ua musuia ai le faatuina o se faalapotopotoga fou, ua fesootai ma faalapotopotoga uma a le OAE, e ta'ua o le BYU-Pathway i le Lalolagi Atoa (BYU-PW). O le BYU-PW e vaaia le Pathway ma faamaopoopo isi polokalama a le OAE o tusi faamaonia ma tikeri i luga o le initoneti mo aoga maualuluga. E auauna atu le faalapotopotoga i tagata o le vasega e ala i kosi i luga o le initoneti ma faatautaia ni gaoioiga i faapotopotoga i ni nofoaga o le Pathway i le Lalolagi Atoa, e aofia ai talanoaga e taitaia e tagata o le vasega ma mafutaga faaleaoaoga ma auuaunaga mo galuega i le lotoifale.

O le BYU-PW o le taunuuga lea o le aiaiga faavae ua faamaonia e le Fono Faatonu o Aoga a le Ekalesia ia Novema 2015: "O le a saili le Ofisa o



Aoga a le Ekalesia e tuuina atu ai ni avanoa mo le a'otauina i tagata o le Ekalesia i soo se nofoaga ua faatulagaina ai le Ekalesia."

O le BYU-Pathway i le Lalolagi Atoa e mafai ona fesoasoani ia te oe ia faaaoga ana polokalama o tusi faamaonia ma tikeri i le initoneti lea o le a tatala maia ni avanoa ua faaleleia mo se galuega. O le tuufatasia ma aoaoga faalelotu i le inisitituti ma le aoaoina e le Agaga i le ala a le Alii, e mafai ai ona e aoao ma le loloto i soo se nofoaga e te suesue ai. E le gata i fautuaga faakatemia, o le a e maua ia fautuaga ma le lagolago mai se tagata faigaluega a le OAE ma le Auaunaga o le Ola Tutoatasi e fesoasoani ia te oe e saili ni galuega faamasani faataitai ma galuega tumau po o le tuliloaina o ni avanoa faaleaoaoga i le lotoifale.

E mafai ona e faaaogaina polokalama a le BYU-Pathway i le Lalolagi Atoa, e aofia ai le Pathway, aoaoga o le gagana Peretania, tusi faamaonia, ma tikeri, e ala atu i o outou iunite ma taitai o le Ekalesia i le lotoifale. O nei polokalama o loo maua i le tele o eria i le taimi nei, ma o le a faaauau pea ona faaopoopo e le BYU-PW ni nofoaga fou a le Pathway ma polokalama fou i se auala e fuatiaina ma mausali a o agai atu i luma le Ekalesia i lalo o le taitaiga a le Alii. ■

Asiasi i le [pathway.lds.org](http://pathway.lds.org) mo nisi faamatalaga.





*O le a'otauina i faatufugaga masani na auina atu ai Niki ma lona aiga i Italia mo le tele o taimi. O loo faaaauauina e Niki ana suesuega i Roma, lea ua ia iloaina ai ni auala e faaaoga ai ana taleni ma faatufugaga e molimau atu ai ia Iesu Keriso.*

**CODY BELL, LE PUEATA**

## Niki Covington

*Lazio, Italia*

E faapefea ona e faaaogaina ia meaalofa ma taleni ua tuuina mai e le Atua ia te oe e faasoa atu ai lau molimau ma ou lagona e uiga i le talalelei i isi? O lenei fesili ua faatuina e lo matou aiga i luga o se saililiiga e aoao po o a tatou meaalofa ma auala tatou te faaaogaina ai e molimau atu ai e uiga i le Faaola.

A o'u suesue i a'a o le faatufugaga, ua ou aoao ai e faapea o faatufugaga e iai se pogai e sili ona paia i le Atua. O la o le Mataisau o mea matagofie uma, mama, ma le moni. O soo se ituaiga o matagofie e afua mai ia te la. Ua o se mea fou maoae lea mo au i le avea ai ma se tusiata. E faamoe-moe lava, e ala atu i galuega a o'u lima, o le a mafai ona ou tuua lenei mea o se molimau mo lau fanau ma isi.

Aoao atili e uiga i le malaga a Niki o le faatuatua i le [lds.org/go/81739](https://lds.org/go/81739).

Tagai i faatufugaga musuia mai tagata i le salafa o le lalolagi i le [lds.org/go/817art](https://lds.org/go/817art).

## "OU TE ILOA O LOO SOIFUA LE ATUA"

**O**u te sau mai Nigeria, o se atunuū e tautatala faa-Peretania, o lea ina ua valaauna a'u e auauna atu i le misiona a Benin Cotonou ma iloa ai o le a ou tautala faaFarani, sa ou popole lava. O le a faapefea ona ou aoao atu le talalelei? E pei ona ou faamoemoeina, sa ou tauivi e aoao le faaFarani ao i ai i le nofoaga autu mo le aoaoina o faifeatalai i Kana. O le tele o taimi ou te lagona ai le toetoe lava a leai se faamoemoe.

Ona oo lea, i la'u eria muamua, sa talosagaina a'u e tuuina atu la'u molimau i le paranesi *i le faaFarani!* Sa nonofo tagata uma i le filemu a o o'u savali lemu atu i le pulelaa. Sa ou tagoifo i la'u taga mo le molimau puupuu na ou tusia i lalo. Ae ou te lei mauaina! Na lofituina a'u i le fefe i lena lava taimi!

Ina ua ou tilotilo atu i foliga aulelei i o'u luma, sa faatumulia o'u mata i

loimata. Sa matuai tele naua mea na ou manao e faasoa atu, ae ou te lei iloa pe faapefea ona fai atu. Sa ou fai atu na o le mea lava na ou mafaia i le faaFarani: "Ou te iloa o loo soifua le Atua."

Sa ou saofai ifo i lalo ma i le taimi atoa o le sauniga na totoe, sa ou tatalo ai i lou loto. Sa ou tau atu i le Tama Faalelagi na ou manao moni lava e tautala i le faa-Farani, ma afai o le a ia fesoasoani mai ia te au, o le a ou auauna atu ia te Ia ma lou loto atoa.

I le tolu masina mulimuli ane na asia ai e se ulugalii faamisiona fou mai i le Iunaite Setete le paranesi. Sa talosagaina foi i la'u e fai a la molimau. Sa savali atu le tamaitai i le pulelaa, na fai atu ni nai upu i le faaFarani, ona tu lea. Na tafe ifo loimata i ona mata. Sa leai se pisa i le falesa. Sa ou savali atu ia te ia ma fesili atu pe mafai ona ou faaliliu mo ia.

"Oi, o le a matagofie tele lena mea,


Elder," o lana tala lea. Sa ou lagonaina le Agaga a o ia tautala faa-Peretania, ma sa ou faamatalaupu i lana molimau, upu i le upu, i le gagana Farani.

Ina ua maea le sauniga sa fai mai le faletua o le peresitene o le paranesi ia te au, "Ou te manatua le umi o le taimi na e faapea mai ai, 'Ua ou iloa o loo soifua le Atua' ina ua faatoea e taunuū mai. Ioe, o loo soifua moni lava le Atua ma na Ia pai atu i lou laulaufaiva."

Ou te iloa e malamalamā le Atua i gagana uma ma soo se faafitauli tatou te fetaiai. O loo i ai o Ia iina e fesoasoani pe a tatou tuu atu lo tatou faatuatuaga ia te Ia, ma Na te faamanuiaina a tatou taumafaiga pe a tatou taumafai. Ona sa Ia taliina la'u tatalo, ua mafai ona ou aoaoina atu le talalelei i le faaFarani ma ua faamanuiaina ai lo'u olaga. ■

Donaldson Izekor, Iuta, ISA

**O**le a faapefea ona ou aoao atu le talalelei i le faaFarani?




# PE NA OU MANAOPIA LE FAAMANATUGA?

**U**a toe lima minute fai le sauniga faamanatuga, ae o lenei ua ma aafia i se tauiviga ma se tamaitiiti, faalua na malolo mo le faletaele, o se suiga o le napekini, ma le tele o le feei mai "ua ou fiaai!"

I le avea ai ma se tina o se fanau e toalima e i lalo ifo o le valu tausaga, faatasi ai ma se tane e faatoa faatagaina e lana galuega o ia e sau i le fale i faiiuga o vaiaso, e masani lava ona ou lagonaina le vaivai pe a oo mai le Aso Sa. A o savavali atu lo matou aiga i totonu o le falesa i Aso Sa, ma te sauニア ma lou toalua mo se itula o le mea ma te fia ta'ua o le "talitiga."

E faatoa sefululima minute i se tasi o sauniga, ae amata ona ee le ma pepe e iva masina le matua. Sa ou taumafai e faanana ma faafilemu o ia. I le toilalo, sa iu lava ina ou aveina o ia i fafo o le falesa e faatoafilemu ai o ia. A o ou nofo i lalo, sa amata ona taulai atu lou mafaufau i lou vaivai ma manaoga o le aluga o le vaiaso fou. Sa ou lagonaina le lofituina.

Na faafuasei lava, ona faateia au i se alii talavou o loo uuina se fata o le faamanatuga. "Pe te manaomia lenei mea?" sa ia fesili ai. Sa o se fesili faigofie, ae na ootia ai lou agaga. Na vave lava ona faatumulia au e le Agaga, ma na oo mai loimata i ou mata. Sa ou



**S**a faateia au i se alii talavou o loo uuina se fata o le faamanatuga. "Pe te manaomia lenei mea?" sa ia fesili ai.

mafaufau ia te au lava: "E sili atu nai lo le mea e te iloaina."

O manaoga ma tiutetau-ave o aso taitasi e mafai ona faavaivaia i tatou i le vaiaso atoa, ae o le faamanatuga e mafai ona toe faatumuina i tatou. A o ou ai ma inu i le faamanatuga, sa ou lagonaina le filemu ma le faamalologa ua tafe i totonu ia te au. I lena lava taimi sa ou iloaina ai na ou manaomia le faamanatuga e sili atu nai lo se isi lava mea ona ou te manaomia le Agaga e faatasi ma au.

Na taulai atu lau vaai i se ata vali i le potu malolo o le Faaola o loo faaloaloa mai Ona aao. Sa faatumulua lou loto i le agaga faafetai a o ou mafaufau loloto i Lona saunia i taimi uma e faamalolo ma faamalosia i tatou. E faamanatu mai ia te au lenei mea i Aso Sa taitasi a o ou ai ma inu i le faamanatuga. Ou te faafetai ona o le Agaga na aoaoina au e ala mai i se fesili faigofie e faapea i le lotolotoi o luitau o le olaga, o le Faaola o lo tatou punavai o le malosi ma le filemu. ■

Julie Archer, Iuta, ISA

# SA TOE VALAAU MAI LE ATUA IA TE AU

na ua maea lau aoga i le kolisi, sa avea au ma se saienitisi suesue. I le aoaoina i metotia faasaienitisi, sa ou taliaina ai na o mea e mafai ona lagonaina ma faamaonia. Sa ou ola e aunoa ma le faatosinaga a le Atua i lo'u olaga; O a'u moni lava o se tagata e le talitonu i le Atua.

Ona oo lea i se tasi taeao sa ou maua ai se valaau faapea o lo'u atalii sa aafia i se faalavelave tau taavale matautia. I le agai atu i le falemai, sa


ou lagonaina le musuia e fai le tatalo a le Alii, lea sa ou aoaoina a o laitiiti. Ou te lei manatuaina, ae sa ou lagonaina e tatau ona ou tatalo pea.

E ui lava ina sa valaau mai le Atua ia te a'u, ina ua mavae le faalavelave ma toe manuia mai lo'u atalii, sa ou faaauau pea ona ola e aunoa ma Ia i lo'u olaga.

I ni tausaga mulimuli ane, sa amata ona ma tafafao faamasani ma se tamaitai e igoa ia Rubí. O ia o se

tagata o Le Ekalesia a Iesu Keriso o le Au Paia o Aso e Gata Ai, e ui e le'i toaga o ia. Sa ma faatasi mo le tolu tausaga ina ua ia amata ona lagonaina le manao e alu i le lotu. Na te fai mai ma te o faatasi ma ia, ae sa ou musu lava i taimi uma.

I se tasi aso na oo mai ai faifeautalai i lo matou faitotoa. Sa la tuuina mai ia te a'u se Tusi a Mamona ma tuua ai au ma ni galuega atofaina e faitau. Sa ou faitauina mea na la talosagaina au e



Olenei ua ou vaai i le aao o le Atua i mea uma.

## O VAVEGA E TELE A CRISTINA

faitau ae sa leai se mea na ou lagonaina. Sa ou auai atu foi i le lotu ae sa ou le talitonu pea i taimi uma. E ui i lea, sa ou lagonaina e tatau ona faaaauau pea ona ou faitauina le Tusi a Mamona. Sa toe valaau mai le Atua ia te au.

A o faaaauau ona ou faitau, sa amata ona ou lagonaina e moni le tusi. Na faateleina lo'u faatuatua. Ina ua ou oo atu i le 3 Nifae 13:9–13 ma faitau i le tatalo a le Alii, sa faatumulua au i le Agaga. Sa ou tagi masusu. Sa toe valaau mai le Atua ia te au mo le taimi lona tolu. O le taimi lea sa ou faalogo.

Na tuputupu ae lou faatuatua i le Atua. Sa ou fia iloa atili. I se taimi puu-puu lava, sa ou faitauina uma ai tuis-tusiga faavae. Sa faaaauau pea ona ou auai i le lotu, ma ina ua uma ona ma faaipoipo ma Rubí, sa ou papatiso loa. O le a le galo lava ia te a'u le olioli na ou lagonaina a o faamauina au o se tagata o le Ekalesia.

I le taimi nei o loo avea pea au o se sainenitisi suesue. Ae ua ou vaai nei i le aao o le Atua i mea uma. Ou te ioe faatasi ma Alema, lea na faapea mai, "Ua faailoa mai i mea uma o loo i ai se Atua; ioe, e oo i le lalolagi, ma mea uma ua i ona luga, ioe, ma lona faataa-milosaga, ioe, ma paneta uma foi o loo i o latou ala masani ai ua molimau mai o loo i ai se Foafoa Silisiliese" (Alema 30:44). ■

Sergio I. Alva Estrada, Aai o Mekisiko, Mekisiko

**U**a molimauina e lo matou aiga le tele o vavega ona o lou tuafafine, o Cristina. Sa fanau mai o ia ma se faaletonu matuia o le fatu. Ina ua siakiina o ia e le fomai, sa latou tau atu i ou matua atonu o le a le faasaoina o ia. Ae peitai, sa siina e ou matua, le la pepe vaivai i o la lima ma tuu atu lo la faatuatua i le Alii. O le faasaoina mai o le ola o Cristina sa avea ma se vavega.

Na mavae atu tausaga, ma na avea Cristina ma se tamaitai malosi, atamai, taalo fiafia, ma aulelei. Ina ua 12 ona tausaga, sa ia manaomia se taotoga e tuu ai se faasolototo palasitika i lona fatu. Sa matou popole pe faasaoina mai o ia mai le taotoga, ae i le malosi tele ma le lototele, sa ia faatofa mai ia i matou ma ulufale atu i le potu tipitipi.

Na faasaoina Cristina mai le taotoga ma na toe foi mai i le fale ia i matou. Sa faaalia pea e ia le fiafia ma faafetai i le Tama Faalelagi ina ua ola ma maua le avanoa e aoao ai ma tuputupu ae. E lei mafai ona vaai faalemafaufau uo faapea sa i ai se faaletonu i lona fatu, aua sa matua malosi lava o ia.

Ina ua toe manuia mai se mai o le pe atoa o le tino ina ua 16 ona tausaga, sa talosagaina ai Cristina ina ia fesoasoani e aoao le seminare. Sa ia uunaia le toatele o tamaiti aoga a o latou taulotoina ia mau, ma aoao mai le Tusi a Mamona. Sa taina foi e Cristina le piano ma e fiafia e pese. Na te lei tau faatali lava ina ua valaaulia o


ia e taitaia se aufaipese o tagata e 60 mo se konafesi a le uarota.

Ina ua 22 ona tausaga, na faaipoipo ai Cristina i se alii talavou i le malumalu mo le faavavau. E lei leva ona faaipoipo, ae valaauina o ia e avea ma peresitene o Tamaitai Talavou i lana uarota.

Ina ua 26 ona tausaga na vave lava ona faiifo le malosi o Cristina. Sa alu atu o ia i Sao Paulo mo ni suesuega. O iina sa ia iloa ai sa ia manaomia se isi taotoga. I le taimi o le taotoga, na oso ai le fatu o Cristina lea na mafua ai ona faaleagaina le faiai. Na mavae atu masina, ma sa lei faasolo manuia o ia. I le avea ai o se aiga sa matou faapotopoto faatasi e anapopogi ma tatalo mo lona toe manuia, ae sa lei faasolo manuia o ia. Sa matou filifili e toe anapopogi, o le taimi lea e ole atu mo se fesoasoani e talia le finagalo o lo tatou Tama i le Lagi. O le aso na sosoo ai na maliu ai Cristina.

E le o le mea lea na matou faamoemoe i ai, ae na matou iloaina o lenei mea o se vavega foi. E le o toe mafatia Cristina. Ua aumaia e le talalelei le olioli ma le filemu ia i matou, e oo lava i taimi o le loloto o le faanoanoa. Aua ua uma ona faamauina i matou, ua matou iloa e mafai ona matou toe faatasi ma Cristina. ■

Gislaine Batista Pires Skraba, Paraná, Pasila



# O Le A Le Inisitituti?

**Saunia e Wayne L. Davis**

Seminare ma Inisitituti

Ina ua uunaia e Elder M. Russell Ballard o le Korama a Aposetolo e Toasefululua le autalavou matutua ina ia avea ma “le tupulaga silisili . . . i le talafaasolopito o le Ekalesia”, o se tasi o mea sa ia fautuaina i latou e fai o le lesitala lea i se inisitituti o mataupu faalelotu. Sa ia folafola atu e faapea o le faia o lena mea, o le a sili atu ai ona saunia i latou mo se misiona, faaipoipoga e faavavau, ma le olaga o se tagata matua, ma e sili atu ai ona mafai ona maua le musumusuga ma le taitaiga mai le Agaga.<sup>1</sup>

Ae afai e te le mautinoa lelei po o le a le inisitituti o mataupu faalelotu o le Ekalesia ma le auala e mafai ai ona faamanuiaina ai lou olaga pe a maea le aoga mauluga, o le a ou taumafai e tali ni nai fesili o loo ia te oe.

## O ai e Mafai Ona Auai?

O le tele o le autalavou e filifili ia auai i le seminare, ae ona a lea? O nisi o tamaiti aoga e auai atu i se iunivesite a le Ekalesia po o le kolisi, ua tuu i ai kosi o aoaoga faalelotu i totonu o a latou faatulagaga o le aoga. Aisea? Aua o le mauaina o se aafiaga i aoaoga

faaleagaga faatasi ai ma se aafiaga faaleaoaoga faaleatamai e taua tele.

Ae faapefea la pe a faapea e te le auai i se aoga a le Ekalesia? O le toatele o le autalavou matutua latou te le iloaina e faapea o se tuufaatasiga o aoaoga faaleatamai ma le faaleagaga o loo maua toetoe lava i soo se mea latou te o i ai. A o e auai i le kolisi, o loo i ai se polokalama o aoaoga faalelotu o le inisitituti e masani lava ona latalata ane, e masani lava i le isi itu auala mai le kolisi po o se fale o le Ekalesia i le lotoifale. E oo lava i nisi kolisi latou te faatagaina vasega o le inisitituti e aoaoina i o latou lava lotoa. E tusa lava pe ua maea le faauuga a le kolisi, e taliaina pea oe ia auai.

E le faapea seiloga e avea oe ma se tamaitiiti aoga i le kolisi. E mafai ona auai autalavou matutua uma, o le vaitausaga 18–30, faaipoipo pe nofofua, i le inisitituti.

Asiasi i le [institute.lds.org](https://institute.lds.org) e sue ai se inisitituti e lata atu ia te oe.

## Aisea e Auai Ai?

Na amata le polokalama i le na o le 57 tagata e lata ane i se kolisi i Moscow, Aitaho, ISA, ma ua i ai nei le silia ma le 250,000 tamaiti aoga

i le lalolagi atoa. Ua latou vaaia le tele o le malosiaga ma faamanuiaga ua sasaa mai i o latou olaga. I se suesuega talu ai nei, sa fesiliglia ai tamaiti aoga o inisitituti i le 10 atunu eseese po o le a se mea ua faia e Inisitituti mo i latou. Aisea na latou o ai? Na faapefea ona fesoasoani? E faitau afe tali sa ao mai ma faaalia ai ni autu taua se tolu: e fesoasoani le inisitituti i tamaiti aoga e (1) faamalosia la tatou sootaga ma Iesu Keriso, (2) agai ai i luma faaleagaga, ma le (3) ia maua le toafimalie e faia ai faaiuga taua o le olaga.

**Aua e te misia ia faigauo, puipuiga faaleagaga, ma le malamalamo o le talalelei.**

Mafaufau i filifiliga e te feagai ai: filifilia o se kolisi; filifili pe alu pe leai i se misiona; ma le filifilia o se galuega, uo, ma se toalua. O ni faaiuga tetele nei. Ma e pei ona saunoa mai Peresitene Thomas S. Monson, "O filifiliga e fuafua ai taunuuga."<sup>2</sup> E mautinoa lava o nei faaiuga e tatau ona faia faatasi ai ma le fesoasoani a le Agaga Paia. E mafai ona maua le fesoasoani faalelagi e manaomia a o e fesootai atu i le Agaga, o tusitusiga paia, ma uo o e tutusa o outou tulaga faatauaina e ala mai i se vasega faalelotu i le inisitituti po o se aoga a le Ekalesia.

O Laura o se tasi o tamaitiiti aoga na faamanuiaina mai le inisitituti. Ina ua ia amata ona auai i se iunivesite i Ontario, Kanata, sa ia lagonaina ua

leiloa ma sa lagonaina faapea o lana molimau e le o toe malosi e pei ona sa i ai muamua. Sa amata ona alu i le inisitituti ma na toe "lagonaina lona taua" ma "iloa ai po o ai o ia." (Tagai i lana tala ma tala a isi talavou matutua i le [InstituteIsForMe.lds.org](http://InstituteIsForMe.lds.org).)

Pe a e iloa moni po o ai oe—o se atalii po o se afafine o se Tama Faalelagi alofa o le e finagalo e avea oe ma se tagata maoae—e mafai ona e faia ni faaiuga taua e taitai atu ai i le fiafia ma le manuia.

A o e ola i mea na e aoaoina i le seminare ma isi aafiaga faale Eklesia, o le auai i le inisitituti o le a faamalosia ai la ouluia sootaga ma Iesu Keriso i se vaitaimi e sili ona taua o le olaga ma fesoasoani ia te oe e faaauau ai

pea lou alualu i luma faaleagaga.

E alofa le Tama Faalelagi ia te oe. O le a Ia saunia le auala mo oe e faaauau ai ona avea faapei o Ia. O le inisitituti o se tasi o na auala e faia ai se eseesega i le faitau selau o afe o olaga i tausaga taitasi. ■

#### FAAMATALAGA

1. M. Russell Ballard, "O Le Tupulaga Silisili o Talavou Matutua," *Liahona*, Me 2015, 68, 69.
2. Thomas S. Monson, "Mulimuli i Perofeta," *Liahona*, Ian. 2015, 5.

#### O A MEA O LE A E AOAOINA?

Ua ofoina mai e le Inisitituti ni kosi eseese. E valaaulia uma tamaiti aoga e aveina ia kosi o le maatulimanu e fa:

- O Iesu Keriso ma le Talalelei e Faavavau ua aoao mai e uiga i le misiona paia a Keriso ma le auala e mafai ai ona e talisapaia Lana matafaioi i lou olaga.
- O le Aiga e Faavavau ua sailiilia autu e pei o le malamalama i le sootaga i le va o le itupa ma le faasinomaga e faavavau, le faatinoina o le faatuatua i tulaga faigata o le aiga, ma le faaleleia o le tapuai i le malumalu.
- O Faavae o le Toefuataig e faamatalaina le faavae faaleaoaoga faavae ma le talaaga o le faasolopito o le talafaasolopito o le Eklesia ma le auala e faatatau ai ia te oe i le aso.
- O Aoaoga ma Aoaoga Faavae o le Tusi a Mamona o le a fesoasoani e te malamalama ai i aoaoga autu taua o lenei tusi o tusitusiga paia lea sa tusia mo o tatou aso.



# O Le Inisitituti E mo i Tatou

**Saunia e Leah Welker**

Mekasini a le Ekalesia

**E** tele naua mea e ao ona tatou faia. O nisi o i tatou o ni tagata aooga. O nisi o loo galulue i ni itula se tele. O nisi o i tatou ua nonofe ese mai aiga ma uo, pe ua i ai tiutetauave ua mamafatu i o tatou luga. O nisi o i tatou o loo taumafai e faamasani ina ua foi mai i se misiona, pe faatoa uma ona faauu mai le aoga mauluga ma ua le mautinoa po o le a le mea e sosoo ai.

E mafai ona foliga mai e feteenai le faaopoopo atu o le inisitituti i luga o mea uma lava. O le toatele o i tatou na mafaufau i se tasi taimi po o se isi, pe o le a fesoasoani moni le inisitituti ia te a'u?

O le tali o le *ioe*.

Sa maua e le faitau afe o autalavou matutua i le salafa o le lalolagi, o le toatele o i latou i tulaga e pei o outou, le malosi, lagolago, faauoga, ma le faatamaoaigaina faaleagaga i le inisitituti. O ni faataitaiga ofoofogia nei se lua o ni talavou matutua o e, e

ui lava i a la luitau uma, na iloaina o le inisitituti e mo i laua.

## O le Inisitituti e Lelei Mo le Fatu

*O le Tala a Aric, i Toronto, Ontario*

O Aric (i le itu taumatau pito i luga) o se tamaitiiti aoga faafomai PhD i le Iunivesite o Toronto, sa galue i vaega o le fatu ma vailaau mo le toefaatupulaia o vaega ua le lelei.

I le faamatalaina o lana suesuega, na ia faamatala mai ai, "O nisi ituaiga o selu autu e mafai ona liua i soos se mea lava i lou tino. E mafai ona tatou tuu ni selu autu i se ipu suesue ma faatupuina ae i latou o se selu o le fatu. A mavae ni vaiaso se lua, o le a amata ona tata i latou lava. Ona matou faaaogaina lea o nei selu o ni faataitaiga o faamai eseese ma faataitaiga i ai ni vailaau eseese. O lau sini e faapea o le a i ai se aso e faatupu ae ai se fatu i se faatulagaga o le falesuesue faapenei."

Na i ai ia Aric sona lava suiga o le loto i le taimi o lana misiona i Belo Horizonte, Pasila. "A o ou auauna

**E mafai faapefea ona faamanuiaina e le inisitituti o mataupu faalelotu a le Ekalesia lou olaga?**

atu i se misiona, sa ou aoaoina le auala e faalogo ma mulimuli ai i le Agaga. Na fesoasoani ou te aoao ai le auala e suesue ai, ia aoao ai le auala e faaaoga ai ia te au lava ia." Sa matuai suia lava o ia ma sa popole ai e uiga i le sau i le fale. "Ou te lei iloa moni le ala e amio ai ma po o a mea e fai," sa ia tauina mai. "Sa tatau ona ou toe aoaoina le ala e amio ai i ni tulaga faapitoa. O le alu i le inisitituti na fesoasoani ia te au."



E taua ia Aric le upegatafailagi faaagafesootai i le inisitituti. "Na mafai ona ou faaou atu i tagata o loo manaomia ni uo. Na mafai ona ou faamafanafanaina tagata pe a latou manaomia le faamafanafanaga. E taua lena mea ia te au, e fesoasoani i isi tagata, ae e taua foi ia te au le lagona o lena mea mai isi foi tagata."

E tausua o ia e uiga i le umi ona ia alu i le inisitituti, ae o loo alu pea. "O taimi uma lava ou te alu ai, ou te lagonaina le Agaga o loo i ai iina. Ma e fesoasoani ia te au e avea ai ma se tagata e sili atu ona lelei, ia tumau ai i nofoaga lelei, ma manuia ai i lau galuega."

Na aumaia e Aric se faatusatusaga i le va o lana galuega ma le inisitituti. "Afaí tatou te tuu se selia i se siosiomaga lelei, e i ai suiga i totonus e tutupu i le selia e mafai ai ona sili atu ona ia taliaina na suiga lelei po o na faailoilo lelei tatou te mananao e tuuina atu i ai. I le aluga o taimi, e suia le selia—e suia i se mea e sili atu, i se mea e tele atu nai lo ia lava. Mo au, o se mea lena e matuai taua tele lava. Afaí ou te tuua au lava i totonus e siosiomaga sao, ona sili atu lea o lou taliaina o nei vaega faaleagaga o le olaga ae ititi le taliaina o faatosinaga le lelei e tutupu i le lalolagi."

Sa ia faaiuina, "e moni le Atua. O se mea lena ou te lagonaina i totonus i le loloto o lou lava loto. Ou te lei lagonaina muamua i taimi uma Lona alofa i lou olaga. Ua amata ona ou iloaina lena mea ona o filifiliga na ou faia. Ua ou iloa o loo i ai o Ia iina e fesoasoani mai ia te au, ma e finagalo moni lava o Ia ia te au ia avea ma tagata e sili ona lelei."

## E Fesoasoani le Inisitituti ia te A'u ia Manatua Keriso

O le Tala a Veronica,  
Madrid, Sepania

Ina ua 17 tausaga o Veronica (ata i lalo ifo), sa maliu lona uso masaga i ona lima. E tolu tausaga talu ona mavae le maliu o lona uso, i le tuua toatasi nao ia ma le tauivi ai i le olaga, sa amata ona alu Veronica mo ni savaliga ina ia fesoasoani i ona

### O MEA E TATAU ONA ILOA E TAITAI E UIGA I LE INISITITUTI

**O**talavou nofofua matutua uma lava e lei faauu mai se iunivesite a le Ekalesia po o se inisitituti o mataupu faalelotu e tatau ona uunaia ina ia lesitala ma faauu mai le inisitituti.

E fefautuaai faatasi taitai i le lotoifale e fatu se fuafuaga lelei e iloa ai ma valaaulia talavou nofofua matutua taitoatasi ia auai i le inisitituti. Ua saunia tagata faigaluega o le seminare ma le inisitituti e fesoasoani atu i taitai perisitua i nei taumafaiga.

O taumafaiga sili ona lelei e aofia ai vaega nei:

- **O Taitai perisitua** e taitaia le polokalama.
- **O valaaulia patino** e tuuina atu i talavou matutua.
- E faaaoga e taitai se **polokalama o le tali atu** e toe lipoti mai ai i le valaaulia.

lagona o le faanoanoa. Sa ia talitonu i taimi uma lava i le Atua, o lea i setasi aso a o ia savali, sa ia tatalo, "Le Alii e, aisea ua e faia ai nei mea uma ia te au?"

O le taimi lena, sa ia tepa ae ai i luga i se fale o le Ekalesia o le AAG sa ia ui atu ai i taimi uma lava. I le faatoa vaai moni lava lea i ai mo le uluai taimi, sa amata ona ia fialoa; sa alu o ia i totonu ma faailoa atu o ia lava i ni tamaitai faifeautalai se toalua, o e sa aoaoina o ia i se taimi mulimuli ane i lena vaiaso.

Fai mai Veronica ina ua uma le lesona muamua, "Sa ou tu ae i luga ma fai atu ia i laua, 'Lua te valea uma lava', ma sa ou tuua i laua." Sa lei manao o ia i soo se tasi o na mea, ae na iu ina amata ona ia toe mafaufau.

"Ou te manatu o le taimi muamua lea sa ou matuai tatalo ai. Sa ou lagonaina le pei na tau mai e le Atua ia te au, 'ua ou auina atu lenei avanoa ia te oe ina ia e mafai ai ona iloa atili au. Pe e te le manao i ai?"

Sa tonu ia te ia *na* ia manao i ai. E ui lava i le aveesea o lona aiga ma lana galuega ona o le talalelei, sa papatisoina o ia. E ui lava ina sa faaauau pea le faigata o lona olaga i nisi o taimi, sa ia faalagolago i le Alii. "Ae ou te lei iloa e uiga i le Ekalesia, sa ou tagi pe ita pe afai ou te le iloa pe faapefea ona ou totogiina lou fale mautotogi. Ae o lenei ua ou iloa o le a fesoasoani le Alii."


O le faamanuiaga faapeteriaka a Veronica na tau atu ai o le a ia auauna atu i se misiona, ae sa leai ni ona sakete po o soo se auala lava e faatau ai. Na ui atu i le eria se tasi o le au Fitugafulu ma lona faletua ma faalogo e uiga i lona manaoga; na musuia le faletua e teuina ni sakete

faaopoopo mo le malaga, ma na ia tuuina atu le tele o na sakete ia Veronica. Sa ia uunaia foi Veronica e auai i le inisitituti. Ina ua amata e le epikopo a Veronica se polokalama o le inisitituti mo lo latou eria, sa amata ona ia auai soo atu i ai.

Na tuuina atu e le inisitituti ia te ia le filemu ma le fiafia. "Ou te manatu o le mea e sili ona ou fiafia i ai i le inisitituti aua i le aluga o le vaiaso, e tele naua a tatou galuega e fai. Ua i ai a tatou Aso Sa e faafou ai a tatou feagaiga ma le Tama Faalelagi. Ae o le Aso Gafua, Aso lua, Aso Lulu, Aso Tofi, Aso Faraile, o le a sa tatou mea e fai? Ou te faafetai ua i ai le inisitituti e le ititi ifo ma le faatasi i le vaiaso atoa aua o se auala e manatua ai Iesu Keriso. O le inisitituti o se tasi lea o auala e fesoasoani mai ai o Ia ia te au ia alualu ai i luma."

Ma na auauna atu Veronica i se misiona. Ia Oketopa 2016, sa ia tuua ai e auauna atu i le Misiona a Chile Osorno.

Fai mai o ia, "Ou te iloa ua ou i ai iinei i le taimi nei ona o Ia. Ou te iloa ua Ia saunia se fuafuaga atoatoa mo i tatou taitoatasi. O le a Ia tuuina mai ia i tatou ni avanoa i o tatou olaga atoa. E mafai ona ou lagonaina Lona alofa i aso uma, e ui lava o nisi taimi ou te fai atu, 'Tama, aisea ua tupu ai lenei mea ia te au?' Ae ou te



## VALAAULIA LE AUTALAVOU MATUTUA I LE INISITITUTI: O SE TALA FAAMANUIAINA

**O**le valaauliaina o talavou matutua uma e auai i le inisitituti o se tasi o sini a le Ekalesia. E fuafua lava i le siteki, o lenei taumafaiga e mafai ona aofia ai ni nai taitai:

- Taitai faamaopoopo o le inisitituti
- Au peresitene o siteki ma epikopo
- Faiaoga o le inisitituti
- Sui o le autalavou matutua nofofua
- Tamaiti aoga

Ua ofoina mai e se nuu laitiiti i Niu Sila se faataitaiga maoae lava o le auala na o mai faatasi ai taitai o le tasi siteki e fatu se vasega o le inisitituti e faaleleia ai le auauna atu i manaoga o lo latou eria.

Sa manao le epikopo o le uarota a Ngaruawahia, o Sam Higgins, e iloa pe faapefea ona mafai ona ia fesoasoani i le autalavou matutua o lana uarota. Na fautuaina e Peresitene Bobby Hamon, le fesoasoani lua i le au peresitene o le Siteki a Hamilton New Zealand, le inisitituti, ma sa ia faafesootai atu ia Jonathan Warwick, le taitai faamaopoopo mo le inisitituti mo lena eria.

Ua faamalamalama mai e Brother Warwick, "O le taimi muamua, sa matou fautuaina e faateleina le faasalalauga ma le fesootaiga faaletagata lava ia e uunaia ai tamaiti aoga e fai le malaga e 30-ile-45 minute i Hamilton e auai atu i le vasega inisitituti o loo i ai. Ae na lagona e tagata uma o le i ai o se vasega i le Ngaruawahia o le a fesoasoani i tamaiti aoga e lagonaina e pei o la e i ai i le aiga."

Faatasi ai ma le fesoasoani a se ulugalii matutua faamisiona, na latou fatuina se vasega inisitituti i Ngaruawahia. Ua faatupulaia le vasega mai i le 2 tamaiti aoga i le silia ma le 40.

Fai mai Brother Warwick, "Ua avea le vasega o le inisitituti a Ngaruawahia ma se tali faavavega i tatalo. E ala mai i lenei vasega, ua faamanatu mai ai i tagata faapea e alofa moni lava le Alii i Ana fanau taitoatasai ma e naunau e tuuina atu ni vaifofo o le a faamalolosia ai a latou molimau ia lesu Keriso, fesoasoani ia i latou e oo atu i le liua tumau i le talalelei, ma fesoasoani ia latou lagonaina le mana o le Togiola a lesu Keriso i o latou olaga."

Mo nisi manatu mai nei taitai e uiga i lenei aafiaga faamanuiaina pe mo se fesoasoani i le auala e galulue faatasi ai i le faamalolosia o le autalavou matutua i la outou siteki, asiisi i le [lds.org/go/81747](https://lds.org/go/81747).



lei alu e moe, Na te tali mai, 'Ua tupu lenei mea ona o lenei mea. Alu loa e moe.' Ma ou te alofa foi ia te Ia. Atonu sa tatau ona ou oo i mea uma lava sa ou oo i ai ina ia ou lagona ai le alofa tele mo Ia." ■

## O LE INISITITUTI E MO AU— TALA I VITIO

Matamata i tala ia Aric, Veronica, ma isi talavou matutua i le [lds.org/go/81749](https://lds.org/go/81749).



## IA AVEA LE INISITITUTI O SE FAAMUAMUA

"Mafaufau i ai. O le a maua ai ni uo, o le a lagonaina ai le Agaga, ma o le a faamalosia ai le faatuatua. Ou te folafola atu ia te outou, a o outou auai i le inisitituti ma suesue ma le filiga i tusitusa paia, o le a faateleina lo outou malosi e aloese ai mai faaososoga ma maua le taitaiga a le Agaga Paia i mea uma tou te faia. O se folafolaga lena ou te tuuina atu ia te outou."

Peresitene Thomas S. Monson, 21 Ape., 2009,  
[si.lds.org](https://si.lds.org).

# SEMINARE: Lea Tatou te Faia ai ni **FESOOOTAIGA**

I le tele o itu, o le seminare lea e o mai faatasi ai mea.

**Saunia e David A. Edwards**

Mekasini a le Eklesia

**P**e e te lagonaina i nisi taimi le tuua toatasi a o e taumafai e malamalama i lou olaga, ou tofotofoga, ma tusitusiga paia? Afai o lea, o le auala la e tasi e sao ai mai lenei lagona o le faia o ni fesootaiga.

O se tasi o nofoaga sili ona lelei e faia ai lenei mea o totolu o le seminare. O nisi nei o fesootaiga e mafai ona e faia iina.

## Fesootai ma Isi Tagata

O le seminare o se faamanatu tele lea e le o tuua na o oe. Ma o se nofoaga sili e fesootai ai ma isi i se siosiomaga e saogalemu ma lagolagoina.


Pe tou te feiloi i aso uma i totolu o se potuaoga po o le faia o suesuega i le fale po o le initoneti, o le seminare e faafesootai ai oe ma isi talavou faapea foi ma se faiaoga agaalofa. O tagata nei e mafai ai ona avea lou lava tagata ma tagata silisili. E mafai ona outou sailiili i tusitusiga paia, fai atu fesili, vaavaai mo ni tali, faasoaa atu manatu ma lagona ma aafiaga. E mafai ona outou talie, fetagisi, ma pepese faatasi—ma atonu foi e aai faatasi (fesili i lou faiaoga; afai o le tali e leai, aua le popole).

## Fesootai ma Tusitusiga Paia

E ui atonu na tusia tusitusiga paia i aso ua leva ma le mamao ese, o seminare e fesoasoani ia te oe ia oo atu ai i le atulaulau ma le taimi ina ia matuui fesootai lava ma i latou. E fesoasoani ia te oe e te malamalama ai i mea e tutusa ai ma eseesegea i le va o le lalolagi o ananafi ma le lalolagi i aso nei. Ma e fesoasoani e te iloa ai le tumau pea o le savali a le Atua i

Ona tagata ma le lalolagi. I lenei auala, e mafai ona fesoasoani le seminare ia te oe e iloa ai le auala e mafai ai ona fetalai mai le Atua ia te oe e ala mai i tusitusiga paia ma le Agaga e tuuina atu ia te oe le taitaiga talafeagai. E fesoasoani foi ia liliu ai tusitusiga paia e avea o se uo mo le olaga atoa—o se puna tumau o le mafanafana, fautuaga, ma le fesoasoani.





## Fesootai Tusitusiga Paia I Le Tasi ma le Isi

O le a se mea e fesootai ai aoaoga a Alema ma Mataio? Pe i ai se mea e tutusa ai Isaia ma le Mataupu Faavae ma Feagaiga? O le seminare e fesoasoani e te iloa ai le fesootaiga e noatia ai uma aoaoga o le talalelei faatasi i tusitusiga paia uma. O le taimi lava e te amata ai le faia o nei fesootaiga, ua mafai loa ona avea tusitusiga paia o se vaega aoga ma le manaia, e faapea foi le faauo ma le masani. O lenei mea o le a faaosofia lou fiafia i le faia atili o nei sootaga i le va o tusitusiga paia. Ma o iina tonu lava i le seminare e fesoasoani ia te oe e faia lena mea.

## Faafesootai Lou Taimi Nei ma Lou Lumanai

*Taimi nei-Oe* atonu ua faalogo i a *Oe-Lumanai*, ae e manaia pe a latou mafai ona faamasani lelei. E ala mai i le seminare e mafai ona e maua ai se manatu lelei po o ai lenei *Oe-Lumanai* tagata. Mo se faaitaiga, e mafai ona tatou vaaai pe faapefea ona faaaoga *Faifeautalai-Lumanai-Oe* tusitusiga paia e aoao ai tagata i le talalelei, foia o latou atugaluga, ma fesoasoani ia i latou e suia o latou olaga. Po o le a mafai ona e maua se vaaiga pe faapefea ona totoina e *Matua-Lumanai-Oe* se fiafia i tusitusiga paia i loto o fanau. Po o le a mafai ona e amata ona malamalamia pe mafai faapefea ona fesoasoani le taulai atu i upumoni faatusitusiga paia i *Auaunaga-Ekalesia-Lumanai-Oe* e auauna atu, aoao atu, ma musuia isi. Ma e moni lava, o le a e vaaia pe faapefea *Lumanai-Oe* aafia i le olioli patino, filemu, ma musumusuga mai se mausa o le suesueina o tusitusiga paia i aso taitasi.

## Fesootai ma Lou Tagata Moni Lava

O lou tagata moni o le vaega lea o oe e iloa le ituaiga o tagata e i ai oe, po o fea e te sau ai, ma po o ai ou Matua Faalelagi. O lou tagata moni lava e iloa foi lou gafatia moni, o le a le ituaiga mana o loo ua ia te oe, ma le mana tele e mafai ona e mauaina ai le avanoa pe afai e faia filifiliga sao.

A o e mauaina le atamai i aoaoga faavae i tusitusiga paia i le seminare ma lagona ai le Agaga Paia ua faamautu mai le moni o i latou i lou loto, ua e faalolotoina ai lenei malamalamia. O le a e lagonaina foi le uunaiga a le Agaga e faatino—ia salamo, auauna atu, tatalo, aoao, ma faia mea uma i lou malosi e fesootai ai ma lou tagata e silisili ona lelei e silafia e lou Tama Faalelagi ma Iesu Keriso e mafai ona avea ai oe.



## Fesootai ma le Tama Faalelagi

E te faamalosia lau fesootaiga i le Tama Faalelagi a o e tatalo ia te Ia, aoao e uiga ia te Ia ma le Faaola, ma ola e pei ona La finagalo ia te oe ia ola ai. I le seminare e te aoao ai pe faapefea ona fetalai mai le Tama Faalelagi ia te oe e ala i tusitusiga paia ma le Agaga Paia, lea e oo mai ia te oe pe a e suesue ma le faamaoni i tusitusiga paia. E masani foi ona tuuina atu ia te oe e le seminare ni avanoa e tatalo ai, mafaufau loloto, molimau atu, ma faia ai le tele o isi fesootaiga i le Tama Faalelagi.

Tagai i le auala na faia ai e nei autalavou fesootaiga.

Marlou

O taimi uma lava ou te i ai i le seminare, ou te iloa e alofa le Tama Faalelagi ia te au ma e popole mo au! O le auai i le seminare ua faamanuiaina ai au i se malamala e sili atu le manino po o ai au ma pe aisea ua ou i ai iinei. O mataupu ma aoaoga faavae sa ou aoaoina i le seminare ua fesoasoani ia te au e fai ai filifiliga amiontonu. Ua sili atu nei ona ou naunau e auauna atu i se misionatalai ma ua fiafia e faasoa atu le talalelei i isi.

Marlou T., 20 tausaga, Sorsogon, Filipaina.



A o tuputupu ae, sa ou le toaga tele i le Ekalesia. Ou te lei maua se molimau maumaututu. Ae a o ou auai i le seminare i aso taitasi, sa ou aoaoina faapea e mafai ona e tatalo ma maua ai le faamafanafanaga ma tali. Sa mafai ona ou fesootai i tala o tusitusiga paia. Ou te manatu ou te lei fatauina lava e oo i se mataupu e au lava ia ae ou te lei auai i le seminare. Sa ou aoaoina mataupu faavae auto o le talalelei aua sa ou lesitala i le seminare. E mafai lava ona ou maua le filemu i taimi uma i le seminare. E le mafai ona lava lou faailoa atu faapea o le seminare o loo taijalaina e le Alii.

Brynn W., 17 tausaga, Idaho, ISA

Brynn



E ala mai i ou tausaga i le seminare, sa ou aoaoina ni mea se tele e uiga i le mea na ou sau ai, pe aisea ua ou i ai iinei, ma o le a le mea e tatau ona ou faia. Sa aoao mai e le seminare ia te au pe faapefea ona fai atu fesili ma maua tali. I le taimi muamua, sa faigata ia te au ona faaaoga tusitusiga paia ia te au lava ia. Ae i lesona taitasi, sa matou faatusatusaina i o matou olaga, sa le gata ina ou aoao i tala i tusitusiga paia ae na iloaina foi o lou olaga o se vaega o lena tala ma ua tuua e perofeta ni faatonuga mo au. Ona o lena mea, ua faigofie ai ia te au ona sue le ala sao ma fai ni filifiliga sao.

Anastasia V., 18 tausaga, Moscow, Rusia

Anastasia



Ua matuai faateleina lava lou fiafia i tusitusiga faavae i tau-saga taitasi o le seminare. O lenei fiafia sa fesoasoani ou te lagona ai se manao faateleina e faataunu le mea e finagalo le Tama Faalelagi ia i tatou e fai. Sa ia fesoasoani mai ia te au ia lagona se alofa faamaoni mo lou tuaoi. Sa ou maua le avanoa e faasoa atu ai le talalelei i tagata taitoatasi o loo siomia au. E ala mai i le seminare, o se polokalama musuia a le Atua, sa mafai ai ona ou aloese mai i faigata na tuuina mai ia te au e le lalolagi. Na fesoasoani mai le Tama Faalelagi ia te au ia iloa po o le a le ituaiga o afafine e finagalo o la ia avea ai au, po o a mea e tatau ona ou taulai atu i ai ma le ala e tatau ona ou amio ai.

Mirian C., 18 tausaga, o Kuatemala, Kuatemala



I nai tausaga ua mavae, sa ou tauivi ai ma le atutuvale faalemafaufau ma le popole tele. O le tausaga ua mavae sa sili atu ona leaga mo au. Sa mou atu lau molimau, ma na o le seminare le mea e tasi na fesoasoani ia te au e taulimaina ai le faafitauli. Sa ou feiloai i ni nai tamaitai na vave ona avea ma au uo mamae. Na amata ona i ai se uiga loloto o tusitusiga paia ia te au. Ma na aoao mai lo matou faiaoga i se auala na avea ai tala o le Feagaiga Fou ia lesu Keriso mai i aso la ua leva ia talafeagai i o tatou olaga talavou. Sa amata ona ou iloaina lou Faaola ma lou Tama Faalelagi. Na faifailemu lava e le gata na toefuatai mai lau molimau ae na amata foi ona sili atu le malosi ma le mausali. O lau tauviga i lou ola maloloina faalemafaufau e lei tuua lava au, ae ona o le seminare, o le faamoemoe lea sa leiloa o lenei ua faateleina. E i ai sau molimau ia lesu Keriso; Ou te iloa o loo soifua o la, e alofa o la ia i tatou, ma e mafai ona la tauaveina a tatou avega pe afai tatou te o mai ia te la. Ana leai le seminare semanu ou te le mauaina lena faamanuiaga.

Jalee D., 16 tausaga, Colorado, ISA



A o lumanai lou tausaga muamua i le seminare, sa ou le malamalama pe aisea e tatau ai ona tatou suesueina tusitusiga paia. Sa ou manatu na i ai na oni tala e le mananaia. Ae faafetai i le seminare, sa ou aoaoina ai, o tala taitasi o loo i ai se lesona taua ma ou te mafai ona faaaogaina i lou olaga i le taimi nei lava. Ua i ai lou manao e faaaauau le aoaoina o tusitusiga paia.

Oscar B., 15 tausaga, Limón, Costa Rica



Oscar

Sa ou papatiso ia Me 2016. Sa amata lou tausaga muamua o le seminare mulimuli ane i lena tausaga. Sa ou le talitonu i le taimi muamua, ma ou te lei saunia e ala vave i luga, ae sa uunaia au e alu. Sa fai si ou le mautinoa e uiga i le iloaina o le leo o le Agaga, ae o le i ai i le seminare na fesoasoani ia te au ia iloa lena leo. E ala i le Agaga, ua mafai ai ona ou iloa e moni tūsitusiga paia. Ou te iloa e uunaia e le Agaga au ia faailoga ni mau faatasai ai ma faauigaga ma e i ai lava i taimi uma se mafuaaga. O tusitusiga paia e taialaina au pe a ou se, ma latou te aoao mai ia te au. Soo se taimi lava ua i ai sou aso leaga, e mafai ona ou susueina ma avea ai lou aso ia sili atu ona leleli ■

Shelby L., 16 tausaga, Montana, ISA



Shelby

# O Le Ala e Mafai ai Ona E Fesoasoani i le **GALUEGA O LEMALUMALU**

*O galuega o le malumalu e aumaia le olioli ia te  
oe ma i latou e te alofa i ai.*

**Saunia e Megan Armknecht**

**N**a i ai se taimi na e matuai fiafia ai lava i se mea sa le mafai ona e faatalitali e amata? Atonu na e fiafia lava i le o atu ma lou tuagane e matamata i le taaloga a lau ‘au e sili ona e fiafia i ai, pe masalo na valaauliaina oe e lau uo mamae i se konaseti ofoofogia.

I le vaitau o le 1840, na toefuatai mai ai e le Atua se upumoni o le talalelei lea na matua fiafia ma faagaeetia



ai Iosefa Samita. Sa ia aoaoina e faapea e ala i le pule tatau o le perisitu, e mafai ona papatisoina tagata e ala i le fai ma sui mo e pele ia i latou o e sa lei papatisoina i lenei olaga.

Sa faapitoa lava le mataina ia Iosefa o le aoaoga faavae o le papatisoga mo e ua maliliu aua na maliu lona uso matua o Alavini i le 25 o ona tausaga e aunoa ma le papatisoina. Sa popole Iosefa e faapea sa faasalaina Alavini i le pagatia e faavavau ona sa lei papatisoina o ia i lenei olaga.

Ae e ala mai i faaaliga o le faaolataga mo e ua maliliu, sa aoaoina ai e Iosefa e mafai ona papatisoina Alavini e ala i le fai ma sui ma faaolaina i le malo selesitila (tagai i le MF&F 137).

### **Faasoaina atu o le Upumoni o le Papatisoga mo e ua Maliliu i Isi**

E le gata ina sa avea lenei tala o se mea fiafia i le aiga o Samita, ae sa avea foi ma se tala fiafia i isi au paia i Navu, Ilinoi. I le aso 15 o Aokuso, 1840, na aoao atu ai e Iosefa Samita e uiga i le sauniga o le papatisoga mo o latou tuua i se sauniga o le malii mo Seymour Brunson. Sa tau atu e Iosefa ua oo i le taimi e faataunu ai ma toefuatai ai lena aoaoga, lea na faatinoina e le Au Paia i aso anamua (tagai i le 1 Korinito 15:29).<sup>1</sup>

Ina ua faalogo le Au Paia i Navu e mafai ona latou papatiso mo tagata o o latou aiga ua maliliu, na matuai faagaeetia i latou. “O le taimi na ou faalogo ai i ai na faaosofia lou agaga i le olioli,” o le saunoaga lea a Peresitene Wilford Woodruff (1807–98).<sup>2</sup>

O le taimi lava na iloa ai e le Au Paia e mafai ona latou faia papatisoga mo e ua maliliu, sa latou mananao loa e fai galuega a o latou aiga

i le taimi lava latou te mafai ai ona faia. O le toatele na tusi atu i tagata o aiga ina ia mafai ona latou aoina mai igoa o aiga ua maliliu. Talu ai ona sa leai se malumalu i lena taimi, na faitau selau tagata na o atu i lalo i le Vaitafe o le Misisipi e faatino ai sauniga.

### **Papatisoga mo E ua Maliliu ma Oe**

O loo faaauau pea le fiafia i galuega o le malumalu ma le papatisoga mo e ua maliliu i le taimi nei. O loo i ai malumalu i le salafa o le lalolagi, ma o galuega o le malumalu e tatalaina ai le faitotoa mo *tagata uma* ia maua le faaolataga. O se meaalofa maoae!

E pei lava o le Au Paia i Navu, e mafai ona e faatasiasi ma au uo ma aiga ma fai papatisoga sui mo e ua maliliu. E mafai ona e aveina lou aiga i le malumalu. O lona uiga e le gata i le aveina o lou aiga o *soifua* i le malumalu, ae faapea foi e pele ia te oe ua maliliu. Afai e le mafai ona o lou aiga i le malumalu, e mafai ona e fai atu i uo, taitai, po o tagata o le korama ma vasega tou te o faatasi.

O le o i le malumalu faatasi ma e pele e aumaia ai le olioli. E fesootai ai aiga, aumai le filemu, ma faamanatu mai ai ia i tatou e alofa le Atua ia i tatou uma ma ua Ia ofoina mai le faaolataga i Ana fanau uma lava.

Ma o se mea lena e mafai ona tatou fiafia uma lava i ai. ■

*E alaala le tusitala i Iuta, ISA.*

### **FAAMATALAGA**

1. Tagai i le Matthew McBride, “Letters on Baptism for the Dead,” Me 29, 2013, history.lds.org.
2. Wilford Woodruff, i *Deseret News*, Me 27, 1857, 91.



### **TUUFAATASIA O O TATOU AIGA**

“Afaia e le gata ina o talavou o uarota taitasi i le malumalu ma faia papatisoga mo o latou tagata ua maliliu ae faapena foi ona galulue ma o latou aiga mai tagata o le uarota ia tuu atu igoa o aiga mo galuega o sauniga latou te faatinoina, o le a matua faamanuina uma i latou ma le Ekalesia. O le faamanuiaiga tupito e faavavau o le tuufaatasia o ou lava aiga e toetoe lava a le mafai ona malamalamai i ai.”

Elder Quentin L. Cook o le Korama a Apoetolo e Toasefululua, “O Aa ma Lala,” *Liahona*, Me. 2014, 46.



**Saunia e Charlotte  
Larcabal**

Mekasini a le Eklesia

**P**e na e iloaina o tatalo faaleaiga o se poloaiga? Na *poloaiina* e Iesu Keriso sa Nifae ia “tatalo i o outou aiga i le Tama” (3 Nifae 18:21). Talu mai lena taimi, o loo faaleoina pea e perfetta ma Apostetolo lenei aoaoga. Mo se faataitaiga, na aoao mai Elder Richard G. Scott (1928–2015) o le Korama a Apostetolo e Toasefululua e tatau ona avea o “se faamuamua e le fetuunaia i o outou olaga i aso taitasi.”<sup>1</sup> O le tatalo faaleaiga e taua! O le ki foi lea i le ola latalata atili i le tasi ma le isi ma le Tama Faalelagi. Ma e le na o le tuu atu lava ia Tina ma Tama. E mafai ona i ai sau uunaiga tele i lou aiga! E mafai ona avea oe o se siamupini mo le tatalo faaleaiga.

### AVEA O SE SIAMUPINI

O Motugaafa e sefulu mai le autalavou e fesoasoani i lou aiga ia latalata atili atu ai i le Tama i o outou tulivae.

O le a se siamupini mo le tatalo faaleaiga? Pe a e mafaufau i siamupini, e mafai ona e mafaufau i tagata e sili ona lelei i se mea.

O se tasi lena o ituaiga o siamupini: o se manumalo po o le taui muamua po o le tulaga muamua i se tauvaga. O se tasi ituaiga o siamupini o se tasi e tauivi mo se mea, o se lagolago po o se tasi e puipuia. O lea o se siamupini mo le tatalo faaleaiga o se tasi e tauivi mo, e tu atu mo, ma puipuia le tatalo faaleaiga.

Mata e mafai ona e faia lena mea?

# SIAMUPINI

## mo Tatalo Faaleaiga



AUTALAVOU

O nisi nei o ni motugaafa pe faapefea ona avea o se siamupini mo le tatalo faaleaiga:

**1.** Taumafai e aua le faia tatalo e tautu i upu a na e tutusa pe a oo i lou avanoa e tatalo. *Jeanel S., 14 tausaga, Idaho, ISA*

**2.** Fai se lisi o mea e tatau ona outou tatalo i ai o se aiga. *Samantha B., 17 tausaga, Alabama, ISA*

**3.** I lou aiga matou te taumafai lava e faailoa atu le agaga faafetai e sili atu nai lo mea matou te ole atu ai. Matou te taumafai lava ia maua se agaga o le loto faafetai i le Tama Faalelagi, o lea ou te taumafai ai e fesoasoani i nai ou tei i lena mea. *Karla S., 17 tausaga, Tijuana, Mekisiko*

**4.** Faamanatu i tagata uma. Afai e le lelei tele lou aiga i le tatalo faatasi, o se amataga lelei o le faia o tatalo faaletagata lava ia. *Camille G., 18 tausaga, Alabama, ISA*

**5.** Ala vave i luga i ni nai minute ina ia mautinoa e fai tatalo faaleaiga ae e te lei tuua le fale. E mafai ona e setiina se utati fafagu e tau mai ia te oe le taimi mo le tatalo faaleaiga. *Tess Z., 16 tausaga, Texas, ISA*

**6.** Faalogo i upu o loo fai e le tagata o loo tatalo, ma toe fai i lou mafaufau. Mulimuli ane, vaai po o a mea e mafai ona e manatua mai la latou tatalo. O le fai atu "Amene" o lona uiga "ia faia o lea", pe faapea ua e malie i ai. Ou te manao moni lava ia iloa ma malamalama po o le a se mea ua ou malie i ai. *Grace M., 14 tausaga, Kaledonia, ISA*

**7.** Ia i ai se uiga faaalua lelei e uiga i le tatalo faaleaiga. Aua le mafaufau i ai o se mea e siaki ae e te lei alu e moe. Ia manatua o tatalo faaleaiga e mafai ona fesoasoani e aumaia ai

lou aiga ia sili atu lefelatai. *Ranoh H., 17 tausaga, Alapama, ISA*

**8.** Taumafai e fesoasoani i nai ou tei uma lava. E tusa lava pe na o le mauaina o se uiga lelei ma avea ma se faataitaiga lelei ua tele lava se aoga. *Will W., 14 tausaga, Kaledonia, ISA*

**9.** Mafaufau e uiga i mea e te manao e tatalo i ai ae e te lei tatalo. *Lyric A., 13 tausaga, Arkansas, ISA*

**10.** Ia manatua e leai se mea e mafai ona sili atu le taua nai lo o lena. O le faaluina o taimi faatasi ma lou aiga ma ia mautinoa e maua le taimi taua e faitau ai tusitusiga paia ma tatalo e taua moni lava. *Isaac S., 14 tausaga, Kaledonia, ISA*

### FAAMATALAGA

1. Richard G. Scott, "Ia Avea le Faaogaina o le Faatuatua ma Mea E te Faamuamuina," *Liahona*, Nov. 2014, 93.

"E leai lava se vaiga e sili atu ona matagofie i lenei lalolagi atoa nai lo le vaaia o se aiga o tatalo faatasi."

Peresitene Thoma S. Monson,  
"O mai ia te la i le Tatalo  
ma le Faatuatua,"  
*Liahona*, Mat. 2009, 3.



# O Le Filifiliga Faatuatua

→ INA IA ←

*Filifiliga e fa e mafai ona  
suia ai lou olaga.*

**O** se tasi o luitau sili lava na ou feagai ai a o tuputupu o se tamaitiiti i Kuatemala o le mativa—o le mativa faaleagaga ona sa matou le iloa le talalelei ma le mativa faaletino ona o le leai o ni tupe. Na maliu lou tina ina ua lima ou tausaga, lea na tuua ai lou tama ina ia tausia se fanau laiti e toafa na o ia lava. Aua sa manao lou tama ia i matou ia nonofo faatasi uma, na tatau ai ona ia faasafua atu ai nisi tiutetauave a le aiga ia i matou le fanau.

O au o le tamaitiiti ulumatua ma sa tofia i le galuega o le saunia o aiga o le aoauli ma le afiafi mo le aiga i aso uma. Sa faigata i le amataga, ae sa ou aoaoina ni nai auala e kuka ai. O aso taitasi e tuua ai e lou tama ia te au se 25 sene e faatau ai le meaai. Ou te faatauina se pauna o pi mo le 6 sene ma se pauna o araisa mo le 7 sene. Ona ou faataua lea o malala i le 5 sene lea sa ou faaaogaina e kuka ai mea uma, 2 sene o fasilaau, ma le 5 sene o totila. Sa ou faia lenei mea i aso uma, ma i aso uma sa matou aai i araisa ma pi ma totila. E oo lava i lena taimi sa le tele ni tai 25 sene, ae o le ala lea sa matou ola ai.

O le luitau o le, pe faapefea ona o ese mai lenei taamilosaga o le mativa. Ma e oo uma lava i lalo i filifiliga fai—o le filifiliga e faia se mea ina ia faaleleia lou olaga. O i tatou o tagata taitoatasi o loo faia pea filifiliga mo i tatou lava, e tusa lava pe tatou te le manatu o loo tatou faia. Mo se faataitaiga, tatou te *filifili* e talitonu. O nisi taimi e mafai ona tatou lagona le le mautonu, pe a feagai ma mea ua aoao mai e le lalolagi ma mea ua aoao mai e Iesu Keriso. Ae o le puna sili ona lelei e taialaina o tatou olaga o le aoaoga faavae a Iesu Keriso. A o ou faia filifiliga e faavae i lenei aoaoga faavae, sa ou lagonaina le aao o le Alii i lou olaga.



Saunia e Elder  
**Enrique R.  
Falabella**  
O Le Fitugafulu





O le luitau o le, pe faapefea ona o ese mai  
lenei taamilosaga o le mativa.

Ma e oo uma mai lava i lalo i filifiliga—o le filifiliga  
e faia se mea ina ia faaleleia ai lou olaga.

Ou te fia faasoa atu ia te outou ni filifiliga se fa na i ai se aafiaga maoae i lou olaga. Afai e te faia nei lava filifiliga ma piimau i ai, o le a avea ma se faamanuia ga foi ia te oe: (1) o le filifiliga ina ia papatiso, (2) o le filifiliga e talitonu ia Iesu Keriso ma tumau le toaga i le Ekalesia, (3) o le filifiliga e faalagolago i folafolaga a le Alii, ma le (4) o le filifiliga e tumau i le faatuatua ma mulimuli i fautuaga a perofeta.




### → O Le Filifiliga Ina Ia Papatiso

Ina ua 12 ou tausaga, na amata e faifeautalai ona aoaoina au ma nai ou tei. I le taimi muamua na lei auai ai lou tama. Sa na o na ia nofonofo i se potu i tua atu o se pupuni ma faalogologo. Ae ona ia faitau lea i se tamaitusi o le Ekalesia lea na faamatala mai ai e faapefea o se alii ma se tamaitai e faaipoipoina e le pule sao e mafai ona nonofo faatasi e faavavau. O lenei mea na ia matauina aua e ui lava ina ua maliu lona faletua, e mafai ona ia toe faatasi ma ia. O le taimi lava na ia aoao ai i lenei mea, sa ia filifili loa e papatiso. Ma na papatiso uma i matou o se aiga.

O le vaaiga fou na maua mai le talalelei na fesoasoani ia te au e iloa ai sa mafai lava ona ausia ni mea e sili atu ona lelei i le olaga pe a ou faaaogaina e au lava ia, ma usiusitai. Sa ou faia le filifiliga patino o le a ou faia soo se mea e moomia ina ia tumau ai i le ala a le Alii.

### → O le Filifiliga e Talitonu ia Keriso, ma Tumau le Toaga i le Ekalesia

Ou te manatuaina faapitoa lava lou faia o lenei folafolaga i se tasi aso a o ou saofai i se falesa e faatalitali mo se sauniga papatisoga e amata. A o ou nofonofo ma mafaufau loloto i le aoaoga faavae a Keriso, sa amata ona ou maua se lagona malosi o le olioli ua fai mai ia te au o mea uma na ou aoaoina mai faifeautalai e moni. I lena taimi sa ou tautino le leoa atu i le Atua o le a faalagolago i taimi uma ia te Ia ma o le a ou tumau i le toaga i Lana Ekalesia i lou olaga atoa pe afai o le a mafai ai ona faaauau pea ona ou maua le olioli lea e sau mai le Agaga Paia. Ia te au o lenei folafolaga e aofia ai e le gata ina auai i le lotu i vaiaso uma ae o le faalagolago foi i aoaoga faavae a le Alii, i tusitusiga paia, perofeta soifua, ma aemaise lava lou Faaola, o Iesu Keriso.



## → O le Filifiliga e Faalagolago i Folafolaga a le Alii

Sa fai si talavou o lo'u olaga i le taimi na ou faia ai lenei filifiliga taua e faalagolago i folafolaga a le Alii. Talu mai lena taimi o lau filifiliga ua faamaonia le aoga tele ia te au. Soo se taimi lava e oo mai ai le masalosalo po o se fesili, sa mafai ona ou mafaufau i tua i le tautinoga sa ou faia ma sa faavae filifiliga o lou olaga i lena tautinoga. O le filifilia vave i tulaga faatonuina o le a e ola ai o le a fesoasoani e te faia ai ni filifiliga sao pe a oo mai masalosaloga po o ni faafitauli.

E i ai so'u aafiaga e le galo i lenei mataupu faavae a o aoga. Sa ou galue malosi i le aoga i taimi uma e taumafai e aoao saunia mo le lumanaui. Sa ou iloa, ina ia mafai ona tuuese le mativa, sa manaomia le sue o se galuega o le a tatala ai faitotoa i avanoa fou i le olaga. Sa ou iloa foi ina ia mafai ona maua lenei ituaiga o galuega, e tatau ona ou taulai atu i lau aoga.

E ui lava i le taua o le aoga ia te au, sa ou faia le filifiliga patino e faataatia ese meaaoga i Aso Sa. I le avea ai ma se tagata o le Ekalesia, sa ou iloa na fetalai mai le Alii o le Sapati o Lona aso, e le o sa tatou aso. Sa ou taumafai

e faia ni filifiliga ma se faamoemoega e uiga i mea ou te faia i lenei aso faapitoa. Ae ui i lea, e oo lava ina ua uma ona ou faia o lenei filifiliga, e i ai taimi sa faaososoina au e lolou au lava tulafono, aemaise lava pe afai e i ai sau suega e fai. Ou te mafaufau, "E le leaga tele; ua na o se suesuega. Ou te mafai lava ona alu i le lotu i le taeao ae suesue i le aoauli ma le afiafi."

Ae a ou manatua le folafolaga na ou faia o le a ou tumau ona toaga ma faamaoni i fautuaga a perofeta a le Alii, sa sili atu ona faigofie le pipiimau i lau filifiliga e aua le suesue i Aso Sa ma nai lo lena ia faaaogaina le aso o le Alii mo le auauna atu ma le tapuai. Ua uma ona ou filifili e tumau i le faatuatua, ma o lea, ia te au ua na o se mataupu tau i le faamatalaina o mea na fetalai mai ai le Alii e uiga i le aso Sapati ma faaaogaina Lana fautuaga i le mea sili ou te mafaia i lou olaga.

Sa ou iu ina matua iloga i au meaaoga ma mauaina se galuega lelei e fesoasoani ia te au e tausi ai lou aiga. Ou te iloa ona sa ou tausia lau folafolaga i le Alii, ua ia faamanuainai au ina ia mafai ona fausia ai se olaga sili atu.

## → O le filifiliga e Tumau i le Faatuatua ma Mulimuli i Fautuaga a Perofeta

Mo i tatou taitoatasi, o le tumau i le faatuatua i le Alii o se mataupu o le faatulagaina i le mea e sili lo tatou talitonu patino faapea o Iesu o le Keriso, o i latou o e na tusia tusitusiga paia na musuia e le Atua, ma le Au Peresitene Sili ma le Korama a Apostolo e Toasefululua e moni lava o ni auauna a le Atua. O le iloaina o loo i ai faaaliga i o tatou aso ma o perofeta na valaauina e le Atua e faigofie atu ai le tumau i le faamaoni i le talalelei pe a e oo i tulaga faigata.

Afai e mafai ona e atiina ae lenei ituaiga o lototele, ona le mafai ai lea ona faalavelave ia te oe fesili po o a amioga po o gaoioiga e talafeagai pe leai. O le a taliina uma nei popolega a o e sailia tali i le faatuatua e ala i tusitusiga paia, le Agaga, ma perofeta—o auauna tofia a le Atua. ■





# TAUA OLE TAGATA LAVA IA

E taua tagata taitoatasi, e pei o se fugalaau, e tusa lava pe  
faapefea ae pe o afea latou te fotu ae ai.



**Saunia e Elder  
Robert D. Hales**

O Le Korama a  
Apostolo e Toasefululu

## PE FAAPEFEA ONA TALI ATU MA LE LOTOTOA FAAKERISIANO

**O** se tasi o suega o le olaga nei e oo mai pe a **fesiligia pe faitioina o tatou talitonuga**. O taimi faapena, atonu tatou te mananao e tali atu ma le malosi—e “faalālā a tatou moto.” “Ae afai tatou te tali atu i e tuua’ia i tatou e pei ona faia e le Faaola, e le gata ina avea atili ai i tatou faapei o Keriso, ae ua tatou **valaaulia foi isi e lagonaina Lona alofa ma mulimuli foi ia te la**.

I le avea ai ma soo moni, e tatau ona avea ma o tatou popolega aupito taua le soifua sololelei o isi, ae le o le sa’o o le tagata lava ia. O fesili ma faitioga tatou te maua ai se avanoa e aapa atu ai i isi ma faaali atu ai e ttau i latou i lo tatou Tama Faalelagi ma i tatou. O lo tatou faamoemoe o le **fesoasoani lea ia latou malamalamai le upumoni**, ae le o le taupunipuni o o tatou manatu po o le tau faamaonia e sao o tatou manatu i se felafolafoaiga faatofamanino. O a tatou **molimau mai le taele o o tatou loto**, o le tali aupito mamana lena e mafai ona tatou tuuina atu i e faitioina i tatou. Ma o na ituaiga o molimau e na o le **alofa ma le agamalu** e mafai ona tuuina atu ai. E tatau ona tatou faapei o Edward Partridge, lea na fetalai i ai le Alii, “Ua mama lona loto i o’u luma, ona ua faapei o ia o Natanielu o anamua, o le ua leai se pepelo o i ai” (MF&F 41:11). Ina ia leai se pepelo o le i ai lea i se tulaga le sala faatamaitiiti, ia **gese ona ita ae vave ona faamagalo atu**.

Ia i latou uma o e saili ia iloa le auala e tatau ona tatou tali atu ai i e tuuaia i tatou, ou te tali atu i ai, tatou te **alolofa ia i latou**. Po o le a lava lo latou lanu, talitonuga, tapuaiga, po o le faaupufai, afai tatou te mulimuli ia Keriso ma faaali atu i ai Lona lototoa, e tatau ona tatou alolofa ia i latou. Tatou te le lagonaina ua sili atu lo tatou lelei nai lo i latou. Nai lo lena, tatou te mananao ma lo tatou alolofa e **faaali atu ia i latou se ala e sili atu ona lelei—le ala a lesu Keriso**. O Lona ala e taitai atu ai i le faitotoa o le papatisoga, le ala lauitiiti ma le vaapiapi o le ola amiontu, ma le malumalu o le Atua. O Ia “le ala, ma le upu moni, ma le ola” (Ioane 14:6). Ua na o Ia lava e mafai ai ona tatou ma o tatou uso uma ma tuafafine mautofai i le meaalofa silisili e mafai ona tatou maua—o le ola e faavavau ma le fiafia e faavavau. Ina ia fesoasoani ia i latou, ina ia avea ma se faataitaiga mo i latou, e le mo e e vaivai. E mo e malolosi. E mo oe ma au, le Au Paia o Aso e Gata Ai o e totogi le tau o le avea ma soo e ala i le taliina o e faitioina i tatou i le lototoa faa-Kerisiano. ■

*Mai se lauga o le konafesi aao o Oketopa 2008.*



### NA FAAPEFEA ONA E FAAAOGAINA LENEI MEA?

Taulimaina i latou ma le agalelei e pei o le a faia e le Faaola ina ia latou iloa lou tagata moni nai lo le faamasinoina o oe e ala i mea na latou faalogo i ai. Afai e te lagonaina le alofa o le Faaola, o le a faigofie atu ona taulimaina le faafitauli. **Samantha L., 18 tausaga, Chihuahua, Mekisiko**

O le auala sili o le avea ma se faataitaiga i isi. O le toatele o i tatou na ola i ni taimi na tatou lagonaina ai le tuuato-tasi po o le fefe. Pe a tatou tuu atu lo tatou alofa, se opo, e oo lava i se ataata, o le a tatou fesoasoani i isi ma e oo lava ia i tatou.

**Yandri P., 17 tausaga, Chihuahua, Mekisiko**

# “E mafai faapefea ona ou fesoasoani i au uo e foia faafitauli e pei o le palauvale ma le soona taaalo i taaloga vitio?”

**O**le fesoasoani i au uo e manumalo i faafitauli e mafai ona avea o se autu maaleale, aua e te le manao e foliga mai o oe o se failauga pe faamasinosino. E ui lava o le a eseese ia tulaga taitasi, o se manatu taua ia manatua e faapea e taua lau faataitaiga. E ala i le tausia o ou tulaga faatonuina, o le a matauina e isi—ma e mafai ona avea oe ma se unaiga lelei. Mo se faataitaiga, afai e palauvale lau uo, ia mautinoa o loo e faaogaina i taimi uma se gagana mama—e aofia ai ni tala malie ma manatu faaalia mama. O lena ala, ua i ai ia te ia se faataitaiga maoae o le ala e mafai ai ona malie ma fiafia e aunoa ma le palauvale.

O le a tele lava ina matauina e au uo au filifiliga ma faaaloalo i ai. O uo lelei o le a faaaloalo ia te oe mo au filifiliga, e tusa lava pe latou te le faia ia lava filifiliga.

Ae faapefea pe afai e le mafai e lau uo ona taofia soo se mea o loo faapopoleina ai oe, e ui lava o loo avea oe ma se faataitaiga lelei? Ia, e taua foi le manatua e le mafai e au uo ona fatauina lou mafaufau. O nisi taimi, atonu latou te le o *iloaina* o loo i ai se uiga faapitoa o e atugalu ai. Pe afai, ua mavae sina taimi, e le taofia lava e ia, e matuai le afaina lava lou fai atu ia i latou i le agalelei ma le faaaloalo.

Po o a lava ni faafitauli o feagai ma au uo, e mafai ona avea oe o se faatosinaga lelei i au uo e ala i le filifiliina o le mea sao. E mafai ona e valaaulia i latou e fai ni gaoioiga malie, ma faageetia. Afai e te fiafia e filifili le mea sao, o le a matauina e tagata.



## Faamalosia au Uo

Sa ou tuuina atu se lesona e uiga i le gagana i le Mutuale. Ou te manatu ua aoga, i le le ititi ifo ma le toatasi o au uo lelei. Tatou te muamua ona faia le faataitaiga. E mafai ona tatou tatalo mo a tatou uo ma maua le lototeli e tau atu ia i latou i le taimi sao, “Faamolemole aua le tautatala i upu leaga. Ou te luiina outou ia aua le fai atua ni mea le faaaloalo i le aso.”

Dante C., 19 tausaga, Puebla, Mekisiko

## Tatalo ao lei talanoa ma i latou

Muamua, o le a ou tatalo a o lei faia se talanoaga ma ia. Lona lua, o le a ou tautala atu ia te i latou i le agalelei ma lagona lelei, tuuina atu fautuaga e pei o le aloese mai le tali atu pe a ita, mo se faataitaiga. O lau faataitaiga o le a fesoasoani foi ia i latou e faaaoga le gagana e sili atu ona lelei.

Ndansia B., 18 tausaga, Kimbanseke, Democratic Republic o Congo



## Faaali ia i Latou ni Mea e Sili Atu e Mafai ona Latou Faia

Nai lo le otetia o i latou, fesoasoani ia i latou ia iloa o loo i ai ni mea e sili atu e mafai ona latou faia. Valaaulia i latou e fai ni gaoioiga malie, ma aoga faatasi ma outou ma uunaia i latou e fai ni mea e sili atu ona aoga e pei o le aoao e ta se mea faifaaili,



taaalo ma nai tei, po o le fesoasoani ia i latou i totonusi o le fale.

*Elder Cobabe, 19 tausaga, ma Elder Allred, 19 tausaga, misiona a Saina Hong Kong*

**O le Faataitai e Faaatoatoaina ai.**  
O le a ou tau atu ia i latou e tatalo mo le malosi ma faataitai le tautala e aunoa ma le palauvale pe faaaoga ai upu masoa. Ou te tauina foi ia i latou o le faaaluina o le taimi tele i taaloga vitio e faatapulaaina ai a latou fegale-galeaiga ma uo ma aiga, ma e mafai ona latou taofia e ala i le auai i gaoioiga lelei ma aoga. Afai latou te iloaina i latou lava ua faia se mea sese, e mafai ona latou tatalo mo le malosi ma faaaauau pea ona faataitai ona o le faataitai e faaatoatoa ai.

*Ozioma O., 17 tausaga, Abia, Nigeria*

**Faatosina i Latou mo le Lelei**  
E le mafai ona tatou pulea amioga a isi tagata, ae e mafai ona tatou fesoasoani e faatosina i latou mo le lelei. E mafai ona tatou ola o tatou olaga o ni faataitaiga lelei, e faapei o Keriso ma fesoasoani ia i latou o loo siomia i tatou e o mai ia Keriso. Afai o loo faia e a tatou uo ni filifiliga le lelei, e mafai ona tatou fautuaina atu nisi filifiliga e sili atu ona lelei ma faailoa atu le mea ua tatou iloa e sao ma le moni e ala i a tatou upu ma a tatou amioga.

*Mosiah M., 17 tausaga, Iuta, ISA*

### Fai se “Fagu Palauvale”

Ose tasi o auala faapitoa e mafai ona ou fesoasoani ai i au uo e tuu le palauvale e ala i le faia o se “fagu

palauvale,” ma soo se taimi lava e palauvale ai se tasi, latou te tuuina se 25 sene i le fagu. E mafai ona ou fesoasoani i uunaia le taofia o le soona fai o taaloga vitio pe a ou valauliaina au uo i tolauapiga a le autalavou, mea e fai o le Ekalesia, ma isi gaoioiga faafafia. Ou te mafai foi ona faailoa atu i latou i ni tagata fou o le a fesoasoani ia i latou ia fefamasanai ma toaaga mai.

*Owyn P., 13 tausaga, Hawaii, ISA*



### Popole mo Isi

O le avea ma se faataitaiga lelei o le mea aupito sili lea ona taua e mafai ona ou faia ona o le taumafai e fesoasoani i se tasi ia tuu se amioga leaga ae o loo ou faia le mea lava lea e tasi e leai lava ma se uiga. Latou te le mafau-fau mamafa i lau fautuaga po o lou manatu. Ou te mafai foi ona fesoasoani i au uo i le faamatala atu ia i latou pe aisea ou te le maua ai se lagona lelei i a latou amioga. Afai o la latou gagana e le talafeagai, e mafai ona ou



### AVEA MA SE FAATAITAIGA I LE AGAGA

“E ao ona avea i tatou ma se faataitaiga i le agaga. la te au o lona uiga tatou te tauivia ia maua i o tatou olaga le agalelei, lotofaafetai, lotofaamagalo, ma le lotolelei. O nei uiga mama o le a tatou maua ai se agaga o le a pa'i atu i olaga o i latou o vagaia i tatou.”

*Peresitene Thomas S. Monson, “Avea ma se Faataitaiga ma se Malamalama,” Liahona, Nov. 2015, 87.*

fesoasoani ia i latou e vaai i foliga latou te tuuina atu i tagata pe a latou faaogaina lena ituaiga o gagana le lelei.

*Alejandra T., 17 tausaga, Chihuahua, Mekisiko*

### Tatalo

E mafai ona e tatalo mo i latou e tuu le palauvale pe taofia le soona taaalo i taaloga vitio. O le a le faatiga lava le tatalo.

*Joshua L., 14 tausaga, Oregon, ISA*

## FESILI O LE A SOSOO AI

“O a ni gaoioiga e tatau ona ou faia i ou taimi avanoa ina ia sili atu ona taua?”

Auina mai lau tali ma, afai e manaomia, se ata manino lelei ae lei oo i le aso 15 o Setema, 2017, i le liahona .lds.org (kiliki le “Submit an Article”) pe imeli mai i le liahona@ldschurch.org.

Faamolemole ia aofia ai faamatalaga nei: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e i lalo ifo o le 18 ou tausaga, o le faatagaga tusitusia a ou matua (e talia fo le i-meli) e lolomiina ai lau tali ma lou ata.

E ono iloiloina tali mo le uumi po o le manino.



Saunia e Lori Fuller

Mekasini a le Ekalesia  
E faavae i se tala moni

*"O le a ou auauna. Ou te tau mo le mea tonu. O lou Alii Jesu"* (Tusipesa a Tamaiti, 85).

"**E**i, vaai i lenei mea." Sa toso mai e Jack se fasi  
Epepa sa gaugau mai lana taga. "Sa ou mauaina i  
se mekasini i lenei taeao." Sa ia talatalaina ma tuu atu  
ia Taran.

Ae na iloa vave lava e Taran e le o se mea sa ia  
manao e vaai i ai. Sa ia liliu ese ma fai atu, "Ou te le  
manao e vaai i ai."

Sa faamimigi tauau o Jack ma toe tuu le pepa i totonu  
o lana taga. "Pepe."

E lei popole tele i ai Taran.

Ina ua taunuu Taran i le fale, sa ia fesoasoani ia Tina  
i le faiga o falaoa mo le taumafataga o le afiafi. Sa ia  
tosoina atu se nofoa i le laulau, ma nonoaina e Tina  
lona talieelele.

"Tina," sa ia fai atu ai, "ao ou i ai i le fale o Ian, sa tau-  
mafai lana uo e faaali mai ia te au se ata o se tagata e leai

ni lavalava. Sa ou liliu ese ma savali ese.”

Sa tuu i lalo e Tina le apa o le paluga ma fusi mai Taran. “O se filifiliga lelei tele lena. Faafetai mo le tauina mai ia te au e uiga i ai.”

“I le afiafi o aiga o le mea lena na e fai mai e fai,” na fai atu ai Taran ao ia popoa ona lima i falaoamata ma sii le paluga i luga o le laulau.

“Ou te fiafia na e manatuaina! Pe o le taimi muamua lena ua faaali atu ai e se tasi ia te oe se ata leaga?”

Na lue atu le ulu o Taran.

“Ia, ou te matua fiafia lava ua e tau maia ia te au. E te iloa e mafai ona e fesili mai ia te au e uiga i soo se mea pe tau mai ia te au soo se mea, a ea? E tusa lava pe na e faia se filifiliga le lelei, ou te manao lava ia ou iloa ina ia mafai ai ona ou fesoasoani atu. Ou te le ita.” Sa ia faapaina atu sina vaega itiiti o le falaoamata i luga o lona isu.

Sa ataata Taran ma faamaanuminumi lona isu ua falaoamatā. “Ioe. Ou te iloa.”

Ina ua maea le taumafataga o lena po, na fai atu Tama, “I le aso sa taumafai se tasi e faaali atu ia Taran se ata leaga, le ituiga lea na tatou talanoa i ai i le afiafi o aiga.”

Na lele i luga le lima o Reena i le ea. “Ou te manatuia le talanoa e uiga i lena mea!” Sa le lava le matua o Dhara e manatuia ai le tele o mea, ae sa luelue mai foi lona ulu.

“O le a la lau mea na fai?” Na fesili atu ai Sonia ia Taran.

“Ou te lei vaai i ai, ma sa ou savali ese,” o le tala lea a Taran.

Sa luelue atu le ulu o Tina. “Ma te matua fiafia lava na fai e Taran se filifiliga lelei. Ma ua ma matuai mitamita lava ia te ia mo le tauina mai ia te au o le mea na tupu.”

Sa aapa atu Tama i le isi itu o le laulau e pa se la lima ma Taran. “Lelei tele, uo.” Na patipati Reena ma Dhara, ma sa tuuina atu e Sonia ia Taran se ataata tele lava.

“O lea la, ina ia faaalia le fiafia ua i ai sa tatou meaai mama faapitoa!” na fai mai ai Tama. Na fiafia *tagata uma* i lena mea.

Sa tu i luga Tina e toso mai le aisa kulimi i fafo mai le pusaaisa, ae taufetuli atu Taran ma Sonia e aumai ia ipu ma sipuni.



“Ua lelei, uo,” o le tala lea a Tama, ma faasino atu le aisa kulimi ua asu ia Taran. “O le a le lanu e te manao ai?”

A o latou faō ia latou aisa kulimi, na fai atu Tina, “Pau le mea ma te mananao ma Tama ia te outou tamaiti e manatua, afai e te popole pe o i ai ni au fesili, e mafai ona e sau i taimi uma lava ma talanoa mai ia i maua, e tusa lava po o le a se mea e tupu. E faafiafiaina ai i ma’ua.”

“Ma maua ai a matou aisa kulimi?” Na fesili atu ai Sonia ao siiina i luga se sipuni ua tumu i le [aisa kulimi] sukalati.

Na ata leotele Tina. “O nisi taimi. Ae o le mea sili lava ma te maua ai le fiafia. Ma ua lava lena mea.”

Na luelue atu le ulu o Taran a o ia faamaeaina lana u mulimuli o le aisa kulimi. O le tau atu ia Tina na ia maua ai foi le fiafia. ■

## LUI O LE FMT

“O le a ou faitau ma matamata na o mea lava e fiafia i ai le Tama Faalelagi”  
(O O’u Tulaga Faatonuina o le Faatalalelei)



Faataitai le fai atu leai pe afai e taumafai se tasi e faaali atu ia te oe se mea leaga. Liliu ese ma savali ese.


Talanoa i se matua po o se tagata matua faatuatuaaina e uiga i le mafuaaga e le lelei ai mo i tatou ponokalafi.


Fai se fuafuaga faatasi ma lou aiga. Afai e te vaai i se mea leaga, tau atu i se matua po o se tagata matua faatuatuaaina i se taimi vave lava e tuu ese vave ai lagona le lelei.



Ua ou luiina au lava ina ia . . .

---



---

# O Le Vavega a Sister Sheldon



Saunia e Elyse D., 10 tausaga, Uosigitone, ISA

**O** Sister Sheldon o le peresitene silisili lea o le Peraimeri na i ai! E malosi o ia ma malie. Pe a tu o ia i luga e fai le taimi o fetufaaiga, matou te pepese uma, "O le taimi o le fetufaaiga a Sheldon" ma lima ua faamafola ma ataata. Sa ia fiafia i ai!

I le amataga o le 2015 na iloa ai e Sister Sheldon ua toe maua o ia i le kanesa, mo le taimi lona lima! Sa ia faamatala mai ia i matou uma le mea ua ta'ua o le kanesa ma le mea na te faia. Sa ia tau mai ia i matou atonu o le a ia le lotu i nisi taimi ma atonu o le a toulu lona lauulu. Sa ia talosagaina i matou e anapopogi ma tatalo ina ia fesoasoani ia alu ese ai le kanesa.

O le taimi lena, sa faia ai e la matou Peraimeri le luitau o lima fesoasoani, lea na matou tipi ai ni lima pepa ma tusia ai se galuega auauna atu na matou faia. O Sister Ashby, i le au peresitene o le Peraimeri, sa maua se manatu e fai se ie soosoo o lima fesoasoani mo Sister Sheldon. Na matou mananao uma lava ia te ia ia iloa

matou te alolofa ia te ia, o lea na lolomi ai e le Peraimeri atoa lima ma ni fatu, ma o teineiti i le aso o gaoioiga na faaaogaina e faia ai le ie soosoo. Na matou suiina, auli, ma sasaa uma lo matou alofa i ai i totonu. E oo lava i nisi o i matou na nonoaina ni manoa i o matou tamata-mailima e manatua ai Sister Sheldon.

Na matou tuuina atu le ie soosoo ia Sister Sheldon. Sa ia aveina i ona taimi o togafitiga o vailaau ma lagonaina lo matou alofa.

O le vaega sili ona manaia o le taimi na tuuina mai ai e Sister Sheldon lana molimau i le Peraimeri atoa. Sa ia tau mai ia i matou le tele o lo matou faapitoa ia te ia ma e alofa o ia ia i matou. Sa ia iloaina sa avea i matou o se vaega tele o le mafuaaga sa manuia ai o ia i lona togafitiga o vailaau. E ui lava sa ou fefe ina ia le mafai ona manuia o ia, sa ou iloa lava o le a manuia o ia. I le taimi nei ua le toe i ai se kanesa ia Sister Sheldon! ■

# Avea e Faapei o Nifae

TAMAITI



Saunia e Mason J., 8 tausaga, Iuta, ISA

I se tasi aso sa ou aoao ai i le Peraimeri e uiga i le tele o le faatuatua ma le amiotonu o Nifae. O lea sa ou filifili ai ou te fia avea e faapei o Nifae.

O le aso na sosoo ai sa ou galue ai i le faia o ni filifiliga lelei. Sa tu'i a'u e lo'u uso. Sa ou ita. Sa ou manao e toe tu'i atu o ia, ae sa ou filifili e avea e faapei o Nifae. Nai lo le toe tu'i atu o lo'u uso, sa na o lo'u savali ese lava. Na fesoasoani e aveese ai lo'u ita.

I se isi taimi, sa taalo ai lo'u uso i la'u vaalele e aunoa ma le fesili mai, ma sa ou popole o le a ia talepea. O lea na ou fesili atu ai ia te ia i se ala manaia e toe aumai ai, ma sa ia faia!

E faigata ona fai i nisi taimi le filifiliga sa'o, ae ou te mafaufau i faataitaiga a Iesu ma Nifae. Ou te faitau foi a'u tusitusiga paia i po uma, ma e fesoasoani ia te a'u i le aso atoa e fai ai filifiliga amiotonu. Ou te iloa afai tatou te faamaoni e pei o Nifae ma Iesu, o le a faafafiaina ai i tatou. ■





Saunia e Elder  
Neil L. Andersen

O Le Korama  
a Aposetolo e  
Toasefululua

# E faapefea ona ou fesoasoani atu i **TAGATA UMA** ia lagona le talileleia i le Peraimeri?

E alofa le Atua i Ana  
fanau uma. O i tatou  
uma lava o Ona atalii  
ma afafine. E tatau ona  
tatou manatu alofa ma  
agalelei. O nisi o a tatou  
uo e o mai lava i latou i  
le lotu. O nisi e le mafai  
ona papatiso seia oo ina  
matutua i latou.

E mafai ona e aapa atu i se  
tasi ua lagonaina le tuuatoa-  
tasi po o le le amanaia.



O le iloaina o le igoa o  
se tagata e mafai ona  
faia se eseesega.



Valaaulia se  
tasi e nofo i ou  
tafatafa.



Se'i o tatou faaloaloa teisi  
atu o tatou lima ma tatala teisi  
o tatou loto.



Fesoasoani ia  
i latou o loo  
lagonaina le  
fefe ma le  
matamuli.  
Mafaufau ia  
i latou. Talia  
lelei i latou.



Mai i le "Ai Se Talia i Latou ua Talia A'u," Liahona, Me 2016, 50.

# AAPA ATU I Uo Fou



**O**lder Neil L. Andersen ma lona faletua, o Kathy, na asiasi i le Ripapelika Temokarasi o Congo i Afrika. Sa faia le latou sauniga a le Ekalesia i fafo i lalo o ni faleie. Sa faataamilo i faleie se pa tele. Na iloa atu e Elder Andersen ni tamaiti o loo matamata mai ia i latou mai le isi itu o le pa. Sa fesili atu Sister Andersen ia te ia, "Mata e te manao e valaaulia tamaiti e o mai i totonu?" Sa savali atu Elder Andersen i le tamaloa i le masini faaleotole leo. Sa ia fai atu i le tamaloa e valaaulia tamaiti e o mai i totonu ma faatasi ma i latou.

Sa taufetuli mai tamaiti! Sa latou ataata uma ma le fiafia i le avea ai ma se vaega o le sauniga.

Na faamatala atu foi e Elder Andersen se tala i se taulealea e igoa ia Iosua na aapa atu i se isi tamaitiiti i le lotu.

Ina ua faatoa alu atu Iosefa, o se taulealea mai Uganda, i le lotu mo le taimi muamua lava, sa leai sona aiga iina e fesoasoani ia te ia e iloa le mea e alu i ai. Ona faailoa atu lea e faifeautalai o ia ia Iosua.

Sa tau atu e Iosua ia Iosefa o le a avea o ia ma ana uo. Na ia tuuina atu ia Iosefa se tusipese mo le Peraimeri, ma sa ia nofo i ona autafa. Ona usuina lea e le vasega a le Peraimeri "O au o se atalii o le Atua" ia Iosefa. Na galulue tagata uma ina ia lagona e Iosefa le taua tele, ae maise lava o lana uo fou, o Iosua. Ina ua la matutua, na auauna atu Iosua ma Iosefa o se soa faifeautalai!

Sa faamanatu mai e nei aafiaga ia Elder Andersen e faapea tatou te manaomia uma lava le aapa atu i tagata o loo siomia i tatou o e atonu o loo lagonaina le tuuato-tasi po o le na o ia. ■



# Fiafia e Fesoasoani!

Ou te fiafia i enchiladas [totila], numera, ma le lanu lanumeamata vaivai. O ou matua e o mai Burundi, o se atunu i Aferika i Sasae. Sa ou fanau i se tolaupiga a tagata sulufai i Tanzania. Ua ou nofo nei i Iuta, ISA.



## O SE IGOA FAAPITOA

*Ou te tautala i le gagana Peretania ma se gagana e ta'ua o le Kirundi. O le uiga o lou faaiu o le "O le a ou faafetai pea mo mea ua ou mauaina." Ou te faafetai o le toatele o tagata o lou aiga e nonofo latalata mai foi.*





### MEA FAAFIAFIA A LE AIGA

*I le taimi o aso malolo matou te o ai ma lou aiga i le fale o Tinamatua mo le taumafataga o le afiafi. Matou te aai ai sambusas (falaoa falai ma le araisa po o se aano o manufasi i totonusi). Ona faamatalaina lea e matua ni tala, e ta e le uso o lou tama ma se tausoga ia tagipalau ae ma sisiva ma lou uso!*

### FESOASOANI I ISI

*Pe a ou matua, ou te manao e avea ma se tamaitai tausimai. Ae o le taimi nei e mafai ona ou fesoasoani e ala i le faia o tagamea, suia le napekin i a'ou uso pepe, ma fesoasoani i lou uso o Sofia i ana meaaoga.*

*Mai se faatalanoaga ma Jordan Wright, Iuta, ISA*

## FAAALIA O LE ALOFA I TAMAITI E FOU

- Afai e te le tautala i la latou gagana, sue se tasi e mafai ona faailiuu.
- Aoao pe faapefea ona fai atu talofa. I le faaKirundi, fai atu "Amakuru." I le faaSuaili, fai atu "Jambo!"
- Valaaulia i latou e o mai e taaalo ma outou.

### FESOASOANI I TAGATA FOU

*Ou te fiafia e fesoasoani foi i le Peraimeri. O nisi o tamaiti o lau paranesi e tautatala faaKirundi i le fale, ae o nisi e tautatala faaSuaili. Matou te faia le Peraimeri i le faaPeretania. A o mai ni tamaiti fou i le Peraimeri e na o le faaKirundi e tautatala ai, ou te fesoasoani e faailiuu mo i latou.*



AUINA MAI  
IA I MATOU  
SE FATU!

E faapefea ona e mulimuli ia lesu e ala i le faaalia o le alofa? Auina mai ia i matou se fatu faatasi ma lau tala ma sou ata, faapea foi ma le faatagaga a ou matua. Auina mai i le liahona.lds.org (kiliki le "Submit an Article") po o le imeli liahona@ldschurch.org.

*Faataitai lenei manatu i le afahi faaleiaiga ina ia iloa atili ai le Faaola.*

# Suafa o TeSu

O se gaoioiga lenei e mafai ona fai e lou aiga. Aoao e uiga ia Iesu Keriso e ala i le fatauina o mau nei, ma fatumu i le suafa o loo faaaogaina i le fuaupu. Ona faasoa atu lea o se auala se tasi e te iloa ai e alofa Iesu ia te oe!

**Mosaea 3:20**

O Iesu o lo tatou \_\_\_\_\_ ma le Togiola. Sa ia faaolaina, pe "togiolaina," i tatou mai le oti ma le agasala e ala i le Togiola. Ona o lenei mea, tatou te maua ai le avanoa e toe nonofa faatasai ai ma o tatou Matua Faalelagi i se aso.

**1**

**Niffae 2:28**

O se \_\_\_\_\_ o se tagata e tui-le-va, po o se tasi e fesoasoani e foia faafaituli i le va o tagata. Aua tatou te agasala uma, tatou te manaomia uma le fesoasoani ina ia mafai ai ona toe mau faatasai ma le Atua. E mafai ona fesoasoani Iesu ia i tatou i lenei faafaituli! E "autua" o la mo i tatou, ma tuuina mai avanoa e suia ai ma maua le ola e faavavau e ui lava tatou te faia ni mea sese.

**5**

**Iaroma 1:11**


O le suafa \_\_\_\_\_ o lona uiga "o le ua faauina." Ua faamanatu mai e lenei suafa mo Iesu ia i tatou o la o le Tupu na aoao mai ai perofeta ma tuisitisiga paia.

**2**

**Isaia 40:28**

E valaaau Iesu i nisi taimi o le \_\_\_\_\_ auua sa la fesoasoani e faia lenei labolagi matagofie mo i tatou, i lalo o le taitaiga a le Tama Faalelagi.


**6**



### Aperaamo 2:8

A o lei fanau mai lesu i le lalolagi, sa valaauiua o  
la o \_\_\_\_\_ le Atua o Israaelu. O leni  
suafa sa matuai paia lava ma o tagata lutaiia sa le  
tau atua faaleotele, ae nai lo lena, na faaogaina isi  
igoa e peio le Alii pe a talanoa e uiga ia te la.

3



**Ioane 8:12**  
O Iesu o le \_\_\_\_\_. E tusa lava pe tutupu ni  
mea lega, e mafai ona tatou lagonaina le toafilemu  
ma le famoemoe e ala i le aoao e uiga ia lesu ma  
mulimuli i Ana aoaoga. E alofa o la i tagata uma  
taitoatas i lenei lalolagi—e aofia ai oe!

7



### Salamo 23:1-3

O Iesu o le \_\_\_\_\_ Lelei. E alofa o la i  
tatou ma e finagalo e taitaia ma puipua i tatou, e  
peio se leoleo mamoe e popole mo lana lafu.

4

ATA NA TUSA E KRISTIN KWAN

Talai: Fenua, Mesihi, Leava, Leoleo Memone, Puhuega,  
Roufou, Matuaduna o le Ladraga

E mafai foi ona e matamata i se vito i le  
**Mormon.org** e uiga i suafa o Iesu Keriso.

# Na Faamagalo Atu Iesu

Saunia e Kim Webb Reid

I se tasi aso sa tatalo ai Iesu.  
Na fai atu se tasi o le au soo  
ia Iesu, "Le Alii e, ia e aoao  
mai ia te i matou i tatalo."

Na tau atu e Iesu i Ona  
soo e tatalo ma ole atu  
i le Tama Faalelagi ina  
ia faamagaloina a latou  
agasala. Sa Ia fetalai atu o  
le a faamagaloina e le Tama  
Faalelagi i latou pe afai latou  
te faamagalo atu i isi.



Na fesili atu Peteru i se tasi taimi ia Iesu pe faafia ona ia faamagalo atu i se  
tasi na te faia se mea sese. "Seia atu fitu ea?" Le taumate a Peteru.


"Fitugafulu ni fitu," na fetalai atu ai Iesu.


Sa aoao atu e Iesu i Ona soo, e tatau ona tatou faamagalo atu *i taimi uma*.



Na faamagalo e Iesu tagata na lagona le faanoanoa ona o a latou agasala. Ina ua Ia faamagalo atu i se tasi o fafine, sa ia lagonaina le matuai faafetai lava o lea na ia mulumuluina ai Ona aao i ona loimata.

Sa faamagalo foi e Iesu tagata o e na le iloa sa latou faia se mea sese. Sa Ia ole atu i le Tama Faalelagi e faamagalo atu i tagata sa faasatauroina o Ia ona sa latou le iloa sa latou faatiga i le Alo o le Atua.







E faamagalo e Iesu tagata ona e alofa o Ia ia te i latou. E mafai ona ou taumafai e avea faapei o Iesu e ala i le faamagalo atu foi o isi! ■

*Mai le Mataio 18:21–22; Luka 7:37–48;  
Luka 11:1–4; Luka 23:34*

# E Mafai ona ou Migao





Saunia e Peresitene  
James E. Faust  
(1920–2007)

Fesoasoani Lua i le Au  
Peresitene Sili

## FAAMOLEMOLE TOE FOI MAI!

*Matou te tatala atu o matou lima ia te outou. Matou te manaomia la outou fesoasoani.*

| a i latou o e ua ponatia loto pe ua leai foi se naunau [i le Ekalesia], pe o e ua liliu ese mo soo se mafuaaga, matou te valaaulia outou uma ina ia auai i le faaaumeaga atoatoa faatasi ma i matou. O tagata faamaoni o le Ekalesia, atoa foi ma o latou sese uma ma vaivaiga, o loo taumafai i latou ma le lotomaualalo e fai le galuega paia a le Atua i le lalolagi. Matou te manaomia la outou fesoasoani i le tauiviga maoae e tetee atu i malosi o le pogisa ua salalau i le lalolagi i aso nei. I le avea ma se vaega o lenei galuega, o le a mafai e outou uma ona faamalieina manaoga loloto o o outou agaga. O le a outou iloa le mafana patino lena e mafai ona maua i le sailia o mea paia ma faasaina e le Atua. E mafai ona outou olioli i faamanuiaga ma feagaiga o faia i malumalu paia. E mafai ona outou maua uiga maoae ma le faamoemoega i o outou olaga,



i le lalolagi upuvale o tatou soifua ai. E mafai ona outou maua le malosi o le amio e mafai ai ona outou filifili mo outou lava ae le o le galueaiina. (Tagai i le 2 Nifae 2:26.)

I ni nai tausaga ua mavae, na tuuina mai ai e le Au Peresitene Sili o le Ekalesia [lenei] valaaulia:

“Ua matou iloaina nisi ua le toaaga mai, o isi o e ua faitio ma ua matele i le saili masei, ma i latou o e ua taofia pe tineia igoa ona o solitulafono matuia.

“Ia i latou uma na matou te aapa atu i ai i le alofa. Ua matou naunau e faamagalo atu i le agaga o Ia o le na fetalai mai: ‘O A’u, o le Alii, Ou te faamagalo i lē o le a Ou faamagaloina, ae o outou ua poloaiina ia faamagalo atu i tagata uma (MFF 64:10).’

“Matou te fautuaina tagata o le Ekalesia ia faamagalo i latou o e atonu ua sese mai ia te i latou. “Ia i latou ua le toe toaaga mai ma i latou ua avea ma e faitio, matou te fai atu, ‘Foi mai. Foi mai ma taumamafa i le laoai a le Alii, ma toe tofo i fua suamalie faamalie loto o le faaaumea faatasi ma le au paia.’

“Ua matou mautinoa e toatele ua [mananao] e toe foi mai, ae ua ia i latou se lagona vasivasi i le faia o lena mea. Matou te tautino atu ia te outou o le a outou maua ni lima e tatala atu e talia outou ma le nau-nautai e fesoasoani atu ia te outou.”

(*Church News*, Tes. 22 1985, 3).

. . . Ou te toe fai atu lena talosaga i le lotomaualalo ma le faamaoni. Ma e tatala atu o matou lima ia te outou. ■

*Mai le “O se Tofi e le Mafaatauina,” Liahona, Ian. 1993, 105.*

**UA FAAMALOLO  
E KERISO  
TAGATA MAMAI,  
SAUNIA E  
JEFFREY HEIN**

"E ui lava i lea, aua  
tou te tulia o ia i  
fafo mai o outou  
sunako, po o o outou  
nofoaga o tapuaiga,  
aua o tagata faapena  
ia outou galulue pea  
i ai; ona tou te le iloa  
pe o le a latou toe  
foi mai ma salamo,  
ma o mai ia te au  
ma le faamoe  
atoa o le loto, ma  
o le a ou faamalo-  
loina ai i latou; ma  
o le a avea outou  
ma ala e aumai ai le  
olataga ia te i latou"  
(3 Nifae 18:32).



# Ei Ai Foi i le Lomiga Lenei

## MO TALAVOU MATUTUA

### Ole a le Inisitituti?

Pe e te le iloa po o le a le inisitituti o mataupu faalelotu  
po o auala e mafai ona faamanuaina ai lou olaga?  
Saili pe aisea e avea moni ai lava le inisitituti mo oe!



i.44

## MO LE AUTALAVOU



i.56

### SIAMUPINI *mo le Tatalo Faaleaiga*

E te manao e fesoasoani i lou aiga e faia se  
fuafuaga i le tatalo faaleaiga? la faaaoga  
fautuaga nei e 10 e avea ai ma siamupini a lou  
aiga mo le tatalo.

## MO TAMAITI

### Suafa o Iesu

Na e iloa e valaau Iesu i le tele o suafa eseese?  
Suesueina le lelei o lou iloa i isi Ona faalagiga.



i.74